

# *DIPOTSO LE DIKARABO*

 . . . fano, ke ne fela ka e mena gape. E ne ya re:

## **24b. A o tsaya letsatsi go akanya ka dilo tsena tse o ileng go di bua bosigo?**

Go tlhomame go tlaa tsaya letsatsi le le bonagalang, a ga go tle go dira?

Nnyaya, Mokeresete, mokaulengwe wa me, ga nke ke tsaya kakanyo e le nngwe ya se ke ileng go se bua mo felong ga therelo. Ke tlaa bala Lekwalo golo gongwe. Mme ke—ke dirile dikitsiso makgetlo a le mantsi gore ke tlaa ya ko felong ga therelo, ke ne ke ile go rera ka serutwa sengwe, ke fitlhe koo, Mowa o o Boitshepo o mpusetse gone kwa morago, o ntire gore ke dire sengwe se sele.

Ke go lekile makgetlo a le mabedi kgotsa a le mararo go kwala dintlha le go rera ka dintlha. Fa fela ke lebile mekwalo eo, ke tlositse monagano wa me mo Modimong. Jalo he ke tshwanetse fela ke tswelele pele mme ke di sugakane ke bo ke di latlhela faatshe mme e nne fela eng le eng se A se buang. Nako tse dingwe ke simolola ko Genesi mme ke felelele mo go Tshenolo, nna . . . Jalo he ga ke mo gontsi thata ga mo—ga modiredi fela go—go . . . Ke tshwanetse ke amogele melaetsa ya me go tswa ko Godimo.

Mme ke—ke ne ka bala Lekwalo, jaaka ke buile, mo letshwaong la sebatana. Nna . . . Mosadi wa me, mmê, le bao ba ba itseng, matsale a dutseng fano, yo o leng kwa ntlong ka nako nngwe, nna fela, go ka nna nako ya boraro mo tshokologong, ke simolola go rapela. Ke a tsena, ke simolole go rapela. Fong ke ya fela kong, ke a akanya, “Sentle, ke rile ke tlaa bua bosigong jono ka ga *Letshwao La Sebatana*.” Ke tlaa ya ka kwa. Mme ke tlisitse, bosigong jono, go nna karabo ya tha—thanodikgolo ya ga Cruden. Mme moo ke go bona dikarabo, kgotsa, eseng—eseng dikarabo, fela lo itse se thanodikgolo e leng sone: ke mafoko otlhe a Baebele a kwadilwe. Jalo he, ke tsoma fela thanodikgolo go batlisisa, nako nngwe, kwa potso ya motho yo e leng gone.

Fela go leng gantsi, jaaka ke bona mongwe wa ditsala tsa me fano yo ke kgatlaneng nae mo lebentleleng, kgotsa fa lebentleleng tshokologong eno, ena . . . re ne re bua ka ga dipotso tsena, le jalo jalo, jalo.

Jaanong, botshelo jotlhe jwa me jo ke nnileng le jone, esale ke le modiredi, ke ne ka tshwanela go tlhabana go batlile le sengwe le sengwe. Ga ke ise ke ye ko sekolong sepe sa seminari. Mme selo se le nosi se nkileng ka se ithuta e ntse e le se A se mpoleletseng. Mme fong ke ne fela ka nna mo go gone mme—mme ka go dumela. Mme ke ne ka tshwanela go tlhabana thata gaufi

le sengwe le sengwe se ke—ke se dumelang, go dikologa lefatshe. Nna... Bona... Kwale ko Afrika, ko mafelong a a farologaneng le madirelong a mafatshe a sele, lo fitlhela ditumelwana tse Amerika e iseng e akanye ka ga tsone. Mme moo go latlhelwa gone mo teng ga gago. Fela selo sa konokono nna ka gale le gale ke lekile go ema fela mo Lefokong lena, gone fano; lo a bona, eseng fela mo Lekwalong le le lengwe, go tshwanetse go tle tsela yotlhe go ralala Baebele.

Jaanong, o ka tsaya Lokwalo le le lengwe wa bo o le dira gore le bue sengwe le sengwe. A lo a itse batlhoka tumelo ba dirisa Baebele ena go nna buka ya bone ya kganetsanyo? Go tlhomame. Fela go tshwanetse go tshwane tsela yotlhe. Jaanong, fa lo tlaa itshwarela tlhaloso (ke tlaa, fela, gore, go nne tsela ya thuto mo go rona), Baebele e jaaka setshwantsho sa malepa se se kgaoakgaotsweng. Totatota. Mme o tlaa tshwanela go leba ko go Keresete Jesu, Sekaelo, go itse ka fa o ka se kopanyang ga mmogo ka gone. Fa o sa dire, wena o tsaya mogopol o e leng wa gago, o tlaa nna le gone mo tiragalang ya gago, kgomo e fula bojang mo godimo ga setlhare, selo sa ntlaa se o se itseng. Gone fela ga go tle go bereka sentle. Fela fa fela o tlaa letla Mowa o o Boitshepo; o sek a fela wa dirisa monagano o e leng wa gago fa o ithuta Baebele. Fa o leka go dirisa kitso e e leng ya gago kgotsa monagano o e leng wa gago, wena go tlhomame o tlaa menoga nako nngwe le nngwe. Lo a bona?

Gonne jaaka Keresete a ne a re, “Ke go fitlhile mo matlhong a seminar, ba ba botlhale le ba ba itseng dilo, mme ke tlaa go senolela bana jaaka ba ba tlaa ithutang.” Lo a bona. “Ke go fitlhile.” Jalo he ga go na dikolo, le makgotla, le—le makgotla a kereke, go ruta Lokwalo ka tsela e go tshwanetseng go nna ka yone. Jaanong, moo ke selo se segolo go se bua. Ba ka nna ba bo ba na le boammaaruri jo bontsi, fela Mowa o o Boitshepo o go senolela batho ka bonosi. Ke gone ka moo, Mowa o o Boitshepo ke wa batho mo go motho ka bonosi. Leo ke lebaka lekgotla le ntshetsang batho ko ntle ga mola wa Modimo nako nngwe le nngwe. Ka gore Modimo o neela sengwe se seša ka metlha le metlha, Ena o tswelela pele jalo. Mme, fela mona go tlhola e le motheo. Ela tlhoko mme o go bone jaaka go oboga mo Baebeleng, go lebelele ka fa go obogang ka gone mo nakong. Fong o kgona go bona kwa o yang gone.

Jaanong, mo dikarabong tsena, jaaka ke buile, nna ke moruti yo o seng boleng thata. Fela ke batla go bua gore se ke se itseng ka ga gone, ke eletsa go—go go tlhalosetsa ba bangwe. Mme fa o sa dumalane o bo o re, “Sentle, Mokaulengwe Branham, nna fela ga ke go dumele ka tsela eo,” moo go siame, moo ga go sa tlhola go re thuba mo go nneng bakaulengwe, lo a bona. Rona re bakaulengwe fela. Nna... Fa o batla go nna mo—mo—mo... go nna leloko la Temple of Continuity, lo a itse, moo go siame mo go nna. Lo a bona. Mme fa o dumela mo go Morena Jesu

Keresete, re tlaa bo re santse re le bommata mme re tswelele gone mo tseleng. Mme—mme ke dumela gore boitshepiso jo bo molemo jwa segologolo bo tlaa go dira gore o ikutlwé ka tsela eo ka ga gone. A ga lo dire? Go ntse jalo, bo re dire gore re dumalane.

Jaaka monna yona a eme maitseboeng a maabane, a eme gone fano, ka maemo a mohuta oo. Mme—mme ke kgatlhane le... Mobishopo mogolwane wa India ke yona fano, go feta batho ba le didikadike di le makgolo a le mané le masome a supa. Mme o ne a tla, mme o ne a utlwa ka ga gone mme o ne a tla ka kwano, o ne a re, “A mona ke boammaaruri?”

Ke ne ka re, “Ke jone.”

O ne a re, “Ke amogela jang Mowa o o Boitshepo?”

“Go bewa ga diatla.” Ne ka baya diatla mo go ena, mme Mowa o o Boitshepo ne wa tla mo go ena.

O ne a ema ko Chicago, fano, dibeke di le mmalwa tse di fetileng, kwa bokopanong jo bogolo jwa Christian Business Men, ne a re, “Ke ne ke na le dikhadinale tsotlhé le sengwe le sengwe se sele ba baya diatla mo go nna ka kwa; banna ba batona, bobishopo ba batona, le jalo jalo, ba baya diatla mo go nna fa ba ne ba ntlhomha go nna mobishopo mogolo wa India, Mobishopo mogolo wa Moephiskhophaliene wa India le tautona ya Christian Fellowship ya India.” Letshwao le le tona go gaisa thata la bodumedi ko India. Mme o ne a re, “Go ne go sena sepe se se neng sa diragala fa ba ne ba baya diatla mo go nna.” Ne a re, “Ke tla ka kwano ko moekeng yo o neng a sa itse bo ABC ba gagwe, ka boutsana, mme o ne a baya diatla mo go nna, mme ke ne ka amogela Mowa o o Boitshepo.” Go ntse jalo. Moo go a gakgamatsa, a e ne e se gone? Lo a bona.

Jalo he, ga go tle ka thuto kgotsa kitso; go tla ka go ikokobetsa fa pele ga Modimo. Go ntse jalo.

Mme fong, fano ke ka fa o tlaa itseng gore o Mokeresete: Ka maungo a o a ungwang. Jaanong, eseng ka tsela e o thelang loshalaba ka yone. Ke dumela mo go theleng loshalaba, fela ga se a kana o thela loshalaba, kgotsa nnyaya, nna...kgotsa—kgotsa a kana o bua ka diteme, kgotsa nnyaya. Gore... Ke dumela mo go bueng ka diteme. Ga se a kana o fodisa balwetsi, kgotsa nnyaya. Ke dumela mo phodisong. Fela maungo a Mowa ke ana: lorato, boipelo, kagiso, boiphapaanyo, bomolemo, bonolo, bopelotelele. Moo ke leungo la Mowa. Lo a bona? Mme fa ditshupo tseo di go latela, fong nna—nna ka mohuta mongwe ke dumela gore seo ke se Jesu a mpoleletseng go se senka.

O ne a re, “Sena batho botlhe ba tlaa se itse gore lo barutwa ba Me, fa lo na le...” [Phuthego ya re, “Lorato la mongwe mo go yo mongwe.”—Mor.] Go ntse jalo. “Fa lo na le lorato la mongwe mo go yo mongwe.” Le fa motho a ka nna a farologana le wena, le fa go ntse jalo wena o mo rata fela go tshwana. Lo a bona?

Ao, fa fela o rata bao ba ba go ratang, ke tuelo efeng e o nang nayo? Baleofi ba dira selo se se tshwanang. Lo a bona? Lo a bona? Fela o tshwanetse o rate bao ba ba go tlhoileng, eseng fela go itira okare o aba rate, fela o ba rate ka nnete. [Phuthego ya re, "Amen."—Mor.] Ke a lo leboga. Go ntse jalo. "Amen," go ntse jalo. Lo a bona? Fa motho ka mmannete a go tlhoile, mme a netefaditse gore o go tlhoile, mme o santse mo pelong ya gago o mo rata, wena o atamela gaufi thata le Bogosi. Go jalo.

Jaanong wena fela ga o mo rate, o re, "Sentle, ke a itse ke tshwanetse ke go dire." Fela o a mo rata le fa go ntse jalo. Fa o sa mo rate go tswa mo pelong ya gago, fa o re o a mo rata fa o sa dire, o itse se moo go se go dirang? Moitimokanyi. Lo a bona. Jalo he o sekwa tsamaela kong mme wa mmolelala gore o a dira ntengleng le fa wena ka nnete o dira. Mme fa o sa ikutlwé ka tsela eo, nna fela gone fano go fitlhela o ikutlwé ka tsela eo. Ka gore ke tlaa go tlhomamisetsa, go na le letlhogonolo le le lekaneng go go dira gore o ikutlwé ka tsela eo. Go ntse jalo. Gone ka nnete go tlaa dira.

Jaanong—jaanong, dipotso tsena... Mme gakologelwang jaanong, gone go jaaka mo ditirelong, dilo tsotlhé tseo ga di a lebaganiswa kwa kerekeng ya ga ope, tumelong ya ga ope, le eseng gotlhelele. Nna ke fela mo motlaaganeng o e leng wa me o monnye wa kgale fano ke supa fela maikutlo a me ka dirutwa tsena. Lo a bona.

Mme jaanong, fa o farologana, moo go tlaa bo go siame. A lo a itse gore ga go na, ka boutsana, ope wa ba babedi ba rona fano, mme ga go ope wa rona fano yo o nang le monwana wa kgonope ka go tshwana. Ga go dipe tsa dinko tsa rona tse di tshwanang. Ke a fopholetsa ga lo na nngwe e e jaaka ya me. Fela—fela gone ke... Fela ga go na bape fano ba ba tshwanang. Lo a bona? Mme fong re ile go farologana. Jaanong, nka nna ka rata borotho jwa motlapiso wa tsheri mme wena o rate apole, fela rotlhé re ja borotho jwa motlapiso. Moo ke fela se—selo. Jalo he, rona... Moo ke mogopolo. Fa fela re rata Morena Jesu, mme re tsetswe seša ke Mowa wa Modimo, re Mokeresete. Jaanong, kereke ga e kake ya go direla seo. Jesu o kgona go go direla seo. Lo a bona.

Jaanong, mo dipotsong tsena, ke lebile teng fano, go na le dingwe tse di tlhabang tota teng moo. Mme jalo he, mo go di arabeng jaanong, mongwe le mongwe a dire tlhatlhobo e e molemo tota ka ga sena, lo a bona, go kwaleng: Nna ke di araba fela ka bojotlhé jwa kitso ya me ka Lefoko la Modimo. Lo a bona? Mme fa e sa arabiwa ka go nepagala mo go ya gago... mme wena, potso e nngwe, goreng, wena o... Ke tlaa rata fela gore o e busetse mo serialeng kgotsa o tle o bue le rona ka ga gone, kgotsa sepe se re ka kgonang go se dira. Mme gongwe Mokaulengwe Neville le nna fano, re ka nna ra bona dilo tse rona fela re sa dumalaneng ka tsone.

Mme—mme Rrê Baxter, mongwe wa bankane ba me ba ba gaufi thata mo bokopanong jwa me, Rrê Baxter, re ntse re le mmogo ka dingwaga; mme mosenodi wa mmannete wa Baebele yo a leng ene, fela ga a dumele mo Mileniamong. Mme ke ne ka tla, ka bo ke re, "Mokaulengwe Baxter, o ile go potologa Lokwalo lena jang?" O ne a tle a tlolele letlhakoreng le le lengwe, ke re, "Jaanong, o seka wa itshwara jaaka tsiekgope. O dule gone o tuuletse." Lo a bona. Mme ke ne ka re, "Mme ba ne ba tshela ebile ba rena le Keresete dingwaga di le sekete mo lefatsheng." Ne ka re, "Ga tweng ka ga seo?"

O ne a re, "Ke dumela gore dingwaga di le sekete go raya fela sebaka se se rileng."

Ke ne ka re, "Jaanong, ema motsotso, o tsaya kakanyothe. Baebele ne ya re, "dingwaga di le sekete." Uh-huh. Ba—ba nnile fela ba tlolaka. Fela bone, lo a bona, ga re a ka, fela, ga re a ka ra ngangisana a kana go na le mileniamo kgotsa nnyaya; re ya gae kwa Legodimong, ga mmogo, ka gore o tsetswe seša ebile o na le Mowa o Boitshepo.

Jalo he eo ke tsela e ke batlang lo utlwe ka ga dipotso tsena: Tsena ke fela bojotlhe jwa kitso ya me mo go lona.

Fong fa ke ne ke bona mongwe a dutse fano, mme ba ne ba dumela gore Jesu o ne a tla a pagame pitse e tshweu, mme nna ke dumela gore O ne a tla mo lerung le lesweu; jaanong, fa ke rile "pitse e tshweu" fela ka gore tsala ya me e ne e dumela pitse e tshweu, le fa go ntse jalo, go ya ka Dikwalo, ke dumela gore O ne a tla a pagame mo lerung, ke tlaa bo ke le moitimokanyi. Go ntse jalo. Ke tshwanetse ke itlhalose fela ka fa go leng ka gone mme ke ntshe lebaka la me gore gobaneng.

Paulo ne a re, "Nna o ipaakantse fa—fa dipakeng tsotlhé, o diragatse ka nako eo, go le lebaka, le go se lebaka; o ipaakanyeditse go naya motho karabo ya tsholofelo e e ntseng mo teng ga gago." Lo a bona. Mme seo ke se re lekang go se dira.

Jaanong, ke ikutlwa gore Dikwalo tsena, dingwe tsa tsone fano, ke fela ditshwaelonyana, le jalo jalo, mme ke tlaa leka go di araba pele, mo e leng gore ke lekile go di aroganya. Mme nka nna ka tshwanela go nna le sena, ke dirise thanodikgolo lobakanyana go ntsha dingwe tsa sena. Mme fong, teng fano, fa ke nopola mo go phoso kgotsa sepe, lona fela ka boitekanelo lo ngokeng kelotlhoko ya me, lo a bona, mme o nkwalale mokwalo, o bo o mpolelela.

Jaanong, pele ga re leka go bula sena . . .

Jaanong, lebaka le ke dirang sena, ditsala. Ke tlaa lo bolelela, ke ka ntlha ya maikaelelo. Lona lothle lo itse seo. Bokopano jona e ne e le ka ntlha ya boikaelelo. Ke a dumela Modimo o ne a ntira ke retologe, mo letsubutsubung leo la sefokabolea, ka kwa, mme a nthomela morago ka ntlha ya jone boikaelelo jona gone fano. Mme go nnile fela go na le sengwenyana se se phoso fa tikologong

ya motlaagana fano lobaka lo lo leele. Ke batla go se itse. Fa ke itse seo, fong ke ile go bona fa nka kgona go dira sengwe ka ga gone. Go ntse jalo. Mme ke batla kereke e tsamaye mmogo ka thokgamo. Mme go na fela le sengwenyana se se phoso, ka gore ga lo tswelele. Lo dira gore batho ba bolokesege, moo ke nnete, moo go gontle thata, fela ga lo tswelele ka tsela e lo tshwanetseng go dira ka yone. Re tshwanetse ra bo re ntsha bareri le sengwe le sengwe. Molaetsa o tshwanetse wa bo o tswelela gone mo tseleng.

Ke nnile le mokaulengwe wa rona, modisa phuthego, kong, mme re ne ra ralala tshilo ga mmogo, Mokaulengwe Neville le nna re dirile. Mme ke—mme ke batla go bona fa... Jaaka mongwe wa badisa phuthego ba lona, gone ke—gone ke maikarabelo a me. Mme maitseboa a a fetileng... Fela fa ke bona sengwe se se leng fela mo kerekeng jaanong, leo ke lebaka le nna ke iseng ke bapatse bokopano jona. Ke go ntsha fela; fela, goreng, mongwe le mongwe o amogelesegile. Go tlhomame, re batla lo tleng. [Fa go sa theipiwang teng mo theiping—Mor.] Mme, fela, ke fela mo kerekeng ena.

Mme ke ne ka akanya, “Fa ke tlaa ruta mo bosigong jwa ntliha, se kereke gompieno...le paka, go ya ka bonno, mo Baebeleng, kwa re dutseng gone fa bonnong, fong kerekeng go tlhomame e tlaa itharabologelwa mo go seo. Mme ke tloge ke bue ka ‘letshwao la sebatana,’ mme ke ba letle ba bone se seo e leng sone; mme go tloge go nne ‘Sekano sa Modimo.’” Moo ke mabaka a a tshegetsang le a a sa direng jaanong, moo ke lefifi le Lesedi jaanong, moo ke kana mo go mo teng kgotsa ko ntle jaanong, mme moo ke selo se se botlhokwa go gaisa thata se se tshwanetsweng go rutiwa jaanong.

<sup>2</sup> Mme ke a lo bolelela, ditsala, ke bua sena go tswa mo pelong ya me, fa pele ga Modimo, ka boingotlo, Ga ke ise ke utlwe tlotso ya Mowa o o Boitshepo go bua mafoko a ke nnileeng nao mo masigong a mararo a a fetileng. Go ntse jalo. Fela gone go ne fela ga nkisa kgakala. Ke ne ke tle ke ye gae, ke ne ke sa kgone le e leng go robala morago ga ke sena go goroga kwa gae, fela tlotso e e kalo!

<sup>3</sup> Jaanong, ke ne ka latlhela *tsena* golo fano mo tsholofelong ya gore ke tlaa fitlhela sengwe golo gongwe. Lo a bona? Ke tlhaloganye ma—maikutlo a batho otthe mo setoking sa pampiri fano. Fa ke sa fitlhele sena ka tsela ena, mme Morena a sa go ntshenolele, ke tlaa tswelela go fitlhela ke go bona. Mme Modimo o tlaa go nnaya. Go ntse jalo. Mme jalo he fong fa re go fitlhela, e ka nna ya bo e le fela kgapetlanyana, ya kgale e e fitlhilweng golo gongwe, fela Akane o ne a na le e le nngwe, le ene. Lo a itse, re tshwanetse re tlose selo seo, fong re tlaa tswelela gone re bo re tsamaya ga mmogo mo Bogosing jwa Modimo.

<sup>4</sup> Jaanong, Morena a lo segofatse. Mme jaanong pele ga re bula Lefoko... Mme jaanong—jaanong, mongwe le mongwe wa lona

yo o nang le sekolo sa Letsatsi la Tshipi mo mosong, jaaka go sololetswe, lona lo . . . Nna—nna ga ke tle go lo kopa gore lo fetwe ke sekolo sa lona sa Letsatsi la Tshipi, moo ke—moo ke lefelo la lona la maikarabelo mo kerekeng ya lona. Go ntse jalo. Fela, jaanong, fa o sa ye ko sekolong sa Letsatsi la Tshipi, tlaya mme o re bone mo mosong. Mme fong fa kereke ya gago e sena ditirelo ka moso bosigo, ka Letsatsi la Tshipi, o amogelesegile. Re tlaa itumelela go nna le lona ka nako nngwe le nngwe. Mme jalo he Morena a lo segofatse. Mme lo ntumedisetse Bakeresete botlhe; ga ke fithe fano thata.

5 Ke ne fela ke lebeletse mo kamoreng foo, pampiri e nnye e ke e kwadileng teng foo e santse e dutse fano e le segopotso mo kerekeng ena. Mme ke ne ka re, “Morena o a mpitsa,” mme rotlhe re ne ra lela ra bo ra lela. Ke gakologelwa bosigo jwa ntlha ke ne ka ya. Lotlhe lo gakologelwa pitso ya me ya ntlha, ope fano? Lotlhe lo ne lwa tsaya madi go nthomela ko St. Louis, kwa Betty Daugherty yo monnye yo neng a fodisiwa gone. Ke ne ka nna . . .

6 Ke a gakologelwa, ke ne ka adima jase ya mongwe fano go e apara. Ke ne ke sena jase epe go e apara. Mme ke ne ka ya golo koo mme ka dula mo koloing ya kgale ya setilo go ya ko St. Louis. Lo gakologelwa nako? Mme ke ne ka adima nngwe ya dibaki tsa bakaulengwe, e ne e le tona thata mo go nna, Ke ne ka e tshola mo lebogong la me; ka gore go ne go le tsiditsana mme ke ne ke sena jase.

7 Mme fong re ne ra ya kong, mme ke ne ka ya ko St. Louis mme ke ne ka kopana le Mokaulengwe Daugherty koo. Mosetsanyana wa gagwe, dingaka tsotlhe tikologong foo, le baitseanape le dikokelo, ba ne ba mo tlhobogile. O ne a le jaaka setsenwa se se jajaregang. Badiredi go ralala motse ba ne ba ntse ba le . . . gongwe le gongwe, teng koo ba mo rapelela. Mme ke ne ka tsena mme ka mo rapelela, mme batho ba ba tlhomolang pelo ba ne fela ba lebega ba le botuba thata. Mme mosetsanyana teng koo, a bokolela ebile a lela, a lwa.

8 Mme—mme o ne a sa tlhole a kgona go dira modumo jaaka motho wa nama, o ne o utlwala jaaka phologolo, o ne a gwaegile lenseswa thata ka . . . ao, go ka nna dikgwedi di le tharo kgotsa di le nnê. E ne e le spinal meningitis kgotsa . . . nnyaya, Saint Vitus’ dance, mo mo—mo mokokotlong. Mme dipounamanyana tsa gagwe di ne tsotlhe di jegile, di porotla madi. Mme menwananyana ya gagwe e ne fela e porotla madi gongwe le gongwe, kwa a neng a loma menwana ya gagwe, le dilo tse di ntseng jalo, mme a goa fela ebile a tswelela.

9 Mme ke ne ka rapela, ka fologela ko kerekeng. Ne ka leta dioura morago ga dioura. Ka nna mo koloing ya kgale mme ka leta. Ke ne ke sa tle go tlhogela tiragalo eo go fitlhela ke utlwa go tswa Legodimong. Mme ke neng ke dutse foo mo koloing, ponatshegelo e ne ya tlhagelela fa pele ga me, ne ya re, “Tsamaya

o bolelele rrê, mme rrê . . ." Ne a re, "O ye go bolelela mosadi yo maloba, golo ko toropong, o ne a reka ketlelenyana, e tshweu. Ga e ise e nne le metsi mo go yone pele." Mme ne a re, "Mmolelele a lebe mo kobotlong ya boraro mme o tlaa fitlhela sakatukwi e e leng mo setoking sa pampiri, e e iseng e dirisiwe pele. Mmolelele a e tlatse ka metsi. Emisa rrê mo seatleng sa gago sa moja, le rrêmogolo mo seatleng sa gago sa molema, mme o boelele, 'Rraetsho, Yo o kwa Legodimong . . .' Mme jaaka lo simolola seo, mpe a sutlhe sekatana go kgabaganya sefatlhego sa gagwe. Fong mo gare ga thapelo mo dire gore a ame diatla tsa gagwe, go tloge go nne dinao tsa gagwe. Fong ema mme o re, 'MORENA O BUA JAANA!'"

<sup>10</sup> Lo itse se se diragetseng, a ga lo dire? O ne a fodisiwa gone foo. Mme re ne ra tshwaraganya diatla tsa rona ga mmogo ra bo re fologa ka mmila ebile re nwa soda pop, ga mmogo kwa tinareng. Go ntse jalo. Go ne ga tlhotlheletsa St. Louis; bokopano jwa me koo, dikete di le lesome le bonê bosigo jwa ntlha. Go ntse jalo. Ko St . . .

<sup>11</sup> Gone fela go maswe thata gore ke tlogile mo go seo; go tsamaya le go ba dira gore ba simolole fela go tla ka mola, fela mongwe gone morago ga yo mongwe, morago ga yo mongwe. Ke ye fela ko ntlong mme ke nne foo go fitlhela go fetile, mme ke boele gae, ke dumela gore moo go ka bo go ne go le botoka go na le mo dikopanong.

<sup>12</sup> Go siame, a re obeng ditlhogo tsa rona fa re bua le Mokwadi wa Lefoko lena, jaanong.

<sup>13</sup> Mo bopelonoming jwa Morena wa rona Jesu Keresete, re a Go atamela, Rraetsho. Mme ka Leina la Gagwe re kopa boutlwelo botlhoko jwa Semodimo, gore O tlaa itshwarela maleo le ditlolo tsa rona kgatlhanong le Wena. Mme fa go na le boleo bope mo kerekeng e nnye ena bosigong jono, re a rapela, Morena, jaaka—jaaka motlhanka a eme fano, jaaka modisa mo dinkung . . . Jaaka Baebele e buile, "Tlhokomelang letsomane le Mowa o o Boitshepo o le dirileng mookamedi mo godimo ga lone, gore lo ba jese." Mme jaanong, Rara, ke a ba tsereganyetsa, gore O tlaa ba segofatsa o bo o itshwarele maleo otlhe a bone. Fodisa bolwetsi jo bo leng mo gare ga batho. Mme, Rara wa Legodimo, ke rapela gore mautlwelo botlhoko a Gago a tlaa nna mo go rona jaanong.

<sup>14</sup> Fano go ntse fa pele ga me, go kwadilwe mo pampiring, go tswa magaeng a le mantsi le bathong ba le bantsi, go ntse ditopo, dipotso tota tse di boteng tsa Baebele tse di fetang thutego e e tlwaelegileng. Mme re tlhoka thuso ya Gago, Morena Jesu. Mme ke tsaya fela tsena jaanong, ke tsena ka mo kamoreng, ke nna le thapelo, ke tswela ntle, ke di kgaoganya fano, le go bayaa tsone tse di tshwanetsweng go arabiwa jaanong ka fa lethakoreng le le lengwe, le tse dingwe tse di tshwanetseng go tsena ka mo

Lekwalong, mo go tse dingwe. Moo ke go ya ka fa ke itseng ka nako ena, Morena.

<sup>15</sup> Mme ke a rapela gore go tloga jaanong jaana O tlaa tsaya go tloga fano go tswelela, mme o tlotse batho ba Gago fano bosigong jono, dipounama tsa sebui, ditsebe tsa moreetsi. Mme mma Mowa o o Boitshepo o tle mme o tseye Lefoko jaanong mme o Le sutisetse gone ka mo pelong nngwe le nngwe, mme mma Le amogelwe mo moweng wa bopelonomi, mme mma Le neelwe ka go tshwana. Mme mma, fa tirelo e fedile bosigong jono, mma re ye gae, re re, "A dipelo tsa rona ga di a ka tsa tuka mo teng ga rona ka ntlha ya Bolengteng jwa Gagwe le ditshegofatso tsa Gagwe?" Morena, ke sa itseng se ke tshwanetseng go se bua, ke ineela ko go Wena le dipotso tsena, ka Leina la Jesu Keresete, go nna karabo. Amen.

<sup>16</sup> Ke a lo leboga, ditsala, ka ntlha ya tshisimogo ya lona. Ke batla fela go le supegetsa se bontsi, bontsi jwa dipotso tsena di neng di le sone.

**Mokaulengwe Bill, tsweetswee tswelela go ralala beke e e tllang.**

**Tsweetswee nna beke e nngwe.**

**Tsweetswee nna ga leelenyana.**

**Mokaulengwe Bill, tsweetswee nna beke e e tllang, ga leelenyana, mewa ya rona ya botho e tshwerwe ke tlala ya mohuta ona wa Dijo.**

**A kereke ena e ruta gore lona . . .** Moo go tshwanetse fela ga bo go wetse teng foo. Moo go mo lefelong le le phoso.

**Ke na le basimane ba le babedi, dingwaga tsa bobedi . . .** Moo ke, ke di tlhakatlhakantse, ke a fopholetsa, mo go gone. Jaanong, fano, go botoka ke tlise eo ka kwano, le yone, eo e mabapi le kgang ya motho ka bonosi.

**Mokaulengwe Bill, a wena o tlaa—a wena o tlaa rata beke e le nngwe gape? Re tlaa rata beke e le nngwe gape ya thuto ena ya Efangedi.**

**Topo ya me ke gore o nne beke e nngwe. Ke tlaa rata thata gore wena o nne lobakanyana go feta, o a itse re tlhola . . . re ka kgona go tlhola re ithuta mo gontsi.**

**Jaanong, a o tlaa nna fela beke e nngwe go feta, tsweetswee?**  
**Mokaulengwe Bill, tsweetswee re rerele beke e le nngwe gape. Re tlhoka sena.**

**Mokaulengwe Bill, thapelo ya me ke gore Modimo o tlaa fetola monagano wa gago mme a go dire gore o nne beke e nngwe.**

**Potso ya me ke: Dipirinki tse di fofang ke eng, mme a tsone ke sengwe se se tswang kwa go Modimo se se romelang sesupo? Mme ke go kopa gore o nne beke e nngwe.**

### **Tsweetswee nna beke e nngwe.**

<sup>17</sup> (Mme *mona* e ne e le kopo gore wena o ye kerekeng, go rapelela mongwe, lo a bona, o ye ko kokelong.)

<sup>18</sup> Jaanong, yo mongwe ke yona yo neng a re ke tlaa... Ke—ke itumelela go botsa mona. Mme Modimo Mothatiotlhe Yo e leng Moatlhodi wa me, ke emeng fano jaanong mo lefelong lena le le boitshepo... pele ga ke ne ke tloga ko gae, Mowa wa Morena o ne wa mpolelela, ne wa re potso ena e tlaa bo e ntse fano bosigong jono. Ke ne ke sa itse sepe ka ga gone, fela ke ne ke itse gore e tlaa bo e le fano:

### **A Jehovah Witness lekgamu la maaka?**

<sup>19</sup> Lo a bona, mongwe... Mme Mowa o o Boitshepo, kwa lefelong kwa ka... ke eme mo kamoreng ya me ya botlhapelo, pele ga ke tla kwano; Modimo, Yo e leng Moatlhodi wa me yo o masisi, ne a mpolelela, "Moo go tlaa bo go ntse mo seraleng," mme ne a re ga ke tle go "bua sepe ka ga gone; ke tswelele pele fela." Lo a bona? Jalo he nna... Lo itse se ke se buileng bosigong jwa maabane, a ga lo dire? Go siame, seo ke se e neng e le sone.

<sup>20</sup> Go siame, jaanong re tlaa simolola golo ka kwano mo go dingwe tsa tsena.

<sup>21</sup> Nna fela ga ke rate go bitsa gone mo pontsheng selo sengwe se se rileng, mme ke bue motho mongwe kgotsa motho mongwe ka nosi jalo. Ke rata fela go go ruta ka tsela ya fela... go kopanya selo sothle ga mmogo. Mme—mme lo a tlhaloganya, a ga lo dire? Fa ke tlaa ema fano mme ke re, "Jaanong, Mokaulengwe Neville o *jaana-le-jaana* le selo sa *senna-nne*"... Fa ke ne ke na le seo go se bua ka ga ena, ke ne ke tlaa ya golo ko ntlong ya gagwe mme ke mmitse mme ke bue nae ka ga gone. Lo a bona, ne ke tlaa—ne ke tlaa bolelela Mokaulengwe Neville.

<sup>22</sup> Fela jaanong, dipotso dingwe ke tsena. Jaanong, ga ke itse kwa ke tshwanetseng go simolola gone, ke fela setlhophha sa tsone se se ntseng fano. Ya re:

**25. Ke tomagano efeng e o neng o e raya ka ga kereke ya Protestante e e nang nayo le kereke ya Khatholike?**

**26. "Setshwantsho sa sebatana" se raya eng?**

<sup>23</sup> Jaanong, moo e ne e le nngwe ya dipotso go tloga kwa go jo bo fetileng... kooteng e ne e le mo go tsa batho... Jaanong, ke tlaa leka bojotlhe jwa me, ka thuso ya Modimo, go di arabka ka bojotlhe jwa kitso ya me. Jaanong fa A tlaa nnaya kitso, ka gore Modimo o a itse ke—ke di tsere fela, fano mo seraleng.

**Jaanong, ke tomagano efeng e o neng o e raya ka ga kereke ya Protestante e nang nayo le kereke ya Khatholike?**

<sup>24</sup> Jaanong, ke tlaa arabka eo pele, Modimo a thusa. Ke rile kereke ya Khatholike e ne e le... Re fitlhela gore letshwao la sebatana, bosigo pele ga jwa maabane, le ne la tshwanela go tswa

mo Roma. A go ntse jalo? Ga le kake la tswa mo lefatsheng lepe le sele fa e se Roma. Foo ke kwa le ntseng gone, ke kwa le beilweng gone. Mme ke ne ka re ga ke na sepe kgatlhanong le batho ba Makhatholike, ga go sepe kgatlhanong le ope. Rotlhe re batho ba ba swang re leka go fitlha kwa Legodimong.

<sup>25</sup> Mopapa ke mogoma a le mongwe yo o rutang, mobishopo mogolwane wa Canterbury ke yo mongwe, le yo mongwe, le yo mongwe, le yo mongwe; mme nna ke mongwe fela wa baruti, ke gotlhe. Ba tlaa ruta le go re, kooteng, ke ne ke le segogotlo mme ke ne ke le phoso, le jalo jalo. Mme ke na le tshwanelo...fa nka go netefatsa ka Lokwalo. Kgotsa fa ba ka go netefatsa ka Lokwalo gore nna ke segogotlo, go raya gore nna ke segogotlo. Fela fa nka netefatsa ka Lokwalo gore ba phoso mo thulaganyong ya bone, go raya gore go phoso; Lokwalo le nepile. Mme wena fela ga o na lefelo le le lengwe jaanong, go tshwanetse go tle tsela yotlhe go ralala Baebele, gongwe le gongwe.

<sup>26</sup> Jaanong, ke ne ka re, “Kereke ya Khatholike e ne e le mma kereke,” mme moo go jalo totatota. Kereke ya Khatholike ke mma kereke, fa go tliwa mo makgolteng a kereke. Kereke ya Khatholike e ne e le kereke ya ntlha e e kileng ya bopiwa, gaufi le go ka nna...ditso tse di botoka go gaisa thata, lo na le gone e ka nna A.D. 606, golo gongwe go bapa le teng foo fa bontate ba pele, mo go ya bobedi kgotsa ya boraro tikologong, ya baapostolo. Ba ne ba sule mme ba simolola go phatlalala mo ditumelwaneng tse dinnye. Mme Baroma, ba neng ba sokologile, Puso ya Roma e ne e thankgotse puso, mme fong kereke le puso di ne tsa kopana ga mmogo mme tsa simolola bodumedi bo bidiwa go twe “bodumedi jo bo akaretsang mongwe le mongwe.” Mme lefoko *Khatholike* le raya “mo go amang mongwe le mongwe.” Ba ne ba rulaganya kereke, mo e neng e le lantlha mo e leng gore bodumedi, bodumedi jwa Bokeresete, bo kile jwa rulaganngwa mo ditsong tsotlhe tsa lefatshe.

<sup>27</sup> Bodumedi jwa Sejuta ga bo ise bo nne lekgotla. E ne e le batho ba ba gololesegileng. Ba ne ba na le dikereke, fela ba ne ba sena lekgotla. Gore, Modimo o ne a berekana le setshaba, eseng lekgotla. E ne e le setshaba.

<sup>28</sup> Mme jaanong. Mme, fong, kereke ya Khatholike e ne e le lekgotla la ntlha. Fong re ne ra tsaya seo mo Baebeleng go batlisisa se lekgotla leo le neng le le sone. Mme go ya ka Lefoko la Modimo, go ne go tshwanetse go laolwa ke monna a le mongwe, monna a le mongwe. Mme monna yoo o ne a tshwanetse go nna mo kerekeng e e neng e ntse mo dithabaneng tse supa ko Roma, go ya ka Baebele. Ga go na... Mme o ne a tshwanetse a bo a na le thata e e busang mo setshabeng sengwe le sengwe mo lefatsheng, thata ya bodumedi e e busang. Ga go na e nngwe mo lefatsheng.

<sup>29</sup> Mme—mme Bokomonisi, re ne ra fitlhela gore, bo ne bo se ope—ope moganetsa—Keresete yo Jesu a buileng ka ga ene.

Bokomonisi ga se—ga se setšhaba, jaaka Russia. Bokomonisi ke mowa. Amerika e jelwe ke jone. Bo mo dikerekeng, bo mo bathong, bo mo kgwebong, bo mo gongweng le gongweng. Bokomonisi, mowa wa jone, o mo dikolong, o mo malwapeng, gongwe le gongwe.

<sup>30</sup> Mme fong—fong erile ba rulaganya kereke ena e e neng e ganetsanya . . . Mme jaanong re tsere Dipaka Tse Supa Tsa Kereke, le seporofeto, totatota tsela e Modimo a neng a di tlisa go tswelela go ralala Baebele fano mo go rona. Mme re ne ra fitlhela ka ditso le Baebele, gore paka nngwe le nngwe e ne ya tsena fela go ya ka Baebele, go ya ka ditso; nngwe le nngwe e ne ya tsena fela ka nako, go ralala dipaka tse di lefifi. Mme fong kereke ya Khatholike e ne ya bopega mo Pakeng e e Lefifi.

<sup>31</sup> Fong tokafatso e ne ya tla, e e leng Martin Lutere. Mme Martin Lutere o ne a na le lesedi, lesedi la gore “Basiami ba tlaa tshela ka tumelo; tshiamiso ka tumelo,” mo toka—mo tokafatsong. Moperesiti wa Mojeremane yo neng a gana mme a bua gore go ja selalelo fa a ne a se tshotse . . . Mme ba ne ba tshwanetse go re “mona ke mmele wa ga Keresete,” mme o ne a se latlhela mo bodilong a bo a re, “Gone ga se mmele wa ga Keresete; ke papetlana ya senkgwe!” Mme jalo he o ne a gana kereke ya Khatholike, ka go dira jalo, a bo a tswa mo tokafatsong ya pele. Martin Lutere o ne a dira seo, mme eo e ne e le kgato e ntle thata.

<sup>32</sup> Jaanong, phoso, kwa Lutere a dirileng phoso ya gagwe gone, Lutere o ne a rulaganya setlhophapha se sengwe fela jaaka kereke ya Khatholike e dirile, a rulaganya batho.

<sup>33</sup> Fong, ka tlhamallo, lesedi le leša le ne la tla. Mme erile lesedi le leša le tla, Modimo o ne a tswela ntle le batho ba Gagwe. Batho ba ba neng ba rulagantswe ko kerekeng ya Lutere, ba ne ba tshwanela go nna le kereke ya bone gore ba tle ba nne le . . . Moo go tshwana fela le jaaka Makhatholike ba ne ba tshwanetse go nna ka gone, fela ba le bantsi ba Makhatholike ba ne ba tswa mme ba ne ba le Malutere. Sentle, fong erile Wesele a ne a tla ka molaetsa wa boitshepiso, fong ba le bantsi ba Malutere ba ne ba se kgone go tlogela kereke ya bone; fela ba le bantsi ba bone ba ne ba dira, mme ba dira kereke ya Wesele.

<sup>34</sup> Fong morago ga tshiamiso le boitshepiso, ne ga tswelela ga tla Pentekoste. Mme fong Pentekoste, ba le bantsi ba ne ba tswa mo Methodisting, le jalo jalo, mme ba fetoga ba nna Pentekoste ka gore e ne e le lesedi le legolo go feta. Jaanong Pentekoste e rulagantswe fela totatota jaaka nngwe le nngwe ya tsone!

<sup>35</sup> Jaanong, Baebele e bua gore . . . Ana ke mafoko a a bogonoko, fela ke tlaa a bala mo Baebeleng. Mme lo reetseng ngaka ya lona, kgotsa jalo jalo, a bua sena, mme nna ke mokaulengwe wa lona ke ruta go tswa mo Lekwalong. Baebele e ne ya bitsa kereke ya Khatholike “sepepe, seaka, s-e-a-k-a.” Mme O ne a bitsa

dikereke tsa Maprotestante tse di neng di e latela, bomma... kgotsa e ne e le “baakafadi ba mma yona.” Mme ke tomagano efeng e e neng e le yone, gore kereke ya Khatholike e ne ya rulaganya selo se mme ya dira gore batho both ba dumele jaaka lesedi le ba neng ba na nalo ka nako eo, kgotsa se ba neng ba na naso ka nako eo. Malutere a ne a dira selo se se tshwanang. Mme Baebele ne ya re o ne a le mosadi yo mogolo wa mohuta oo.

<sup>36</sup> Jaanong mohuta oo wa mosadi ke eng? Ke mosadi yo o tshelang ebile a dira boaka. Mme dikereke di dira boaka jwa semowa le ba—le batho. Lo a bona? Tsone di—tsone di... Baebele ke ena e e rutang Sena, mme ba dira segopa sa ditumelo tsa kereke le jalo jalo se se senang sepe se se amanang le Baebele. Mme, gonne, mona go batlile go le dingwaga di le masome a mabedi le *sengwe* ke ne ka ema gone fano mme ka botsa modiredi ope, ka nako epe, go tla le go tsaya... eseng buka ya lona e e balwang ya thuto, tumelo ya lona ya kereke, fela tlayang lo tseyeng Baebele, mo Leseding la Baebele, mme le E rurifatse gore e phoso. Lo a bona? Go ntse jalo.

<sup>37</sup> Mme ka ga dikganetsanyo, ba re, “Dikganetsanyo!” Ke ne ka soloftsa mo gontsi jaaka dituelo tsa dikgwedi tse pedi fa mongwe a tlaa mpontsha kganetsanyo e le nngwe mo Baebeleng. Ga e yo. O akanya gore e teng, fela ga e yo. Fa Baebele e Ikganetsa, ga e a siama gotlhellele, o ka se kgone go e dumela. Lefoko lengwe le lengwe le tlhotlheleditswe mme ga go na kganetsanyo mo Baebeleng.

<sup>38</sup> Jaanong kereke ya Protestante, mo lekgotleng la yone, e (go ya ka Lefoko la Modimo) gokagane le selo se se tshwanang le kereke ya Khatholike.

<sup>39</sup> Jaanong, ga ke na sepe kgatlhanong le batho ba Makhatholike. Bangwe ba ditsala tsa me tse di rategang thata, ba ba dutseng gone fano jaanong, ke ba ba godileng ba tswa mo bathong ba Makhatholike. Fano, bosigo jwa pele ga jo bo fetileng, fa ke ne ke neela molaetsa o o bogale ka Mowa o o Boitshepo, ka ga Moprotestante le Mokhatholike, Mokhatholike o ne a tsamaela gone fano fa aletareng mme a dumedisa seatla sa me. Bone ke batho ba nama go tshwana fela jaaka re ntse ka gone.

<sup>40</sup> O ka se kgone go buisanya le baperesiti ba Makhatholike, ka gore ga ba dumele Baebele ena gore ke Lefoko lotlhe. Ba re, “Ke kereke.” Re re, “Ke Baebele!”

<sup>41</sup> Mokhatholike a re, “Rona Makhatholike re ya kerekeng mme re a obamela. Lona Maprotestante lo nna ko gae mme lo bale Baebele.”

<sup>42</sup> Ke ne ka re, “Eya, lo ye kerekeng lo bo lo obamela, fela eng?” Moo ke selo se se latelang, lo a bona.

<sup>43</sup> Jaanong, fela Modimo ne a re O ne a le mo Lefokong la Gagwe. Mona ke Lefoko la Modimo mme ke a Le dumela. Nna

ke moobamedi wa Baebele. Leo ke lebaka le ke sa dumalaneng le Boprotestante le—le tsela ya—ya lekgotla fela la kereke, ka gore ba ruta dilo tse e seng Lefoko la Modimo. Jalo he ga ke kgone go kganelo go se dumalane. Ga ke lotlhane le bone; nnyaya, rra, bone ke bakaulengwe ba me. Mme ga ke lotlhane le bone, fela nna ga ke dumalane le bone ka gore ke tshwanetse ke tseye se Modimo a se buang mme ke letle sengwe le sengwe se sele e nne leaka. Lo a bona?

<sup>44</sup> Mme jaanong moo ke tomagano e . . . Mme jaanong Baebele e rile mosadi yona, kereke ya Khatholike, e e neng e tshwanetse go bidiwa, mo Baebeleng, Tshenolo kgaolo ya bo 17, “Seaka,” mme o ne a le, “MMAAGWE BAAKAFADI.” Mme re bona gore Baebele ne ya re *mosadi* o ne a emetse “kereke.” Jalo he fong fa a ne a na le barwadi ba ba leng baakafadi, go ne go ka se nne basimane; go ne go tlaa tshwanela go nna barwadi, jalo he e ne e tshwanetse go nna dikereke. Mme Boprotestante bo ne jwa tsalwa go tswa mo Bokhatholikeng.

<sup>45</sup> Mme jaanong se se latelang, sebatana . . . Kgotsa, selo se se latelang se sena se se buang:

### Ke se “setshwantsho sa sebatana” se se rayang?

<sup>46</sup> Ke—ke potso e e tlhakaneng le eo, mme motho yo o e boditseng o na le potso e e siameng. Ke eng se se dirang jaanong, fa . . . Baebele e ruta ka go itsheka gore kereke ya Khatholike ke se—sebatana. Baebele ne ya re *sebatana* se raya “thata.” A go ntse jalo? *Sebatana*, Baebele ya re *sebatana* se ne se raya “thata.” Mme *sebatana* e ne e le “Vatican City,” “tatelano ya maemo ya Khatholike.” Go siame. Mme, jaanong, eo e ne e le thata ya kereke e e neng e le sebatana.

<sup>47</sup> Fong kereke ya Protestante e tswile mo kerekeng ya Khatholike, mme ya ithulaganyetsa, thata e nnye. Moo ke setshwantsho.

<sup>48</sup> Fa go le sengwe . . . Fa sengwe se ne se dirilwe mo setshwantshong sa me, se ne se tlaa tshwanela go lebega jaaka nna. Fa sengwe se dirilwe mo setshwantshong sa kereke ena, se tlaa tshwanela go lebega jaaka kereke.

<sup>49</sup> Sengwe se ne sa dirwa, sebatana . . . sa dirwa setshwantsho sa sebatana sena, mo e neng e le Bolutere, Bomethodisti, Bobaptisti, Bopresbitheriene, Bomethodisti, *ditumelwana* tsotlhe tseo di bopegile ka mo lekgotleng mme tsa dira setshwantsho fela jaaka sebatana. Gone ke moo!

<sup>50</sup> Jaanong, “A o a bua fong, Mokaulengwe Branham, gore Makhatholike otlhe, Mamethodisti otlhe, le Mabaptisti otlhe ba ya . . . ?” Ga ke a bua seo.

<sup>51</sup> Go na le dikete le dikete masome a dikete tsa Bakeresete ba ba tsetsweng seša mo dikerekeng tseo. Fela, mo lekgotleng la bone, ba leka go ba kgoromeletsa ko tumelong ya kereke, mme

bone ga ba tle go go itshokela. Ke—kereke, fa e rulaganya, e tla fa tlase ga tumelo ya kereke.

<sup>52</sup> Mme ga ke na tumelo epe ya kereke fa e se Baebele. *Mona* ke Tumelo ya Modimo ya kereke, mme Mowa o o Boitshepo ke Mophutholodi wa Seo, mme O Go tlisa go tswa mo Leseding le le lengwe go ya go le lengwe. Efangedi e ke e rerang gompieno, fa ke tlaa tshela go bona dingwaga tse dingwe tse lekgolo, fa re tlaa dira, go tlaa nna le Lesedi le le ntsi. Fela kgapetsakgapetsa, Le tlhotse le tlaa.

<sup>53</sup> O ne o tlwaetse go pagama mo karaking ya dikgomo, rraagomogolo-golwane, fa a ne a ile go bona mmamogolo. Ntate o ne a ya go bona mma mo go T-Model. Fela jaanong re batlike re ya ka sefofane sa jete. Lo a bona, re tswelela pele; maranyane, go tswelela pele; thuto e tswelela pele; Efangedi, e tswelela pele. Mme Baebele ne ya re di tlaa dira, ne ya re, “Ba tlaa sianela kwa le kwa, mme kitso e tlaa oketseg.” Jalo he moo ke tomagano. Leo ke lebaka le go nang le . . .

<sup>54</sup> Dikereke tsa Maprotestante tsa makoko ke setshwantsho sa sebatana, ka gore yione e dirile lekoko fela totatota jaaka Bokhatholike bo ntse ka gone. Mme Modimo ga a ise a ko a laele Kereke ya Gagwe gore e rulaganngwe mo pakeng epe, fela o tlhotse a go kgala mo go bogalaka! Jaanong a lo a go tlhaloganya? [Phuthego ya re, “Amen.” —Mor.] Eseng batho; kereke!

<sup>55</sup> Fa ba leka go tlisa batho fa tlase ga le—lesedi la . . . Fano, go ka tweng fa batho ba ne ba leka go go dira gore o boele morago mme o simolole go siana siana mo karaking ya dikgomo? Wena o ne o sa tle go itshokela; re tshela mo pakeng e e botoka. Eo ke tsela e go leng ka yone kwa morago kwa. Fa mongwe a ne a leka go mpolelala, “Ao, selo se le nosi se o tshwanetseng go se dira ke *sena, sele*.” Ke tshela mo pakeng e nngwe! Nna . . . Moo ke bothata ka badiredi, ba tlholo ba lebile kwa morago.

<sup>56</sup> Fano, ramaranyane wa Mofora ne a re, mo go ko tlase ga dingwaga di le makgolo a mararo tse di fetileng, “Fa motho a ka ba a dira lobelo le le boitshegang la dimmaele di le masome a mararo ka oura, maatlakgogo a tlaa mo tlosa mo lefatsheng. Dimmaele di le masome a mararo ka oura!” Sentle, a o akanya gore maranyane a tlaa umakela morago ko go seo gompieno? Go kgakala gore go mne jalo! Nyaya, rra. Ba ne ba mo dira gore a tsamaye go ka nna dimmaele di le makgolo a ferabongwe kgotsa a le lesome ka oura. Eya, kgotsa nako tse dingwe mo setlhaheng lefaufau, mme fong ke dimmaele di le makgolo a le lesome le borataro ka oura. Mme se santse se mo isa ko pele!

<sup>57</sup> Maranyane a isitse motho kwa pele, kwa pele go feta, dilo tse dikgolo go feta ka tlhaloganyo ya gagwe go na le se . . . Mme seo ke selo se le esi se a nang naso, ke setlhare sa kitsi. Kgakala go feta ka fa badiredi ba mo tsereng ka Mowa wa Gagwe, e leng o o sa lekanyetswang. Fela fano ke se go leng sone. Maranyane

ga a lebe morago ko go se maranyane a se buileng dingwaga di le mmalwa tse di fetileng; maranyane a tsaya se ba nang naso jaanong mme a se sutisetse pele go nna sengwe se sele.

<sup>58</sup> Fela o botse moreri; “Sentle, re tlaa bona se Moody a se buileng ka ga Gone, re tlaa bona se Wesele a se buileng ka ga Gone.” Ga ke kgathale se ba se buileng ka ga Gone. Ke itse se Modimo a se buileng ka ga Gone *jaanong*. Mona ke Gone, mme ke santse ke senka mo go golo go feta! Ke gone. Leo ke lebaka . . .

<sup>59</sup> Baebele ne ya re, “Mewa e meraro e e itshekologileng e tswa mo molomong wa sebatana.” A lo a itse ke eng? “Mewa e e itshekologileng,” ne ya re, “jaaka digwagwa.” A lo kile lwa lemoga ka fa segwagwa se lebegang ka gone? Segwagwa se tlhola se lebile kwa morago, ga se nke se leba kwa pele; se leba kwa morago, se tlhola se leba kwa morago, se leba kwa morago.

<sup>60</sup> Fela ditshedi tse nnê tse di neng di na le ditlhogo tse nnê tse di farologaneng, mo go Esekiele, di ne di lebile kwa pele mme di ne di sa kgone go tsamaya ka santhago. Di ne di tsamaela kwa pele nako yotlhe. Gongwe le gongwe kwa di neng di ya gone, di ne di ya ka tlhamallo ko pele. Lo bona pharologanyo?

<sup>61</sup> Jaanong, moo ke tomagano e Boprotestante bo nang nayo le Bokhatholike.

<sup>62</sup> Jalo he wena o tlhola o bona Makhatholike phoso, fela “pitsa ga e kgone go bitsa ketlele e ‘ntsho.” Go ntse jalo.

<sup>63</sup> Ka re, “A o Mokeresete?”

<sup>64</sup> “Ke tlaa go dira gore o tlhaloganye gore ke leloko la kereke ya Baptisti.” Eya. Moo ga go na sepe se se amanang le Gone go na le go bua gore o ne o le leloko golo fano mo pola . . . polasing golo gongwe.

<sup>65</sup> “Goreng, ke leloko la kereke ya Khatholike.” Moo go santse go sa go dire Mokeresete. Go nna leloko la kereke ya Baptisti kgotsa Methodisti ga go go dire Mokeresete.

<sup>66</sup> Go na le tsela e le nngwe fela ya go nna Mokeresete. Lefoko *Mokeresete* le raya “Jaaka-Keresete.” Mme o ka se kgone go go dira, o ka se kgone go go dira ka bowena, ga go tsela epe gotlhelele e o ka kgonang go go dira. O tshwanetse o itebale, o swe mo go nneng wena, mme o letle Keresete a tsene mme a tshele Botshelo jwa ga Keresete mo go wena.

<sup>67</sup> “Ntleng le fa motho . . .” Se Jesu a se buileng ke sena, “Ntleng le fa motho a tsalwa ka Mowa le metsi, ga a kitla a tsena ka gope mo Bogosing.” A kana ke Mokhatholike, Momethodisti, Mobaptisti, kgotsa le fa e le eng, o tlaa tshwanela go kolobetswa mo metsing gore o itshwarelw maleo a gago mme o amogele kolobetso ya Mowa o o Boitshepo, kgotsa o timetse. Moo ke Lefoko le e Leng la ga Jesu. Jalo he jaanong fa o le Momethodisti, mme o amogetse kolobetso ya Mowa o o Boitshepo, o kolobeditswe mo metsing, Jesu o rile o tlaa tsena

ko Legodimong. Fa o le Mokhatholike mme o dirile selo se se tshwanang, o tlaa tsena ko Legodimong.

<sup>68</sup> Fela fa o tshwareletse fela mo tumelong eo ya kereke ya Khatholike, kgotsa kereke ya Methodisti, kgotsa ya Baptisti, o sants e timetse. Mme leo ke lebaka le re nang le seemo mo lefatsheng, se re nang naso gompieno, ka gore batho ba fela totatota . . . Ba re, “Moo go kgatlhanong le tumelo ya me.”

<sup>69</sup> “A o dumela mo phodisong ya Selegodimo?”

<sup>70</sup> “Moo go kgatlhanong le tumelo ya me.” Moo go kgatlhanong le kereke ya gago; tumelo ya kereke ya kereke ya gago e dirile gore seo se diriwe, lo a bona, o tshwanetse o dire se kereke e se buang. Mme fong wena o goelelela Mokhatholike; moo ke selo se se tshwanang se ba se dirang. Mme moo ke sebatana le setshwantsho sa sebatana! Mme Baebele ya re, “Le fa e le mang yo o le tsereng o ne a ka se kgone go tsena mo Bogosing jwa Legodimo, fela ba tlaa lelekelwa kwa dintšweng le baloing, le jalo jalo, mme ba tlaa bogisiwa ka molelo le sebabole, mo pele ga Baengele ba ba boitshepo le Kwana, ka metlha le ka metlha.” Tswaya mo go gone, tsala! Siamisa le Modimo! Ee, rra.

<sup>71</sup> Mme jaanong mpe ke tseyeng ena. Sentle, re tlaa di ntsha mo tseleng. Jaanong, mongwe o ne a mpotsa gompieno; makgetlo a le mabedi kgotsa a le mararo ke ne ka go botswa.

**27. Mokaulengwe Branham, go bueng ka ga “letshwao la sebatana,” a ga o dumele gore ba tlaa kwala nomoro mo tlhogong ya gago, kgotsa ba kwale sengwe mo seatleng sa gago? Nnyaya, rra!** O sekwa wa ba wa solo fela seo.

<sup>72</sup> E tlaa bo e le ngalo! Go tlhomame! “Ga go motho yo o ka rekang kgotsa a rekisang fa e se a le leloko la bokopano jwa dikereke.” Moo ke nnete. Jaanong, go tlaa tla jaaka kopano, go dira selo se go nna mo bokopanong, go se tlisa golo ka mo bodumeding jo bo dirilweng seoposengwe mo bokopanong. Tshwayang lefoko la me, ga go kgakala! Lo tlaa go bona, gone go fela ka kwa ga kgogometso.

<sup>73</sup> Lebaka le o sa itseng dilo tsena, o fano mo gae nako yotlhé. Ntate leng ka kwa ko mafatsheng ana kwa Bokhatholike bo nang le taolo gone, nako nngwe, mme lo boneng se se diragalang. Mokaulengwe, ba ba bolelela gotlhe se ba tshwanetseng go se dira le se ba sa tshwanelang go se dira.

<sup>74</sup> Mme fano Baebele e bua gore United States, re e tsere ka seporofeto, e tlhatloga jaaka *kwana*, “kgololesego ya bodumedi,” mme ka tlhamallo ba ne ba kopanya dilo tseo ga mmogo, mme e ne ya bua jaaka kgogela ya bo e diragatsa thata e tshwanang e kgogela e neng e na nayo fa pele ga yone. Moo ke U.S.A.! Go ntse jalo.

<sup>75</sup> Modiredi o ne a nthaya a re e se bogologolo, tsala ya me, ne a re, “Mokaulengwe Branham, Modimo ga a kitla a letlelela United

States e wa, ka ntlha ya motheo wa borraabomogolo, e thailwe mo bodumeding.”

<sup>76</sup> Ke ne ka re, “O ne a lettelela Bajuta; go tlhomame ba ne ba thopiwa, mme ba ne ba na le boemo jo bo botoka go feta go na le jo re neng re na najo.” Go ntse jalo. Modimo ga a tlhomphemang-mang jwa kokomana nngwe e e fetileng; wena kana o tsamaya ka mola kgotsa o ko ntle ga Bogosi, ke gotlhe. Ka nnete! Moo go makgwakgwa thata, fela moo go go siametse. Go ntse jalo. Ke Lokwalo. Mme re na le, rona . . .

<sup>77</sup> Bothata jwa teng ke gore, gompieno . . . Bangwe ba lona mabutswapele lo itse sena. Re na le boefangedi jo bontsi thata jwa Hollywood. Go ntse jalo. Mo gontsi thata ga seo ka tlhatlharuane e ntsi thata le go tswelela, mokgabo o montsi le sengwe le sengwe jalo, le go ipua ka boipelafatsa, le jalo jalo; le, “Ke mang yo o tlaa emang mme a amogele Keresete e le Mmoloki wa sebelebele sa gagwe? Modimo a go segofatse, mokaulengwe, wena o ya Legodimong gone jaanong.” Moo ke leaka! Moo ke leaka!

<sup>78</sup> “Ntleng le gore motho a tsalwe seša!” Mme fa a tssetswe seša, Tshegofatso e e tshwanang e e neng ya tla kwa go ena e tlaa tla kwa go ena fano. Mme re raletse seo, go boeleta le go boeleta, le go ralala Dikwalo mo bekeng e e fetileng. Mme ra fitlhela gore mo bathong ba kwa Botlhaba, nako e Mowa o o Boitshepo o neng o fologela mo Bajuteng, ba e neng e le batho ba kwa botlhaba, batho ba kwa Botlhaba, Mowa o o Boitshepo o ne wa fologa ka ditshupo tse dikgolo le diponatsho. Baebele ne ya re go tlaa nna le go batlile go nna le na—nako kwa e leng gore e ne e sa kgone le e leng go bolela, jaaka lefifi kgotsa motshegare. E ne e le mohuta wa letsatsi le le maru, go tswelella kgakala go fitlhela karolong ya bofelo ya maitseboa. Mme fong letsatsi le tlaa tswa metsotso e le mmalwa ko bofelong, maitseboa. “Go tlaa nna Lesedi mo maitseboeng.” A go ntse jalo? Sente, bao ke batho ba kwa Bophirima, Baditšhaba, ba amogela Mowa o o Boitshepo o o tshwanang o Bajuta ba o amogetseng kwa morago kwa, ka ditshupo tse di tshwanang le diponatsho. Ke gone.

<sup>79</sup> Mme, jaaka go sololetswe, batho, lefatshe le ile go go bitsa “segogotlo, yo o pekang mo tlhogong.” Baebele, Jesu ne a re ba tlaa go dira. Lo batho ba ba faphegileng, mme lo seeng ka gore Gone go farologane thata.

<sup>80</sup> Ke go lemoga mo boagisanying jo e leng jwa me kwa gae, batho koo. Bona, le e leng bongwanake ba bannyne; re leka go ba tshola ba le phepa ebile ba tshela ba siame jaaka ba ka kgonang ka gone, fela wena o kgona go ela baagisanyi tlhoko ba dira pharologanyo mo baneng. Lo a bona? Ba dira pharologanyo.

<sup>81</sup> Mme ke a itse, ke na le tsela ya go itse dilo (mme lo itse seo, lo go bone mo bokopanong), lo itse gore badisa phuthego ba motse ba re, “Sente, jaanong, Billy ke mosimane yo o siameng, ga re na

sepe kgatlhanong nae. Fela, lo a bona, moo ke fela setlhophapha se se farologaneng ga nnye sa batho go na le se re leng sone.” Ke leboga Modimo! Go ntse jalo. Ke leboga Modimo! Moo ke Letshwao. Ke leo Letshwao le re buang ka ga lone.

<sup>82</sup> Lebang, bosigo jo bo fetileng, fa Mowa o o Boitshepo o ne o bolelela pele, dingwaga di le makgolo a ferabongwe pele ga Bajuta ba ne ba amogela Mowa o o Boitshepo, mme wa ba bolelela se go tlaa nnang sone. “Kurwana ya enke, monna ka kurwana ya enke ya mokwadi ne a feta mo gare ga Jerusalema mme a baya letshwao mo phatleng ya bone.” A go ntse jalo? Ne ya bua ka ga Gone pele ga kerek e ne e attholwa ke Modimo. Mme Tito o ne a dikaganyetsa dipota tsa Jerusalema, ka A.D. 96, mme a fisa motse. Mme go ne go sena lentswê le le lengwe le le neng le setse mo godimo ga le lengwe, go ya ka seporofeto. Mme, gompieno, selo se le nosi se ba nang naso se setse sa tempele ke lemota la kgale le ntse foo kwa ba kokoantseng mantswê gone, mme go gotlhegile gore go nne borethe kwa Bajuta ba lelang ebile ba bokolelang gone koo ko Lemoteng la Pokolelo, selo se le nosi se se setseng sa tempele. Mme Moseleme wa Omar o eme fa lefelong le le tshwanang.

<sup>83</sup> Mme Jesu ne a re, “Jaaka go builwe ke moporofeti Daniele; Fa lo bona se se ferosang dibete se se swafatsang se eme mo felong ga Boitshepo,” fong Ena o segetswe, mo masakaneng, “(mpe yo o balang a tlhaloganye.)” Lo a bona? Go ntse jalo. Gone ke moo. Mme O ne a bolela gore ke malatsi a le kae . . . makgetlo a go tlaa nnang gone go fitlhela Baditshaba ba tlaa bo ba . . . tebalebelo e kgaotswe; ba gatakile dipota, fong Modimo o tlaa boela ko Bajuteng. Mme rona re gone kwa nakong eo! Bajuta ke bana ba boa, ka dikete, mo dingwageng tsa bofelo di le mmalwa. Mme lo itse ka fa re neng ra go lebelela ka gone bosigong jwa maabane, ka fa Lokwalo ka boitekanelo . . . fela jaaka go bala koranta, mme go tlhaloganyega motlhofo go feta ka gore o nna le tlhaloganyo e ntsi go tswa mo go Gone ka nako eo.

<sup>84</sup> Fela, le fa go ntse jalo, Letshwao le le neng la bewa mo tlhogong ya bone le ne le sa kwalwa ka enke mo nameng. A le ne le le jalo? E ne e le eng? Kolobetso ya Mowa o o Boitshepo. Mme Letshwao le le ileng go nna la motlha ona wa bofelo ke eng? Baebele ne ya re, “Sekano sa Modimo e ne e le kolobetso ya Mowa o o Boitshepo, sa batho mo motlheng wa bofelo.” Jaanong ga go na . . . Baefeso 4:30, “Ke gone ka moo se hutsafatseng Mowa o o Boitshepo wa Modimo o ka one lo kaneletsweng go fitlheleng letsatsing la thekololo ya lona.” Baebele e a bua. Mme Baefeso 1:13 e bua selo se se tshwanang, mafelo a mangwe a le mantsi, gore “Mowa o o Boitshepo ke sekano sa Modimo.”

<sup>85</sup> Sekano ke eng? Sekano ga se kake sa bewa mo go sepe go fitlhela se feletse. Malutere a ne a sa kanelelwa, motlha wa tebalebelo ya letlhogonolo o ne o sa wediwa; ba ne ba rera tshiamiso. Mamethodisti ba ne ba sa kanelelwa. Ke goroga kwa

potsong fano; re tlaa goroga kwa go yone moragonyana—nyana. Ne ba sa kanelelwa, ka gore go ne go sa wediwa. Fela kolobetso ya Mowa o o Boitshepo ke phetso ya ditiro tsa Modimo!

<sup>86</sup> O ne a re “Go na le ba le bararo ba ba supang ko Legodimong: Rara, Morwa, le Mowa o o Boitshepo, mme boraro jona ke Bongwefela.” O ka se kgone go nna le Rara ntleng ga Morwa, Morwa ntleng ga Mowa o o Boitshepo, bona ba Bangwefela.

<sup>87</sup> O ne a re, “Go na le tse tharo tse di supang mo lefatsheng: metsi, Madi, Mowa, mme tsone ga se bongwefela fela di dumalana ka bongwefela,” ke lona bao, “ka go kanelelwa go le gongwe mo go feleletseng.” Tshiamiso mo tlase ga Lutere, metsi; boitshepiso ka Madi.

<sup>88</sup> Tshiamiso e ne e le Baroma 5:1, “Ke gone ka moo re siamisitswe ka tumelo re nang le kagiso le... Modimo ka Morena wa rona Jesu Keresete.” Tshiamiso ka tumelo!

<sup>89</sup> Boitshepiso ka Madi, Bahebere 13:12 le 13, “Jesu o ne a boga kwa ntle ga kgoro gore A tle a itshepise batho ka Madi a e Leng a Gagwe.”

<sup>90</sup> Luka 24:49, “Bonang, Ke romela tsholofetso ya ga Rrê mo go lona, fela lo leteng mo motseng wa Jerusalema go fitlhela lo nonotshwa ka Thata go tswa kwa Godimo.” Ditiro 1:8, “Morago ga mona Mowa o o Boitshepo o sena go tla mo go lona, fong lo tlaa nna basupi ba Me mo Jerusalema, Judea, Samaria, le ko dikarolong tse di kwa tennyanateng tsa lefatshe.” Kolobetso ya Mowa o o Boitshepo e ne e tshwanetse go nna teng go fitlhela Jesu a boa gape! “Lobakanyana mme lefatshe ga le sa tlhole le Mpona, le fa go ntse jalo lona lo tlaa Mpona gonnie Ke tlaa bo ke na le lona, le e leng mo go lona, go ya bokhutlong jwa lefatshe; lo dira di—dilo tse Ke di dirang, lo tlaa di dira le lona.” Ka Mowa wa Gagwe o dira ka Kereke! O ne a re, “Lo tlaa tlaopiwa.” Ne a re, “Ba ne ba bitsa Nna, Mong wa ntlo, ‘Beelsebule,’ ‘kgosi ya didupe,’” ne a re, “ke go le gontsi thata jang ka fa ba tlaa bitsang bone ba ntlo ya Gagwe jaanong?” Ne a re, “Lo sego mogang motho a tla buang mehuta yotlhe ya dilo ka ga lona, ipeleng mme lo itumeleng mo go feteletseng, ka gore tuelo ya lona e kgolo ko Legodimong; gonnie ba ne ba bogisa baporofeti jalo ba ba neng ba le fa pele ga lona.”

<sup>91</sup> Moo ke Lekwalo, lo a bona. Gone ke moo. Jalo he, lo a bona, o tshwanetse fela o nne le Sone, tsala. Jaanong o tshwanetse o dire maikgethelo a gago; wena o moikgethedi yo o gololesegileng.

<sup>92</sup> Fela moo ke tomagano le kereke ya Protestante le kereke ya Khatholike. Ga mmogo tsone tsoopedi ba, go ya ka Baebele... ba ba tshwarelelang fela mo kerekeng; eseng Jesu, jaanong, mo kerekeng. Batho mo kerekeng ba ba tshwarelelang mo go Jesu Keresete ebile ba rapela Modimo gore a bulle tsela mme a ba dire... a ba neye Lesedi, motho yoo o bolokesegile, ga ke kgathale gore ke kereke efeng e a leng mo go yone. Go ntse

jalo. Fela fa a tshwareletse fela mo lekokong la gagwe, o tsere letshwao la itimokanyo, mo go tsayang lefelo la kolobetso ya Mowa o o Boitshepo. Kganetsanyong! Mme Mokhatholike le Moprotestante, boobabedi ka go tshwana, Baebele ne ya re, "O ne a le seaka; ba ne ba le baakafadi, barwadie." A moo go itshekile jaanong? Go siame.

**28. Jalo he o o Boitshepo . . . A Mowa o o Boitshepo o santsane o neelwa ka go bewa ga diatla? Barutwa ba ne ba dira sena, Petoro, Paulo, le jalo go tswelela, mme a go santse go kgonega? Paulo o ne a O amogela ka mokgwa ona.**

<sup>93</sup> Ee, mokaulengwe yo o rategang, kgaitzadi, le fa e le mang yo o kwadileng mo—mokwalo. Mowa o o Boitshepo go sena pelaelo epe o tshwanetswe o amogelwe ka go bewa ga diatla.

<sup>94</sup> Jaanong, batho ba le bantsi ba mpitsa . . . jaaka ke tshwailwe ke le Mopentekoste, ba re ke ne ke le Mopentekoste. Ga ke ise ke nne leloko la lekgotla la Pentekoste. Nna gotlhelele ke gololesegile mo makgotleng otlhe, mme ka thuso ya Modimo ke ikaelela go nna ka tsela eo, ka gore nka ema gone mo phatlheng mme ke re, "Re bakaulengwe! Tlaya kwano, a re tle re ntshetsane mabaka ga mmogo."

<sup>95</sup> Erile lantla ke ne ke simolola kwa morago koo, ka letlhogonolo la Modimo . . . Mme lona batho fano, le bakwaledi ba me le bone ba ba dutseng fano ba itse, Nka nna mo kamanong le batho ba le didikadike di le lesome, kgotsa go feta, mo lefatsheng gompieno. A lekgotla le le ka simololwang! Lo a bona? Go ntse jalo. Fela ga ke batle lekgotla, gone go kgatlhanong le Baebele. Ke leka bojotlhe jwa me go dira gore batho ba bolokesege ba ba leng mo lekgotleng. Selo ke seo. Mme tlhotlheletso efeng e Morena a e nneileng mo bathong, nna ka tlhomamo ke tlaa e dirisetsa kgalalelo ya Gagwe mo boemong jwa go e baya mo lekgotleng lengwe. Ke tlaa e baya mo go Jesu Keresete kwa e leng ya gone. Ga go lekgotla le le ka go bolokang; go tsaya Madi a ga Jesu Keresete.

Fela jaanong, mo go beweng diatla, jaanong, ke ile go farologana le . . .

<sup>96</sup> Jaanong, lona batho ba Mapentekoste ba ba rategang, jaanong lo seka lwa ntšakgalela. Fela jaanong fa o tla mo lefelong go re o re, "Re tlaa ya go letela Mowa o o Boitshepo," a lefoko le le dirisitsweng mo Pentekosteng!

<sup>97</sup> Mme ke tlaa bua sena ka se . . . ke sa utlwise maikutlo a lona botlhoko. Kemo nokeng e kgolo go feta thata e ke nang nayo mo botlhabantlong ke batho ba Mapentekoste, ka gore ba dumela molaetsa wa phodiso ya Semodimo le thata ya Modimo. Botlhe ba bone ba a O sinallela.

<sup>98</sup> Fela batho ka bonosi fela go tswa mo kerekeng, ba ba tlhomamiseditsweng pele ko Botshelong jo Bosakhutleng, ba tlaa tla. Ke gotlhe. Fela bao ba ba seng jalo, ga ba kake ba tla; mme

Modimo o buile jalo, ne a re, “Ba ne ba tlhomamiseleditswe pele kwa tshekisong.” Ga a eletse gore ope a nyelele, fela, a leng Modimo, O bone gore ba tlaa Go kgala. Jalo he moo ke—moo ke gotlhe, O ne a go bonela pele. Mme seo ke se kitsetsopole ya Modimo e leng sone, go bona dilo tseo. Mme O ne a bolelela pele Kereke fela kwa e tlaa bong e eme gone go fitlha motlheng one ona. Mme Modimo o go itsile go tswa tshimologong. Pele ga motheo wa lefatshe, O itsile gore kereke e tlaa nna fela ka tsela e e leng ka yone gompieno. O itsile pele ga motheo wa lefatshe gore ke tlaa bo ke eme mo felong mona ga therelo bosigong jono. Ena ke Modimo; O itse bokhutlo go tloga tshimologong.

<sup>99</sup> Jaanong, jaanong, batho ba Mapentekoste ba rutile... Jaanong, nna kooteng ke tlaa amogela mo go ntsi ka ga Sena, fela ke tshwanetse ke nne boammaaruri fa ke tshwanetse go tla mo Lefokong. Ga go na selo se se jaaka “bokopano jwa go leta.” Lo ntse lo le mo phosong. Go ema o letile ga go reye “go rapela.” Go ema o letile go raya go “leta.” Morago ga tlthatlogo, morago ga Jesu Keresete... papolo, tlhapiso ya botshabelo. Le morago ga Letsatsi la Tetlanyo, tsogo... Letsatsi la Tetlanyo, fa A ne a bolawa, mme fong ke malatsi a le masome a manê go fitlheleng tlthatlogo, mme go tloge go nne Pentekoste. Lefoko pentekoste le raya “masome a matlhano,” go ne go raya malatsi a le masome a matlhano morago ga go neelwa ga Tetlanyo.

<sup>100</sup> Mme fong morago ga Tetlanyo e sena go newa, sengwe le sengwe se ne sa tshwanela go tswa se itekanetse, go ya ka lokwalo, go ya ka ga mo lefatsheng, sengwe le sengwe fela jaaka Modimo a ne a bua. Mme Pentekoste, e ne e le nako ya jubile, fa ba ne ba tlisa maungo a ntlha a thobo mo teng mme ba nna le jubile.

<sup>101</sup> Jaanong, maungo a ntlha a ke—a Kereke, Kereke ya Mowa o o Boitshepo, Kereke e e neng e tshwanetse go nna teng dingwaga tsena di le dikete tse pedi go fitlhela Jesu a tla, leungo la ntlha le le neng la tla kwa Pentekoste. E ne e le malatsi a le lesome pele ga nako ya Pentekoste; e ne e le malatsi a le masome a manê morago ga go ntlafadiwa, morago ga go bolawa ga setlhabelo, go fitlheleng tlthatlogong ya ga Jesu Keresete. O ne a re, “Yaang golo kwa Jerusalema mme lo leteng go fitlhela lo nonotshwa ka Thata go tswa kwa Godimo.” Ditiro 1...

<sup>102</sup> Ditiro 2, “Mme erile Letsatsi la Pentekoste le tlife ka botlalo, ba ne ba le mo bongwefeleng jwa pelo, mo lefelong le le lengwe. Mme ka tshoganetso go ne ga tla go tswa Legodimong mosumo jaaka phefo e e maatla e e sumang, ya tlatsa ntlo yothle kwa ba neng ba dutse gone. Mme botlhe ba ne ba tladiwa ka Mowa o o Boitshepo, mme ba simolola go bua ka diteme tse dingwe, jaaka Mowa o ne o ba naya puo.”

<sup>103</sup> Mme fong lefatshe la bodumedi, ka ko ntle, dikereke tse ditona tsa othodokse, ne tsa tla mme tsa bona batho bao ba

thetheekela ebile ba itshwere jaaka batho ba ba tagilweng. Mme ba ne ba tla ba bo ba tshega ebile ba sotla ka bone, ne ba re, “Lebang segopa sena sa Bagalelea! Botlhe ba tagilwe!” Lo bona go se tlhaloganye sentle?

<sup>104</sup> Mme ko tsaleng ya me ya Mokhatholike, Marea wa kgarebane yo o sego o ne a na le bona. Mme fa Modimo a ne a ka se mo letle a tle ko Legodimong ntleng ga go amogela Mowa o o Boitshepo le gore a nne jalo, a o akanya gore o tlaa goroga koo o le sepe se se ko tlase, kgaitsadi? Nnyaya. Jalo he a re tlogeng mo pitseng ya rona e e kwa godimo, a re tlogeng.

<sup>105</sup> Lo seka lwa tsaya tsia se lefatshe le tshwanetseng go se bua. Lebang se Modimo a tshwanetseng go se bua! Mona ke Lefoko la Modimo. Re tshwanetse re go age go ya ka sekaelo *sena*, ka gore O ne a raya Petoro a re, “Mo lefikeng leng Ke tlaa aga Kereke ya Me mme dikgoro tsa dihele ga di tle go fenza kgatlhanong le Yone.” Sengwe le sengwe se sele se tlaa diragala. Go ne go supegetsa gore dikgoro tsa dihele di tlaa nna kgatlhanong le Yone, fela ga di tle go fenza. Mme batho ba akanya gore ba ka E emisa? O ka emisa letsatsi ka bonako go feta. Go ntse jalo. O ka se kgone go E emisa. Modimo o E laoletse go tswelela pele.

<sup>106</sup> Fano erile lantlha ke sokologa, le e leng mmê wa me yo o *tlhomolang pelo* ko morago koo ne a gopotse gore ke ne ke tsenwa. Matsale ne a re, “O tshwanetse a romelwe golo ko kagong ya ditsenwa.” Bareri ba motse ba ne ba re, “O tlaa tuka a fele mo bogautshwaneng thata.” Ke ntse ke tuka lobaka lo lo leelee. Ke go tuka ga semowa, mo go botoka nako yotlhe. Goreng? Ga go kake ga tuka go fele, Ke Modimo! Mo boemong jwa go tuka go fele, Go gasame go dikologa lefatshe jaanong.

<sup>107</sup> Fela selo se se tshwanang se A se buileng fa ke ne ke kolobetsa gone golo fano mo Nokeng ya Ohio, ba le bantsi ba lona lo ne lo eme foo, dingwaga di le masome a mabedi le boraro tse di fetileng, gone ko Nokeng ya Ohio. Lesedi leo, Moengele, ne a fologela gone kwa re neng re le gone, mme a re, “Jaaka Johane Mokolobetsi a ne a rometswe go nna moeteledi pele wa go Tla ga ntlha ga Jesu Keresete, Molaetsa wa gago o tlaa tlisa go Tla ga bobedi ga Jesu Keresete.” Mme go go dirile. Gone ke... Ga a ise a tle ka nako e, fela lebang se go se dirileng, go aname le lefatshe, go dikologa. Lo a bona? Mme gompieno jaanong, akanya fela, mme ma—maiteko a a tswetseng pontsheng, go nnile go na le didikadike jaaka go buiwa.

<sup>108</sup> Le e leng *Sunday Visitor* ya Khatholike e ne ya bua ka ga gone, ka ga gore ke didikadike di le kae tse di neng tsa tla mo tikologong, fela ka ntlha ya maiteko.

<sup>109</sup> Ba bangwe ba a utlwa, ba re, “Moo ke Boammaaruri! Ke ipaakanyeditse go ineela ke tlogele gone jaanong, dilo tsena tsa lefatshe, mme ke ye go rera Efangedi ya mmatota.”

<sup>110</sup> Mme leo ke lebaka le ba re bitsang “Efangedi e e tletseng,” ba tlaopa Efangedi e e tletseng. Fela, mokaulengwe, ga ke batle halofo ya sepe, nna . . . e tshwanetse e nne selo sotlhe, mo go nna. Fa karolo ya Yone e siame, yotlhe ya Yone e siame. Efangedi e e tletseng!

<sup>111</sup> Jaanong, lemogang, Mowa o o Boitshepo ne wa boela koo. Batho ba Mapentekoste ba ne ba leta, “Mme foo ka tshoganetso go ne ga tla modumo go tswa Legodimong jaaka phefo e e maatla e e sumang, ne ya tlatsa ntlo kwa ba neng ba ntse gone.”

<sup>112</sup> Ga go nako e le nngwe e ba kileng ba tshwanela go leta morago ga foo. Erile Petoro a santse a bua Mafoko ana le Baditshaba, Mowa o o Boitshepo o ne wa fologela mo go bone, le e leng pele ga ba ne ba kolobetswa. A go ntse jalo? Fa, Ditiro 10:49 . . .

*Fela erile Petoro a santse a bua mafoko ana, Mowa o o Boitshepo o ne wa fologela mo go . . . bao ba ba utlwileng lefoko.*

*Mme bone ba thupiso . . . ba le bantsi jaaka ba ba neng ba tlide le Petoro ba ne ba maketse, ka gore . . . mo Baditshabeng . . . go ne go tsholletswe neo ya Mowa o o Boitshepo.*

*Gonne ba ne ba ba utlwa ba bua ka diteme, ebile ba godisa Modimo. Fong Petoro ne a re,*

*A motho a ka kganeli metsi, ka e le gore bana ba tshwanetse . . . ba amogetse Mowa o o Boitshepo jaaka re dirile kwa tshimologong?*

*Mme o ne a emaema a bo a ba kolo- . . . a ba laela gore ba kolobetswe ka leina la Jesu Keresete! . . .*

<sup>113</sup> Go ntse jalo; ga go na go leta, ga go na go ema o letile. Tsela ya boapostolo, Modimo o ne a sena molao o o tlhomilweng; fa pelo e tshwerwe ke tlala, O tlala go naya se o tshwerweng ke tlala ya sone. Fa o batla Mowa o o Boitshepo, O ka fologela mo go wena gone jaanong.

<sup>114</sup> Petoro, fa a ne a ya golo koo go rera, Petoro o ne a na le dilotlele tsa Bogosi. Ke na le potso go tsena mo go seo mo metsotsong e le mmalwa. O ne a na le dilotlele tsa Bogosi. O ne a Bo bulela ntlo ya ga Khoneliase. O ne a Bo bulela, golo ko Basamarieng, o ne a Bo bulela ka kwano; fela gakologelwa gore Filipo o ne a fologetse koo mme a ba reretse ebile ne a ba kolobeditse ka Leina la Jesu Keresete, mme Petoro ne a fologa a bo a baya diatla mo go bone. Mme, jaanong, o ne a direla moloi yoo sengwe, golo koo . . . Ba ne ba na le Simone wa moloi, ne a re, “Ke tlala go naya madi mangwe, go nnaya Neo eo, gore le fa e le mang yo ke bayang diatla tsa me mo go ene a amogelete Mowa o o Boitshepo.” A go ntse jalo? Sengwe se ne sa diragala! (Eseng bangwe ba bobishopo mogolwane bana ka kholaraya bone e

tlhanololetsweng ko morago, ba tle gaufi mme ba beye diatla mo go bone, ne ba re, “Ke go naya tshegofatso ya seapostolo.”) Sengwe se ne sa diragala fa Petoro a ne a baya diatla tsa gagwe mo go bone; le le fa ba dira ka nako e.

<sup>115</sup> Ke ba bone ba wa fela jaaka dints i jalo, jaaka Mowa o o Boitshepo o ba ama, ka go bewa ga diatla. Ee, moo ke thu—thuto ya boapostolo ya go baya diatla. Modimo a go segofatse. Fa o farologane ganny le seo, nkwalele fela mokwalo bosigong jwa ka moso. Go siame.

## **29. Fa bobedi go tswa mo borarong jwa batho ba lefatshe ba utlwile...ba ise ba utlw Efangedi ka nako e, Lefoko la Efangedi, ke mo go kae mo...**

Ke kopa maitswarelo. Go kwadilwe ka enke, mme ke ntse ke huhula fano mme go eleletse mo go yone. A re boneng.

**Fa bobedi go tswa mo borarong jwa batho ba lefatshe ba ise ba utlw Efangedi, Morena wa rona a ka tla jang jaanong, e leng gore ba ne ba sa utlw Efangedi, bobedi go tswa mo borarong jwa bone?**

Sentle, moo go jalo totatota. Ke tlaa lo bolelala se ke se akanyang.

<sup>116</sup> Fano e se bogologolo, fa Ngaka Reidhead, Tautona ya Sudan Mission, e kgolo go gaisa thata e e tletseng...boapostolo jo bogolo go gaisa thata...Nnyaya, intshwareleng. Thomo e kgolo go gaisa thata ya motheo mo lefatsheng, Sudan Mission. Ngaka Reidhead, ka digarata di le dints i thata go fitlhela a ne ebile a sa itse gore ke digarata di le kae tse di neng di le mo go ene, a ne a tla ko ntlong ya me golo koo, go le ga nnye mo go fetang ngwaga le dikgwedi tse thataro tse di fetileng. Mme a ema mo ntlong ya me, ene le Hyman Appleman yona, modiredi yona wa Mobaptisti yo o amogetseng Mowa o o Boitshepo jaanong mme a rera golo ko Mexico. Mme o ne a tla ko ntlong. O ne a re, “Mokaulengwe Branham,” ne a re, “a o berekisana le Mapentekoste?”

Mme ke ne ka re, “Ee, rra.”

Mme o ne a re, “Ke nna Ngaka Reidhead.”

Ke ne ka re, “Ke itumelela go go itse. A o tlaa tsena?”

O ne a re, “Ee, rra.”

<sup>117</sup> O ne a dula fatshe, a re, “Ke batla go go botsa sengwe.” Ne a re, “Ke tlhaloganya gore o ne wa tshwa elwa mo kerekeng ya Baptisti.”

<sup>118</sup> Ke ne ka re, “Go ntse jalo.” Ke ne ka re, “Ke ne ka tswa mo go yone,” ke ne ka re, “ka gore ke ne ka se kgone go itshokela seo. Ke—ke dumela go rera se Baebele e se buang, eseng se kereke ya Baptisti e se buang. Mme ga ke na sepe kgatlhanong le kereke ya Baptisti, bona ba tshwanakana fela le kereke epe e sele.” Mme ke ne ka re, “Ke tswile mo go yone gore ke kgone go gololeseg.”

O ne a re, “Sentle, jaaka go sololetswe, o a itse gore re Mabaptisti.”

Mme ke ne ka re, “Ee, rra.”

<sup>119</sup> Mme o ne a re, “Ke batla go go botsa sengwe. Ga tweng ka ga kolobetso ena ya Mowa o o Boitshepo?” Ne a re, “Ke ile ka nna mo teng mme ka ba bona ba ragaka ditilo le go gataka le go goelela le go tswelela.”

<sup>120</sup> Ke ne ka re, “Ke bone gotlhe moo, le nna.” Fela ke ne ka re, “Mokaulengwe, fa morago ga gone gotlhe, go na le mo go leng ga mmannete ga kolobetso ya Mowa o o Boitshepo.”

<sup>121</sup> Mme o ne a re, “Mokaulengwe Branham, a nka O amogela?” O ne a re, “Ke na le digarata di le dintsi thata tsa morago ga digarata tsa ntlha!” O ne a re, “Nna ke Ngaka, nna ke sena, ke na le Ph.D. ya me, ke na le Garata ya me ya Ntlha, ke na le mohuta mongwe le mongwe wa digarata tse e leng tsa go tlottiwa ke sa di ithutela go tswa gongwe le gongwe mo ditshabeng, le dilo tse di jalo,” ne a re, “mme Jesu Keresete o kae?”

<sup>122</sup> Ke ne ka re, “Sentle, mokaulengwe, O gone fano mo kamoreng.”

<sup>123</sup> O ne a re, “Ke ne ka ema mme ka bua le Lemoselleme le le boineelo thata, le le neng le fetsa go rutega mo Amerika, mme ke ne ka re, ‘Gana moporofeti wa gago yo o suleng mme o amogele Morena Jesu yo o tsogileng.’ O ne a re, ‘Rra yo o pelonomi, ke eng se Morena Jesu wa gago yo o tsogileng a ka se ntirelang go feta se Mohamete wa me a ka se dirang?’ Ne a re, ‘Bone boobabedi ba kwadile Dibaebele, re a go dumela.’ Ne a re, ‘Bone boobabedi ba sole.’ Mme ne a re, ‘Mme bone boobabedi ba ne ba sololetsu botshelo morago ga loso, mo go rona, mme re a go dumela.’”

<sup>124</sup> O ne a re, “Ao, fela, o a bona,”” ne a re, “rona Bakeresete re na le boipelo.”

<sup>125</sup> “Ne a re, ‘Le rona re jalo.’ Ne a re, ‘Nka ntsha fela saekholoji e ntsi jaaka lo kgona.’” Mme go ntse jalo. “O ne a re, ‘Sentle, leba, Mohamete wa rona . . . Lo bolela gore Morena Jesu wa lona o tsogile baswing.’”

<sup>126</sup> Mme Ngaka Reidhead ne a re, ““Goreng, O dirile!””

<sup>127</sup> “Ne a re, ‘Go netefatse!’ Ne a re, ‘Go netefatse!’ Ne a re, ‘Lo nnile le dingwaga di le dikete tse pedi go go netefatsa, mme go batlile fela e le bongwe mo borarong jwa lefatshe jo bo kileng jwa ba jwa utlwa ka ga gone.’ Ne a re, ‘A Mohamete wa rona a tsoge baswing mme lefatshe lotlhe le tlaa itse ka ga gone mo malatsing a le mabedi.’” O nepile. “O ne a re, ‘Mohamete wa rona ga a ise a re sololetse sepe fa e se botshelo morago ga loso.’ O ne a re, ‘Morena Jesu wa lona o lo soloeditse, le lona baruti, gore tsone dilo tse A di dirileng lo tlaa di dira le lona.’ Mme ne a re, ‘A re boneng lona baruti lo ntsha seo jaanong, mme,’ ne a re, ‘re tlaa dumela gore O tsogile mo baswing.’”

<sup>128</sup> O ne a re, “Mokaulengwe Branham, ke ne ka tlobelela lonao lwa me mo leroleng *jalo* ka bofeso mme ka fetola serutwa.” Ka digarata tsotlhe tseo! Goreng? Modimo o kae mo digaratang tseo? Modimo ga a itsiwe ka di Ph.D., le di D.D., le di L.D., le jalo jalo.

<sup>129</sup> Modimo o itsiwe ka tumelo e e motlhoho, ka kolobetso ya Mowa o o Boitshepo. Eo ke tsela e le nosi. Modimo mo go wena, go fitlhela A go tlisa o le “morwa Modimo,” o fetola tlholego ya gago. Mme sone selo se se tshwanang, Modimo Motlhodi Yo o dirileng dilo tsotlhe mme a bua lefatshe gore le nne teng ka Lefoko la Gagwe, one Mowa oo mo go wena, o dumela sengwe le sengwe se Modimo a se buang. Mme ga go sepe se se sa kgonegeng; o a Go dumela.

<sup>130</sup> Ga o tle go emela morago ko tumelong e nnye e le nngwe ya kereke mme o re, “Ga ke dire, ke kgone go amogela Seo. Ga ke kgone go dumela gore Modimo o tlaa dira *sena*. Ga ke kgone go dumela.” O lekanyetsa Modimo ka tumologo ya gago! Ke gone.

<sup>131</sup> Jalo he Ngaka Reidhead ne a ema foo, o ne a re, “Mokaulengwe Branham, a motho a ka amogela, ka nnete, Mowa o o Boitshepo?”

<sup>132</sup> Ke ne ka re, “Ee, rra, Ngaka Reed- . . . , o ka kgona.”

<sup>133</sup> O ne a re, “Fa Modimo a itse pelo ya me; mme ke a go dumela, ke itseng; mme mo tlase ga tlhotlheletso gone jaanong, ke batla wena o . . . A o dumela gore ke bua boammaaruri?”

Ke ne ka re, “Ke a itse gore o jalo!”

O ne a re, “Ke tshwanetse ke O amogelete jang?”

Ke ne ka re, “Khubama.”

<sup>134</sup> Mme o ne a khubama foo fa tafoleng ya kgale ya kofi. Ke fetsang go e tsaya go tswa golo fano. Monna o ntse ko morago koo yo o e baakantseng fela kgantejana golo fano. A dutsgoo, ne a thuba galase mo godimo ga yone jaaka a ne a khubama. O ne a re, “Modimo, nna le boutlwelo botlhoko mo moweng wa me wa botho o o boleo.” Mme ke ne ka baya diatla mo go ene, mme kolobetso ya Mowa o o Boitshepo e ne ya tla mo go ene gone foo. Go ntse jalo.

<sup>135</sup> Mme ena o ne fela a tukisa kereke eo ya Baptisti gongwe le gongwe jaanong, ko go botlhe ba bone teng koo. Ke gone moo. Ee, rra.

<sup>136</sup> Efangedi ga e kake . . . Jesu ga a kake a tla go fitlhela . . .

<sup>137</sup> Reetsang! Re abile dipampitshana tikologong yotlhе mo lefatsheng. O ka se kgone go ya kwa kgogometsong epe e nnye ga se nne le fa go ne go na le dipampitshana tse di neng di abilweng, mongwe a neng a tla a feta foo ka thuto ya bodumedi le ditumelo. O ye moseja ga mawatle gompieno mme o ipitse “moneri,” mme o ba lebelele ba go tshega. Tsamaela ko India mme o re, “Nna ke moanamisa tumelo.”

<sup>138</sup> “Sentle, o ile go re ruta eng?” Ba itse mo gontsi ka ga Baebele go na le . . . Bangwe ba bana ba bone golo koo ba itse mo go fetang ka ga gone go na le bangwe ba baruti ba bone fano mo Amerika ba itseng ka ga gone. Morago ga tsotlhe, ke Buka ya kwa Botlhaba. Mme, gakologelwang, ba ne ba na le Efangedi makgolo le makgolo le makgolo a dingwaga pele ga Amerika e ne e ka ba ya nna teng. Moitshepi Thomas, kereke e kgolo e a rerileng mo go yone, e santse eeme gompieno ko India. Ga ba tlhoke epe ya thuto ya lona, ba itse gotlhe ka ga gone. Ba ne ba re, “O ile go re ruta eng?”

“Sentle, rona re baanamisa tumelo ba Maamerika.”

<sup>139</sup> “O ile go re ruta eng, gore re nwe whisiki jang? Seo ke se lona lotlhe lo se dirang ka koo mo dikerekeng tsa lona! Go goga disekarete? O ile go re ruta ka fa re ka tlhalang basadi ba rona ka gone, le jalo jalo?” Ne a re, “Fa e le gore o ile go dira seo, ga re go batle.” Mme ne a re, “O tlaa tla ka kwano ka thuto nngwe ya bodumedi le ditumelo e ntshwa kgotsa sengwe se sele, o ile go leka go re ruta lengwe la Lefoko, re itse mo go fetang ka ga gone go na le ka fa o dirang ka gone.” Mme go ntse jalo. O ne a re, “Fela fa o tla go diragatsa se Lefoko le se buang, re tlaa Le amogela.” Amen! Ke lona bao. Moo ke selo se ba tshwerweng ke tlala ya sone.

<sup>140</sup> Tshwayang Lefoko la me, Le kwaleng mo ditsebeng tsa lona tsa Baebele ya lona, gonne Gone ke MORENA O BUA JAANA, “Gakologelwa, fa re goroga ko India, o ile go utlwa ka ga masome a dikete tse di ntsifaditsweng ka dikete tse di bolokesegang.” Mowa o o Boitshepo o Go buile. Ke Go kwadile fano mo Baebeleng ya me. Go kwadilwe mo Dibaebeleng di le masome a dikete gone fano, jaaka tsogo ya mosimanyana, ka ponatshegelo e A e buileng. “Go na le ba le dikete di le makgolo a mararo ba bone teng koo.” Mme lo boneng fa moo go sa nepagala! Foo ke ka fa Efangedi e ileng go rerwa fela mo bosigong. E tlaa anama fela jalo, go tloga lefelong go ya lefelong.

<sup>141</sup> Ko Afrika, kwa dikete tseo tse di masome a mararo mo piletso aletareng e le nngwe fela ba neng ba amogela Modimo, ke ne ka re, “Tsholetsang diatla tsa lona mme lo amogeleng Mowa o o Boitshepo.” Ke ne ka re, “Lo sek a lwa letela moanamisa tumelo mongwe wa Moamerika go tla ka kwano mme a lo rute go ithuta dipuo mo dikerekeng.” Mme bomma ba tlhatswa mo diborotong, go romela moanamisa tumelo ka koo mme a kgweetswa kgweetsa mo koloing e ntle e tona, a tshela ka monono wa lefatshe; go tlhomame, a aba dipampitshana di le mmalwa a bo a boa. Ga ba batle seo; go go netefaditse.

<sup>142</sup> Ke ne ka re gone fano fa go Jewish Hospital kwa, masigo a le mmalwa a a fetileng mo bokopanong le badiredi le dingaka, mo serutweng sa phodiso ya Semodimo; ke ne ka re, “Lo ne lwa mpitsa se bidikami se se boitshepo, mme lo ne lwa re ke nnile

le segateledi fa ke ne ke lo bolelala... Moengele wa Morena.” Mme ke ne ka re, “Mme kereke e e leng ya rona e rometse dikete mme ya dirisa didikadike tsa didolara, tsa go romela baanamisa tumelo ko Aforika; mme erile ke fitlha koo, ba ne ba tshwere medimonyana ya disetwa ya seretse, ba leka go bona thuso mo modimong wa sesetwa sa seretse, mme ba ipitsa ‘Bakeresete.’” Mme ke ne ka re, “Mme se lo se bitsang ‘bogogotlo’ se thopetse mewa e mentsi ya botho ko go Keresete mo nakong ya metsotsotso e le methlano go na le didikadike tsa rona tsa didolara le dikete tsa baanamisa tumelo ba di dirileng mo dingwageng tsa bofelo tse di lekgolo le masome a matlhano.” Ba ne ba didimala, moo e ne e le gone! Gone go ne go ntse foo. Ke ne ka lo raya ka re, banna bao, ke ne ka re, “Lo seka—lo seka lwa leka go rutega, tsayang fela Efangedi ena mme lo tswelele golo ka kwa ko le—ko lefatsheng la kwa ba kwa magaeng ba tsaledsweng gone kwa motho mosweu a sa kgoneng le e leng go ya gone, ka ntlha ya malwetsi.”

<sup>143</sup> Mme ke na le direkhote, gone go tswa mo koranteng ya Durban, e ne ya re, “Le e leng monna mogolo mongwe yole yo neng a sa kgone le e leng go itse se e neng e le seatla sa moja le sa molema, a neng a amogela kolobetsa ya Mowa o o Boitshepo, mme ba ne ba kolobetsa ka palo ya sekete ka beke.” Ke ka fa Efangedi e tswelelang ka gone, fela mo lobakanyaneng, E tlhoka fela go ka nna dikgwedi di le thataro go khurumetsa lefatshe. Go siame.

### 30. A o tlaa tlhalosa ka ga Christian—Christian Science?

<sup>144</sup> Go siame. Nna... Fano ke... Ga ke tle go bua ka ga bodumedi jwa gago, mokaulengwe wa me kgotsa kgaitsadi, le fa e le mang yo o beileng potto e. Christian Science ke saekholoji. (Mme phodiso ya Semodimo ke thata ya Modimo!) Christian Science e na le monagano o laola se se bonwang ka matlho; Christian Science e latola Madi a ga Jesu Keresete. Christian Science... Ao, ke na le dibuka tsa ga Mmê Eddy golo kwa, mme ke di bala tsotlhe. Lo a bona? Go ntse jalo, Christian Science e latola Bomodimo jwa ga Jesu Keresete, mme e Mmaya e le “moporofeti.” Jesu Keresete o ne a se motho; O ne a le Modimo! O ne a le yo o Semodimo! Mme ba akanya gore ke monagano o laola se se bonwang ka matlho.

<sup>145</sup> Fa ke na le kerempe mo lebogong la me kgotsa mo mpeng ya me, kgotsa mo... kgotsa botlhoko mo tlhogong ya me, ke na le tlhaloganyo mo go lekaneng go itse gore go utlwisa botlhoko, mme ga se a kana ke akanya gore go utlwisa botlhoko. Fela ke a itse gore thata ya Modimo e kgona go go tlosa, eseng ya me... nna ke akanyang ka ga gone. Lo a bona? Jalo he, Christian Science, ke tlaa bua sena mmogo le tse dingwe tse ke neng ka di botswa, ke nngwe ya ditumelwana tsa mothla wa segompieno, le timelo e e tseneletseng, e e lefifi. Go ntse jalo. Ke sa utlwise maikutlo a gago botlhoko, tsala, le fa e le mang yo o e kwadileng,

fela ke tshwanetse ke nne peloepheda. Ka gore wena yo o e kwadileng, le nna, ga mmogo, re tlaa ema letsatsi lengwe mo Bolengtengeng jwa ga Jesu Keresete go arabela, mme ke tlaa tshwanela go arabela se ke se buang. Jaanong, ga ke na go araba fa e se ke ne ke itse. Go siame.

**31. Jaanong: Fa rona re...Fa re nna kgakala go tloga fano go tsena... Re nna kgakala thata go tloga fano go tsenela teng fa motlaaganeng. Ke kae kwa o gakololang ka gone gore re tsene teng, re ikokoanye ga mmogo, ka re bona gore dikereke di setse mma kereke morago, kgotsa, Bokhatholike?**

<sup>146</sup> Mokaulengwe kgotsa kgaitsadi wa me yo o rategang, le fa e le mang yo o e kwadileng, nka se kgone go go bolelala gore ke kereke efeng e o tshwanetseng go e tsena. Fela se ke neng ke tlaa se dira, sena, mokaulengwe wa me, kgaitsadi, nna... Fa o sena kolobetso ya Mowa o o Boitshepo, o a bona, sentle, o amogelete kolobetso ya Mowa o o Boitshepo mme fong o ye ko phuthegong nngwe kwa go nang le batho ba bangwe ba ba nang le kolobetso ya Mowa o o Boitshepo. O na le... phuthega mmogo le bona batho ba mohuta oo!

<sup>147</sup> Ke ne ka bona monna, fano e se bogologolo, yo neng a tsalwa dingwaga di le lesome esale ena... kgotsa, a sa tsalwa, ke kopa maitshwarelo, e ne e le dingwaga di le lesome esale a bone sepe ka matlho. O ne a le leloko la kereke e kgolo, mme o ne a nna kwa Kennett, Missouri. Mme o ne a na le... e ne e le mo—e ne e le moroki wa ditlhako dingwaga tse di fetileng, mme o ne a foufala. Mme monna yo ne a tla mo seraleng, mme Mowa o o Boitshepo ne wa mmolelela yo a neng a le ene le se se neng se le phoso ka ene, ne wa mmolelela gore ke lobaka lo lo kae le a neng a foufetse, mme wa mmolelela ka ga tironyana nngwe, e e leswe e a neng a e dirile. O ne a re, “Fa Modimo a tlaa nttelelela ke tshele go fitlha foo, ke tlaa siamisa seo.” Mme, erile a bua seo, matlho a gagwe a ne a bulega; mme yone Baebele ena, o ne a bala kgaolo morago ga kgaolo go tswa mo go Yone.

<sup>148</sup> O ne a boela kwa kerekeng ya gagwe mme o ne a neela thoriso. Mme modisa phuthego ne a mmolelela, “Go ka bo go ne go diragetse le fa go ntse jalo. Goreng, wena fela o ne wa gakatsega, go ne go sena sepe mo go gone. Ga go sepe mo dilwaneng tseo, ke ga ga diabolo!”

<sup>149</sup> Ke gwetlha ope go ntshupegetsa Lekwalo le le lengwe kwa diabolo a ka fodisang gone. Fa o tlaa ntshupegetsa kwa diabolo a ka fodisang gone, ke tlaa netefatsa gore diabolo ke rraago; go ntse jalo, fa o tlaa dira seo. Ga go mo Mafokong a Modimo. Ga go kake ga netefatswa. Mme o ka nna wa... o ka batla go go leka, o amogelesegile. Fela moo go diragaditswe ke bobishopo le sengwe le sengwe se sele, mokaulengwe, jalo he o seka wa bua seo.

<sup>150</sup> Lebang! Mme monna yo o tshwanang yoo ne a goroga kwa, mo pelong ya gagwe, a go dumelang. Mme dikgwedi di le tharo

morago o ne a le mo ditirelong tsa me, a foufetse fela jaaka a ne a ntse ko lefelong la ntlha. Ke lona bao.

<sup>151</sup> Jalo he tswayang mo ditumelwaneng tseo! Phuthega ga mmogo le mongwe yo o dumelang, ikgolaganye. Baebele ne ya re, "Lo se ipataganyeng mo gare ga badumologi." "Lo lomologaneng," go bua Modimo. Tswayang! Baebele ne ya re, "Tswayang mo gare ga bona, mme lo nneng...lo se ame dilo tsa bona tse di itshekologileng, mme Ke tlaa lo amogela. Ke nna Morena Yo o emang mo gare ga kereke." Go ntse jalo. Tswayang! Lo seka lwa amana le ba ba ntseng jalo!

<sup>152</sup> Fela mpe... itsenyeng mo gare ga kereke nngwe, kereke nngwe e e molemo. Methodisti, Baptisti, Presbitheriene, Campbellite, le fa e ka nna mang yo e ka bong e le ene, ga go dire... Kwa badumedi ba nnete ba leng teng moo, ga ba kgathale se tumelo ya kereke e se buang, ba ya koo go kopana le bakaulengwe le bokgaitadi ba bone le go obamela Modimo, ga mmogo. Go siame.

**32. Bosigo jo bo fetileng o ne wa bua ka ga "lesomo le legolo le go seng motho ope yo o ka le balang, go tswa morafeng mongwe le mongwe, setshabeng," le le—le umakiwang mo kgaolong ya bo 7 ya Tshenolo. A ke go tlhalogantse, ka go nepagala, go bua gore "Bone ke Monyadiwa wa ga Keresete"? Ee, o ntlhahogantse. Bone ke Monyadiwa.**

<sup>153</sup> Jaanong fa lo tlaa lemoga, fela totatota mo go Tshenolo 7, o ne a bona ba ba dikete di le lekgolo le masome a manê le bonê. Jaanong, ga ke go pege molato wa sena, mokaulengwe wa me, fela ba ba lekgolo... Ka tlwaelo mo Jehovah Witness ke ene yo o dumelang gore dikete di le lekgolo le masome a manê le bonê e tlaa bo e le Monyadiwa. Mme moo ke phoso! Johane o ne a itse mongwe le mongwe wa bone, mme a ba bitsa ka leina. Bona mongwe le mongwe ba ne ba le Bajuta. O ne a re, "Dikete di le lesome le bobedi tsa ga Gate, dikete di le lesome le bobedi tsa ga Zebulone, dikete di le lesome le bobedi tsa ga Benjamine, dikete di le lesome le bobedi tsa ga Juta." A go ntse jalo? Mme go na le merafe e le lesome le bobedi ya Iseraele, mme lesome le bobedi le ntsifaditswe ka lesome le bobedi... ke dikete di le lekgolo le masome a manê le bonê. A go ntse jalo? O ne a re, "Botlhe, bana ba Iseraele." Johane o ne a ba lemoga.

<sup>154</sup> Fong o ne a leba ka tsela *ena*, mme o ne a re, "Goreng, fano go ne ga ema lesomo le legolo le go seng motho ope yo o neng a ka le bala, la ditshika tsotlhe, diteme, le ditshaba; ba eme ka dikobo tse di tshweu, mo diatleng tsa bone... le mekolane, mme ba ebaebisa diatla, le go thela loshalaba, le go opelela dihosana le... ko Kgosing." O ne a re, "Bona ke bomang?"

<sup>155</sup> O ne a re, "Bao ke bone ba ba tswileng mo pitlaganong e kgolo mme ba tlhatswa diaparo tsa bone mo Mading a Kwana. Ba fa pele ga Modimo, mme ba tlaa direla Kwana mo Tempeleng

ya Gagwe le Ena. Motshegare le bosigo, ga ba tle go Motlhogela.” Monyadiwa ke yoo, lo a bona, Mosadi, Monyadiwa wa Moditshaba.

<sup>156</sup> Gakologelwang, Monyadiwa ke Moditshaba. O ne a re, “O tlaa tlaa mme a ntshe batho mo Baditshabeng ka ntlha ya la Gagwe” (ka ntlha ya eng?) “ntlha ya Leina la Gagwe.”

<sup>157</sup> Jaanong, go na le bahumagadi ba banana ba le bantsi mo lefatsheng. Fela ke tsere mosadi a le mongwe, mme yoo e ne e le Meda Broy, mme ena ke Mmê William Branham jaanong. O na le... Ena ga a sa tlhola e le Broy; ena ke Branham jaanong. Lo a bona?

<sup>158</sup> Mme ke ka fa go leng ka gone, o tsaya Jesu Keresete mme o fetoga go nna Monyadiwa, maloko a Monyadiwa.

### 33. Mafoko a Selatino mo godimo ga Vatican City ke eng? Re batla go itse ka fa a tlhakanang go nna makgolo a le marataro le masome a le marataro le borataro, le se a se rayang.

<sup>159</sup> Sentle, ga a mo godimo ga... mafoko a Selatino—a Selatino ga a mo godimo ga Vatican City; a mo godimo ga terone ya mopapa, kwa a nnang gone mo teroneng ya gagwe. Go kwadilwe fa godimo foo, “VICARIVS FILII DEI.” Fa lo eletsa go dira, mo mosong, ke tlaa go tlisa go kwadilwe, sengwe le sengwe, mme ke go kwale mo setoking sa pampiri. Mme fa o go batla, goreng, ke tlaa go tlisa ko go wena mo mosong. Kwa o ka go peletang ka ditlhaka tsa Seroma, VICARIVS FILII DEI, lefoko le raya “Mo boemong jwa Morwa Modimo”; ena ke motlhatlhumi mo go Morwa Modimo.

<sup>160</sup> Kereke ya Khatholike e dumela gore “Petoro e ne e le mopapa wa ntlha; o ne a le motlhatlhumi wa ga Jesu Keresete.” Mo e leng gore moo ke phoso! Go siame. Fong ba bua gore “Mopapa mongwe le mongwe yo o mo latelang ke motlhatlhumi; mme mopapa jaanong, yo o leng jaanong, ke motlhatlhumi wa ga Jesu Keresete.” Mme foo go kwadilwe fa godimo foo, “Motlhatlhumi wa ga Jesu Keresete,” VICARIVS FILII DEI, go kwadilwe teng moo. Tsaya makwalo a Seroma mme o a kwale fela (X go emela lesome, V go emela botlhano, le jalo jalo jalo), jaaka o peleta “VICARIVS FILII DEI,” o bo o rala mola, mme o na le makgolo a le marataro le masome a le marataro le borataro. Go kwaleng mme lo batlisiseng.

<sup>161</sup> Jaanong, ke na le *Facts Of Our Faith*, e bidiwa jalo, mo kerekeng ya Khatholike, ka gore batho ba me e ne e le Mokhatholike wa Moaerishi. Jalo he ke itse se ke buang ka ga sone. Lo a bona?

<sup>162</sup> Mme gone go sena pelaelo epe ke boammaaruri, go ntse jalo, gore foo... Mme Baebele ne ya re “O tlaa bo a ntse mo kerekeng, kgotsa le—lefelong, kgotsa kerekeng e e dutseng mo dithabaneng

tse supa ko Roma, mme thata ya gagwe e tlaa ya ko lefatsheng lotlhe. Mme o bidiwa moganetsa-Keresete."

<sup>163</sup> Mme go tswa mo kerekeng eo go ne ga tswa dikereke tse dinnye tse di neng tsa tsalwa morago ga foo, mme ne ya re, "O ne a le seaka, mme ba ne ba le baakafadi ba ba neng ba mo latela." Go ntse jalo. Ke lona bao. Ka gore ba ne ba rulaganya mo selong se se tshwanang, mme ba nna le ditumelo tsa bone tsa kereke le dithuto. Fela ba le ko tlasenyana, ba sa nonofa jaaka a ntse ka gone, fela ba santse ba na le thata. Mme *sebatana* se kaya "thata." Ke wena yoo. Jalo he ba na le, Makhatholike ba na le thata e kgolo go feta thata. Mamethodisti, le Mapresbitheriene, mme go tloge go nne Malutere, mme go tloge go nne Mabaptisti, mme go tloge go nne le jalo jalo, le go tswelela kwa tlase. Tseo e ne e le dithata tse dinnye, tse di rulagantsweng, "Kereke ya me! Kereke ya me! Kereke ya me!"

<sup>164</sup> Fela modumedi wa mnene ga a bue sepe ka ga seo. Ke "Keresete wa me! Keresete wa me! Keresete wa me!" Moo ke pharologanyo. O itse jang? Mowa o o Boitshepo o supa ka ditshupo le dikgakgamatsko.

<sup>165</sup> E nnye ke ena, mohuta wa ga ko nakong ya ko moragonyana. Ke tlhoile go bala sena, fela mongwe o e beile golo fano:

**34. O boditse lebaka gore goreng motlaagana ona o ne o sa tswelele. Lebaka la gone, ke mabaka a gore bangwe ba batiakone ba gana neo ya diteme le phodiso. Rotlhe re itse seo gore bo ke nnete.**

<sup>166</sup> Mpe ke itse yo a leng ene, fa ke santse ke le fano mo—mo letsholong lena, mme seo se tlaa tlosiwa ka bonako.

**35. Tsweetswee tlhalosa fa Mokeresete a tshwanetse a obamele tlhapiso dinao, le kolobetso ka Leina la Jesu Keresete (Leina) mo boemong jwa leina la ga "Rara, Morwa, le Mowa o o Boitshepo." Tsweetswee.**

<sup>167</sup> Go siame. Ke ne ke na le go ka nna di le tharo tsa tseo teng fano tse di neng di botsa selo se se tshwanang seo.

<sup>168</sup> Ka ga tlhapiso ya dinao, sentle, nna go botoka ke simolole ka seo. Go siame, jaanong o ka nna wa farologana, moo go siame. Mpe fela ke baleng di le mmalwa, motsotso fela. Kgotsa fa lo batla go go bala, tsayang Moitshepi Johane, kgaolo ya bo 13, motsotso fela. Ke batla go le botsa sengwe fano. Mme reetsang se Jesu Keresete a se buileng, ka Sebele, mme fong ke tlaa lo isa ka ko Kgolaganong mme ke go supegetseng gore go santse go obamelwa. Simolola kwa temaneng ya bo 2.

*Jaanong selalelo se sena go wediwa, diabolo o ne a... tsentse mo pelong ya ga Jutase Isekariote, morwa Simone, go mo oka;*

*Jesu a neng a itse... Rara o ne a neetse dilo tsotlhe ka mo diatleng tsa gagwe, ... o ne a tswa kwa go Modimo,*

*mme a ya kwa go Modimo; (O ne a tswa mo Moweng, go ya ka mo nameng, mme a boela morago mo Moweng. Lo a bona?)*

*Mme A ema ka dinao mo selalelong, a bo a baya fa thoko diaparo tsa gagwe; . . . a tsaya seiphimolo, . . . a ikgatlha ka sona.*

*Morago ga foo o ne a tshela metsi ka mo mogopong, a simolola go tlhapisa dinao tsa barutwa, le go di phimola ka seiphimolo se neng a ikgatlhile ka sone.*

*Fong a tla ko go Simone Petoro: mme Petoro a mo raya a re, Morena, a o tlhapisa dinao tsa me?*

*Jesu . . . a mo raya a re, Se—se ke se dirang jaanong wena ga o se itse . . . fela wena o tla se itse morago ga fa.*

*Petoro ne a mo raya a re, Wena ga o kitla o tlhapisa dinao tsa me. Jesu ne a araba mme a mo raya a re, Fa Ke sa go tlhapise, wena ga o na karolo epe le nna. (Ao, a o ka gopola seo! Go siame.)*

*Simone . . . ne a mo raya a re, . . . eseng dinao tsa me tsosi, fela . . . diatla tsa me le tlhogo ya me.*

*Mme Jesu ne a mo raya a re, Ena yo o tlhapileng . . . fa e se . . . o tlhoka . . . go tlhapa dinao tsa gagwe, wena o itshekile gothe: . . . fela eseng lotlhe.*

*Gonne o ne a itse gore ke mang yo o tshwanetseng go mo oka; ke gone ka moo a neng a re, Ga lo a itsheka lotlhe.*

*Jalo he morago ga a sena go tlhapisa dinao tsa bone, mme a ne a—a tsere diaparo tsa gagwe, ebile a ne a ntse faatshe gape, o ne a ba raya a re, A lo itse se Ke se lo diritseng?*

*Lo mpitsa Moruti le Morena: mme lo bua sentle; gonne Nna ke ene.*

*Fa nna ka ntlha eo, Morena le Moruti wa lona, ke tlhapisitse dinao tsa lona; . . . lo tshwanetse lo tlhapisaneng dinao.*

*Gonne Ke lo neile sekai, gore lo tshwanetse lo direlaneng jaaka Ke lo diretse.*

*. . . lo sego fa lo itse dilo tsena ebile lo di dira.*

<sup>169</sup> Ka kwa mo go Timotheo wa Bobedi, Paulo ne a re, a kwalela kereke, “Lo seka lwa letlelela motlhologadi a tlisiwe mo kerekeng go fitlhela a tlhapisitse dinao tsa baitshepi.” Go ntse jalo. Tlhapiso ya dinao e ne e obamelwa gothe go ralala metlha ya Baebele. Mme ka thuso ya Modimo, fa ke tshegetsa monagano wa me o o siameng, mme Modimo a nthusa, ke tlaa e obamela go fitlhela ke swa. Go ntse jalo. Ke totatota thomo ya ga Jesu Keresete!

Jaanong, fano go ile go nna potso e e tlhabang.

- 36. Goreng motho a tlaa kolobetswa ka Leina la Jesu Keresete mo boemong jwa ga “Rara, Morwa, le Mowa o o Boitshepo”?**
- Ke na le di le pedi kgotsa tharo. Nngwe ke ena gone fano:
- 37. Mokaulengwe Bill, kolobetso ya maaka ke eng e o neng o bua ka ga yone bosigong jwa maabane, fa e le metsi kgotsa Mowa? Fa e le metsi, mme o rile Leina la ga Jesu Keresete, goreng Matheo 28:19, e re, “Rara, Morwa, le Mowa o o Boitshepo”? Tsweetswee tlhalosa.**

<sup>170</sup> Jaanong, tsena ka mohuta mongwe di a tlhaba, fela ke dumela gore ke na le e nngwe fano golo gongwe, selo se se tshwanang. Ao, ke go ka nna mafelo a le mararo. Ke tlaa leka go goroga kwa go gone. A re boneng. A lo tlaa—a lo tlaa intshokela metsotsa e le mmalwa? Go siame. Jaanong, mpe fela re simololeng jaanong mme re arabeng dipotso tsena. Gongwe re kgona go emisa di le mmalwa tsa tsone, mme re di tseye gongwe (tsa di setseng tsa tsone) ka moso; fa go se sepe se sele, kwa sekolong sa Letsatsi la Tshipi, kgotsa nako nngwe. Fela batho bana kooteng... ba botsa sena, mme kamoso ke kolobetso. Jaanong, le fa e le tsela efeng e o neng wa kolobetswa ka yone, moo ga go tshwenye mo go nna. Fela ke batla go—go lo bolelela Thuto ya boapostolo ya Baebele. Lo a bona?

<sup>171</sup> Jaanong, re fitlhetsore gore, bosigo jo bo fetileng, gore erile kereke ya Khatholike e ne e rulagantswe, gore e ne ya tswa ka selalelo sa maaka, e bua gore “Fa o amogela Yukhariste e e boitshepo, mo go rayang selalelo se se boitshepo foo, o amogela Mowa o o Boitshepo.” Moo ga se Mowa o o Boitshepo; moo ke papetlana ya senkgwe.

<sup>172</sup> Kereke ya Protestante e neelana diatla, e kwala maina a bone mo bukeng, seo ke se ba se bitsang “go O amogela.”

<sup>173</sup> Jaanong, fela tsela ya mmannete ya go O amogela e ne e le kolobetso ya Mowa.

<sup>174</sup> Mme, jaanong, kereke ya Khatholike e ne ya ntsha katekisima. Lutere o ne a na le yone, kereke ya Methodisti e na nayo, Maephiskhophaliene ba na nayo, ba le bantsi ba bangwe ba na nayo, katekisima. Dingwao di le dintsi tsa kereke ya Khatholike di santse di kgomaretse mo kerekeng ya Protestante; se se e bopelang gone mo teng le gone, go ya ka Baebele.

<sup>175</sup> Fela ga go ise go nne le motho, le ka nako epe, mo matlhareng otlhe a Baebele, a kileng a kolobetswa ka leina la “Rara, Morwa, Mowa o o Boitshepo.” Ga go ise go ke go nne le motho yo o kolobeditsweng ka leina la “Rara, Morwa, Mowa o o Boitshepo” go fitlheleng kereke ya pele ya Khatholike. Ga go mo Baebeleng, gope! Fa mongwe a ka bona setoki teng moo, mme a mpolelele a bo a ntshupegetse kwa motho a le mongwe a neng a kolobetswa go dirisiwa leina la “Rara, Morwa, Mowa

o o Boitshepo” tsweetswee ntshupegetse, gonne ke lebeletse le go lebelela le go lebelela le go lebelela le go Go lebelela, ka dingwaga di le masome a mabedi le sengwe jaanong. Mme ke phoso! Ke tumelo ya kereke ya Khatholike mme eseng taolo ya Baebele.

<sup>176</sup> Jaanong re tlaa batlisisa gore goreng, re ya ko potsong ya gago, mokaulengwe yo o rategang. Moitshepi Johane . . . Ke raya Matheo 28:19. Go siame, a re boeleng ka kwa. O bule ka Baebele ya gago, le nna, gore o kgone go bala le nna. Lena ke lefelo kwa go buiwang ka gone. Lefelo le le lengwe mo Baebeleng la . . .

<sup>177</sup> A Jesu ga a a ka a re, “Ka molomo wa basupi ba le babedi kgotsa ba le bararo a lefoko lengwe le lengwe le tlhomamisege”?

<sup>178</sup> Nka go isa mo Baebeleng kwa E rileng, “Jutase Isekariote o ne a ya mme a ikaletsza,” mme, “O ye go dira mo go tshwanang.”

<sup>179</sup> Nka go isa kwa Jesu a rileng, “Fa Morwa motho,” mo e leng gore ka Boene o ne a le ene, “yo jaanong a leng ko Legodimong, o tla tla gape,” mme a eme gone fano mo lefatsheng. Mme ne a re, “Morwa motho yo jaanong a leng ko Legodimong,” mme a eme gone fano mo lefatsheng.

<sup>180</sup> Lo tshwanetse lo itse Modimo go itse Lefoko la Gagwe. O ka se kgone . . . Ga e kgane lo re, “Le a Ikganetsa.” Go a tlhakatlhakanya; ka gore Modimo o rile O Go kwadile ka tsela eo go Go fitlhela baithuti bana le jalo jalo. Mme mpe batho ba ikobe fa aletareng, mme Modimo o tlaa go Le senolela.

<sup>181</sup> Jaanong Lekwalo ke lena, Matheo 28:19, lefelo le le nosi mo Baebeleng kwa go kileng ga ba ga umakiwa ka ditlhogo tsena.

*Ke gone tsamayang, mme lo rute ditšhaba tsotlhe, le ba kolobeletsa ka mo leineng la Rara, le la Morwa, le la Mowa o o Boitshepo:*

<sup>182</sup> Jaanong, tsela e lo kolobetswang ka yone, ke, “ka leina la Rara, ka leina la Morwa, le ka leina la Mowa o o Boitshepo.” Moo ebile ga go mo Lekwalong! Fela go fano, “Rutang ditšhaba tsotlhe, lo ba kolobetsa ka Leina!” Jaanong lebang gone mo Baebeleng ya lona mme lo boneng fa moo go re “ka maina” kgotsa “ka Leina.”

<sup>183</sup> Jaanong wa re . . . Jaanong, fano e se bogologolo mo bokopanong, mogoma ne a re, “Go na le kganetsanyo mo Baebeleng!” Ne a re, “Ke eletsa o ka go ntlhalosetsa. Goreng Jesu a ne a bolelala batho gore ba kolobetsa ka leina la Rara, Morwa, Mowa o o Boitshepo, mme Petoro ne a retologa a bo a ba kolobetsa ka Leina la ‘Jesu Keresete,’ mo go Ditiro 2:38?” Ne a re, “Fa moo go sa ikganetse, ga ke bone kganetsanyo!”

Ke ne ka re, “Fela ka gore ga o ise o senke Modimo sentle.”

<sup>184</sup> O ne a re, “Mokaulengwe Branham, a go dira pharologanyo epe fa ke kolobetsa ka tsela *ena* kgotsa ka tsela *ele*?” Gone ka tlhomamo go a dira, mme ke tlaa go netefatsa ka Baebele.

<sup>185</sup> Go ka tweng fa—go ka tweng fa Moshe... Modimo a ne a boleletse Moshe, a ne a tlie golo ko setlhatsaneng, ne a rile, “Moshe, rola ditlhako tsa gago, o mo mmung o o Boitshepo.”

<sup>186</sup> O ne a re, “Jaanong, Morena, nna ke motho yo o masisi. Ditlhako tsa me di boketenyana go rolega, jalo he ke tlaa rola fela hutshe ya me.” Ga a ise a re “hutshe,” O ne a re “ditlhako!” Mme se Baebele e se buang ke Boammaaruri. Jaanong fa... .

<sup>187</sup> Fano, mona ke malatsi a le lesome, mona e ne e le tlhatlogo. Mme erile Jesu a tlhatlosiwa, O ne a naya barutwa ba Gagwe thomo go ya ko lefatsheng lotlhe mme ba ruta ditshaba tsotlhe, ba ba kolobetsa ka leina la Rara, Morwa, le Mowa o o Boitshepo. Mme malatsi a le lesome morago... Ba ne ba ya golo ko Jerusalema mme ba leta mo phaposing e e kwa godimo go fitlhela Mowa o o Boitshepo o tla. Mme fong erile ba simolola go rera mme ba tswelela... Ba ne ba re, “Re ka dira eng gore re bolokesege?”

<sup>188</sup> Petoro ne a re, “Ikotlhaeng, mongwe le mongwe wa lona, mme lo kolobetsweng ka Leina la Jesu Keresete.”

<sup>189</sup> Fong o ne a ya ko ntlong ya ga Khoneliase, o ne a re, “Ikotlhaeng, mme lo kolobetsweng ka Leina la Jesu Keresete.”

<sup>190</sup> O ne a ya golo koo mme a fitlhela gore batho bangwe ba ne ba setse ba kolobeditswe, ne a re, “Lo tshwanetse lo kolobetswe seša gape ka Leina la Jesu Keresete!”

<sup>191</sup> Mme a fologela ko Samaria a bo a re, “Ba kolobetseng ka Leina la Jesu Keresete.”

<sup>192</sup> Mme ga go nako e le nngwe e tsone dithhogo tseo di kileng tsa ba tsa bidiwa mo mothong. Le goka! “Jaanong, go na le kganetsanyo ka ntlha eo,” wa rialo. Nnyaya, ga se gone. Kopa fela Mowa o o Boitshepo jaanong, mme o Mo ele tlhoko a Go go senolela. Bula pelo ya gago.

<sup>193</sup> Jaanong, o sekwa wa nna le letlhotlhlo. Fa o dira, Modimo ga a kake a bua le wena. Fela fa o sa tle go nna le letlhotlhlo, o re, “Nna ke sololetse Boammaaruri ka mmannete, Mokaulengwe Branham.”

<sup>194</sup> Fa Jesu a ne a boleletse barutwa, “tsamayang lo direng sena,” mme ba tsamaile ba bo ba dira sengwe ka *kwano* se se farologaneng, mme le fa go ntse jalo Modimo a se segofaditse, mme e le gotlhe go ralala Baebele. Jaanong, a ba ne ba dira se Jesu a ba boleletseng gore ba sekwa ba se dira? Fa ba dirile, ba ne ba itlhokisa tsebe, mme Modimo ga a kitla a tlhompha botlhokakutlo. Fa A ne a tlaa dira, A ka bo a ne a tlottle Efa mme a emisa selo sotlhe ko tshimologong. Fa Modimo a bua sengwe, O tshwanetse a tshegetse Lefoko la Gagwe; Ena o a ipusa. Jalo he fong ke gore kana Petoro o dirile phoso... .

<sup>195</sup> “Ao,” ne a re, “seo ke se baapostolo ba se buileng.” Mogoma a le mongwe ne a re, “Seo ke se baapostolo ba se buileng. Ke ile go dira se Jesu a se buileng.”

<sup>196</sup> Sentle, fa baapostolo ba dirile se Jesu a ba boleletseng gore ba seka ba se dira, fong ga tweng? Mme fa baapostolo ba ba kwadileng Baebele ena... Paulo ne a kwala tsotlhe tsena, mme Paulo ne e le ene yo o ba dirileng gore ba kolobetswe seša gape. Mme fa Paulo a kwadile karolo e tona go feta ya Kgolagano e Ntšhwa ena, fong ke mohuta ofeng wa Baebele o lo nang nayo e e kwadilweng e lo lekang go e bala?

<sup>197</sup> A re go direng fela go bue Sena fela. Re botseng mo go tlhaloganyegang tota mme re boneng se Lefoko le se buang. Jaanong, mona ke ga thuto, gore wena o itse Lefoko la Modimo.

<sup>198</sup> Jaanong, fa Petoro a kolobeditse ka Leina la Jesu Keresete morago ga Jesu a sena go mmolelala gore a kolobetse ka leina la “Rara, Morwa, Mowa o o Boitshepo,” o dirile kganetsanyong le se Jesu a se buileng. A moo ke nnete? Jaanong, go tshwanetse go nne le sengwe foo. Jaanong a re batliseng fela, mme re kopeng Mowa o o Boitshepo go re supegetsa. Jaanong, lefelo la ntlha, jaanong a re tseyeng—a re tseyeng Lokwalo la ntlha, Matheo 28:19.

*Ke gone tsamayang, . . . ruteng ditšhaba tsotlhe, le ba kolobeletsa ka mo leineng la Rara, . . . Morwa, . . . Mowa o o Boitshepo:*

<sup>199</sup> Leba golo mo Baebeleng ya gago mme o bone fa moo go re “ka maina a Rara, le a Morwa, le Mowa o o Boitshepo.” A go a dira? Nnyaya, rra. A e ne ya re, “ka leina la Rara, ka leina la Morwa, ka leina la Mowa o o Boitshepo”? E ne ya re, “Ka Leina!” A go ntse jalo? Sentle, “leina” e ne e le bongwe. A go ntse jalo? Sentle, ke leina lefeng le A neng a batla gore ba kolobetse ka lone, leina la Rara, kgotsa leina la Morwa, kgotsa leina la Mowa o o Boitshepo? O ne a re, “Ka Leina!” Sentle, ka tshosologo, ga go na le se le sengwe tsa tsona tse e leng leina.

<sup>200</sup> Ke borara ba le kae ba ba leng teng fano? A re boneng seatla sa gago—seatla sa gago. Go siame. Ke ofeng wa lona yo o teilweng “Rara”? *Rara* ga se leina; *rara* ke “setlhogo.” Ke bomorwa ba le kae ba ba leng teng fano? Go tlhomame, monna mongwe le mongwe, monona mongwe le mongwe, ke barwa. Sentle, ke ofeng wa lona yo o teilweng “Morwa”? Ga se leina; ke setlhogo. A go ntse jalo? Ga se leina; ke setlhogo. Sentle, ke ofeng wa lona yo o teilweng “Motho wa nama”? Ke batho ba nama ba le kae ba ba leng fano? Lona lotlhe. Sentle, ke ofeng wa lona yo o teilweng “Motho wa nama”? Ga go na selo se se jaaka seo; seo ke se o leng sone. Mowa o o Boitshepo ga se leina; seo ke se O leng sone. Nna ke motho wa nama. Jalo he le Rara, Morwa, le fa e le Mowa o o Boitshepo ga se “leina”; tsona ke fela *ditlhogo* di le tharo tse di leng tsa Leina le le lengwe.

<sup>201</sup> Jaanong reetsang ka tlhoafalo. Eng . . . Lebang fano! Ke tlaa tsaya sena fela jaaka motheo wa ngwana. Fa o ne o re, sentle, jaaka o ne o bala bu—buka ya polelo, mme e ne e re, “Johane le Marea ba ne ba tshelela ruri ba itumetse morago ga foo.” Mme o a ipotsa fong, “Johane le Marea ke bomang?” Sentle, tsela e le nosi e o ka bang wa itse yo Johane le Marea ba leng bone, ke go boela morago mme o bale tshimologo ya polelo o bo o e lebelela. A go ntse jalo?

<sup>202</sup> Sentle, fa Jesu a buile fano a re, “Kolobetsang ka Leina la Rara, Morwa le Mowa o o Boitshepo,” mme Rara ga se leina, le Morwa ga se leina le Mowa o o Boitshepo ga se leina, eng, Mogoma yona ke Mang? Re batla go itse Yo a leng Ene. Jaanong, selo se se botoka go gaisa go se dira . . . Moo ke kgaolo ya bofelo ya ga Matheo, temana ya bofelo. A re buleng morago ko kgaolong ya bo 1 ya Matheo, mme e le ditemana tsa ntlha, mme re simololeng, re batlisise Yo Rara yona, Morwa, le Mowa o o Boitshepo e leng ena. Jaanong, ke batla fela go direla bana sena foo, gore ba tie ba go tlhaloganye le bone.

<sup>203</sup> Selo sa ntlha, sena se tlaa go le tlhamalatsa mo “borarong” jwa lona jwa medimo, Rara, Morwa, Mowa o o Boitshepo. Jaanong, mo lefelong la ntlha, ga go lefelo le le lengwe mo Baebeleng le boraro jw medimo bo kileng jwa umakiwa. O go batle mme o go ntshupegetse. Ga go na selo se se ntseng jalo. Ke phoso ya Khatholike, mme lona Maprotestante lo a e khubamela. Lemogang. Jaanong, *mona* ke eng? Ke rile *yona* ke Mang? Rara. *Yona* ke Mang? Morwa. Mme *yona* ke Mang? [Phuthego ya re, “Mowa o o Boitshepo.”—Mor.] Jaanong, Rara ke Rraagwe Mang? Morwa. A go ntse jalo? Jaanong, *yona* ke Rraagwe Jesu. Lo sekla lwa ba tlhakatlhakanya, jaanong. *Yona* fano ke Rara, *yona* ke Morwa, mme *yona* ke Mowa o o Boitshepo. A go ntse jalo? Jaanong, batho ba ne ba go baya, “Batho ba le bararo ba ba farologaneng, Medimo e meraro e e farologaneng, botho jo bo farologaneng bo le boraro.” Ga e kgane Mojuta a sa kgone go Go tlhalogany! Go siame.

<sup>204</sup> Matheo kgaolo ya bo 1, e simolola ka ditshika tsa ga Jesu Keresete, “Aborahame ne a tsala Isaka, Isaka ne a tsala Jakobo,” go tswelela jalo, kwa tlase jalo, go fitlhela go goroga golo ko temaneng ya bo 18.

*Jaanong tsalo ya ga Jesu Keresete . . .*

<sup>205</sup> Gone ke mona, temana ya bo 18.

*Jaanong tsalo ya ga Jesu Keresete . . . (ntshaleng morago le Baebele ya lona) . . . tsalo ya Monna yona Jesu Keresete e ne e le ka tsela e e jaana: Erile . . . Marea mmaagwe a ne a beeletswe ke Josefa, . . . o ne a fitlhelwa a ithwele ngwana wa . . . (Modimo, Rara?)*

A ke badile Seo sentle? La reng? [Phuthego ya re, “Mowa o o Boitshepo!”—Mor.] A fitlhelwa a na le Ngwana wa ga Mang?

[“Mowa o o Boitshepo.”] Ke ne ka akanya gore mongwe o rile Monna *yona* ke Rraagwe? Baebele e rile Monna *yona* e ne e le Rraagwe.

...o ne a fitlhelwa a ithwele ngwana wa Mowa o o Boitshepo.

<sup>206</sup> Jaanong ke mohuta ofeng wa ngwana yo o nang nae? Mme Jesu go tlhaloganyega mothlofo ne a re Modimo e ne e le Rraagwe. A go ntse jalo? Modimo ke Rraagwe! Sente, Mowa o o Boitshepo o amana le eng ka gone fong? Fa Baebele e rile Mowa o o Boitshepo e ne e le Rraagwe, mme Jesu a rile Modimo e ne e le Rraagwe; mme o rile Modimo e ne e le Rraagwe, mme jaanong Baebele ya re, ka kwano. Fa go na le batho ba le bararo, ba le babedi ba ba farologaneng, Modimo o ne a sena sepe se se amanang le gone. Mowa o o Boitshepo ke Rraagwe.

<sup>207</sup> Jaanong a re baleng kwa pejananyana.

...Josefa monna wa gagwe, a neng a le mosiami, o ne a sa rate go mo tlhabisa ditlhong mo morafeng, fela o ne a akantse gore a mo thale mo sephiring.

*Fela, bonang, ya re a akanya ka dilo tse, ...moengele wa Morena ne a bonala kwa go ene mo torong, a re, Josefa, wena morwa Dafita, se boife...go itseela Marea mosadi wa gago: gonne seo se se ithwelweng mo go ene ke sa Mowa o o Boitshepo.* (eseng Modimo Rara; Modimo Mowa o o Boitshepo!)

<sup>208</sup> Lo bona kwa mogopolu wa lona wa medimo e meraro o neng o tlaa ya gone? O ne o tlaa baya Jesu e le leselwane. Go tlhomame. Moo ke phoso! Ga go Lokwalo la seo. Jaanong, o tlaa tshwanela go dumela gore Modimo Rara le Modimo Mowa o o Boitshepo, ke Motho yo o tshwanang, kgotsa Jesu o ne a na le bontate ba le babedi ba ba farologaneng. A go ntse jalo? Jaaka go itsiwe, go ntse jalo. Baebele ne ya re, “Mowa o o Boitshepo e ne e le Rraagwe,” mme Baebele ne ya re, “Modimo e ne e le Rraagwe.” Jaanong, Rraagwe ke mang? Mowa o o Boitshepo le Modimo ke Mowa o o tshwanang; Ke Selo se se tshwanang.

...gotlhe mona go ne ga dirwa, gore go tle go diragatswe se...se builweng ke moporofeti, ke Morena, a re,

...kgarebane e tlaa ithwala...mme e tsale ngwana, mme bone...(Yona)

...mme ba tlaa bitsa leina la gagwe JESU: gonne o tlaa boloka batho ba gagwe mo maleong a lone.

Mme mona gotlhe go ne ga dirwa, gore go tle go diragadiwe,...

...mme leina la gagwe le tlaa bidiwa Emanuele, mo e leng ka phuthololo, Modimo a na le rona.

<sup>209</sup> Jaanong, Rara, Morwa, le Mowa o o Boitshepo ke Mang? A Petoro o ne a dira phoso? O dirile se Jesu a se mmoleletseng. Moo ke ditlhogo di le tharo.

<sup>210</sup> Ke modiredi, mme ke rrê, ebile ke “Moruti,” ba go bitsa jalo, maemo, fela ga go sepe sa tseo se e leng leina la me. Leina la me ke William Branham.

<sup>211</sup> *O ne a le Rara, O ne a le Morwa, O ne a le Mowa o o Boitshepo.* O leka go dira Modimo e meraro, tsala; go phoso; ke timelo.

<sup>212</sup> Go na le ditebalebelo di le tharo tse modumedi wa medimo e meraro a tlhakatlhakaneng mo go tsone. Modimo, Rara, e ne e le Mowa o o neng o kaletse mo godimo ga bana ba Israele mo Pinagareng ya Molelo. A go ntse jalo? Modimo o ne a le teng. Fong Modimo o ne a dirwa nama a bo a aga mo gare ga rona (a go ntse jalo?) mo Morweng wa Gagwe. Jaanong Ena o ikgobalatsa kwa tlase go tsamaya A tla ka mo pelong ya motho, ka Mowa o o Boitshepo.

<sup>213</sup> Modimo o jaaka rula ya difutu tse tharo, kgotsa, rula ya difutu tse tharo, ee. Diintšhi tsa ntsha tse di lesome le bobedi e ne e le Modimo, Rara; diintšhi tsa bobedi di le lesome le bobedi, Modimo, Morwa, Modimo yo o tshwanang; diintšhi tsa boraro di le lesome le bobedi e ne e le Modimo, Mowa o o Boitshepo, Modimo yo o tshwanang. Jesu ne a re . . .

<sup>214</sup> Wa re, “Sentle, re na le Mowa o o Boitshepo mo go rona.” Go ntse jalo.

<sup>215</sup> Fela Jesu ne a re, “Ka lobakanyana, mme lefatshe ga le sa tlhole le Mpona. Le fa go ntse jalo lo tlaa Mpona, gonne Nna . . .” “Nna” ke leemedi la motho. “Ke tlaa bo ke na le lona, le e leng mo go lona, go ya bokhutlong jwa lefatshe.” Mowa o o Boitshepo o ko kae ka nako eo? “Ga ke tle go lo tlogela lo sena mogomotsi; Ke tlaa tla gape mme ke nne le lona.” Ke gone.

<sup>216</sup> Lo a bona, ga o go tlhaloganye sentle, tsala. Ke Modimo a le mongwe mo ditebalebelong tse tharo. Tebalebelo ya Borara, Bomorwa, le Mowa o o Boitshepo, Ke Modimo yo o tshwanang. Mme erile A ne a re, “Tsamayang lo ba kolobetse ka Leina la Rara, Morwa, le Mowa o o Boitshepo,” E ne e le Jesu Keresete. Mme leo ke lebaka le a kolobeditseng ka Leina la Jesu.

<sup>217</sup> Jaanong lebang, a re tseyeng dikolobetsa fano. Lekgetlo la ntsha kolobetso e neng ya ba ya umakiwa mo Kgolaganong e Ntšhwa, e ne e le Johane Mokolobetsi. A go ntse jalo? Ke tlaa bay a sena fa godimo fano. Lo a bona, o tshwanetse o dire gore Bomodimo jwa gago bo lolamisiwe pele ga o ka dira gore kolobetso e lolamisiwe. Yoo ke Johane Mokolobetsi, kolobetso ya ntsha.

<sup>218</sup> Kolobetso ya bobedi e e neng ga buiwa ka ga yone, e ne e le Ditiro 2:38, kwa ba neng ba kolobetswa ka Leina la Jesu Keresete, kwa kerekeng e ntšhwa. Lefelo la bobedi e ne e le ntlo

ya ga Khoneliase, kgotsa nnyaya . . . Ke kopa lo intshwareleng, Basamaria, Ditiro 7:48 le 49. Mme Ditiro 10:49 e ne e le kwa a neng a ba kolobetsa gone kwa ntlong ya ga Khoneliase. Mme nako e e latelang kolobetso e neng ga buiwa ka ga yone, ebile go neng ga bitswa maina ape kgotsa ditlhogo, ne e le ka ko go Ditiro 19:5.

<sup>219</sup> Jaanong, fa ba ne ba kolobetswa ka Letsatsi la Pentekoste, ba ne ba kolobetswa, Ditiro 2:38, ka Leina la Jesu Keresete. A go ntse jalo? Go kwale, go batlisise.

<sup>220</sup> Se se latelang, Filipo o ne a fologa, malatsi a le mabedi morago, mme a simolola go rerela Basamaria; mme a ba rerela, a bo a fodisa balwetsi, ebile a nna le bokopano jo bogolo golo koo, mme a ba kolobetsa ka Leina la Morena Jesu Keresete. Petoro ne a fologa mme a baya diatla mo go bone; ba ne ba amogela Mowa o o Boitshepo.

<sup>221</sup> Petoro o ne a ya kwa godimo ga ntlo malatsi a le mmalwa morago, o ne a tshwerwe ke tlala, o ne a bona pono. Modimo o ne a mo romela ka kwa ko ntlong ya ga Khoneliase. Mme, "Ya re Petoro a santse a bua Mafoko ana, Mowa o o Boitshepo o ne wa fologela mo go bone," mme ba ne ba simolola go bua ka diteme le go tswlela jaaka ba dirile kwa tshimologong. Petoro ne a re, "Ga ba ise ebile ba kolobetswe ka nako e." Jalo he o ne a ba laela, mongwe le mongwe, gore ba kolobetswe ka Leina la Jesu Keresete.

<sup>222</sup> Motho mongwe le mongwe mo Baebeleng o ne a kolobetswa ka Leina la Jesu Keresete. Paulo . . . ke raya, barutwa ba ga Johane ba ne ba sa kolobetswa ka Leina la Jesu Keresete, ba ne ba kolobeleditswe boikothlao. A re buleng ka ko go Bakorinthe wa Ntlha . . . Ke raya, a re buleng ka ko go Ditiro, kgaolo ya bo 19, motsotso fela. Mme balang sena motsotso fela gore lo tle lo bone, ditsala, gore ga se—ga se . . . Tsone ga di . . . Lokwalo ga le Ikganetse. Lebang fano.

*Mme go ne ga diragala, gore, ya re Apolose a santse a le kwa Korinthe, Paulo . . . ne a feta kwa matshitsing a kwa godimo a . . . Efeso: o fitlhela barutwa bangwe,*

*O ne a ba raya a re, A lo amogetse Mowa o o Boitshepo e sale lo dumetse? . . . ba ne ba re . . . Ga re itse fa go na le Mowa o o Boitshepo ope.*

. . . o ne a re . . . fong lo ne lwa kolobeletswa eng?

Ao, ba ne ba re, re kolobeditswe.

Ne a re, Jang?

. . . ne ba re, Go ya ka Johane . . .

*O ne a re, Johane o ne fela a kolobeletsa boikothlao, a bua gore lo tshwanetse lo dumele mo go ena yo o tlileng . . . ke gore, mo go Morena Jesu Keresete.*

*Mme erile ba utlwile sena, ba ne ba kolobetswa gape ka leina la Jesu Keresete.*

... Paulo ne a baya diatla tsa gagwe mo go bone, mme Mowa o o Boitshepo ne wa tla mo go bone; mme ba ne ba bua ka diteme, ba bo ba porofeta.

<sup>223</sup> Moitshepi Paulo yo mogolo . . .

<sup>224</sup> Reetsang! Go ka tweng fa o ne o kolobeditswe ke Johane Mokolobetsi, monna yo o tshwanang yo o kolobeditseng Jesu Keresete? Monna yo o boitshepo, kwa Jesu a rileng, "Ga go ise go ke go nne le monna yo o tsetsweng ke mosadi, a le mogolo jaaka Johane Mokolobetsi." Ena ke kgosi ya baporofeti botlhe. O ne a etelela Jesu pele golo ko metsing mme a Mo kolobetsa gone ko Jorotane. Mokaulengwe, fa ke ne ke kolobeditswe ke ena, ke ne ke tlaa ikutlwa mo go molemo thata ka ga gone. A go ntse jalo?

<sup>225</sup> Fela Paulo o a retologa a bo a re, "Moo ga go tle go dira jaanong!" Ne a re, "Lo tshwanetse lo kolobetswe sešwa, gape."

<sup>226</sup> "Ao, re ile ra tibisiwa, le mororo, Paulo! Re ne ra tibisiwa ke Johane, gone golo ko Nokeng ya Jorotane."

<sup>227</sup> O ne a re, "Moo ga go tle go bereka jaanong. Lo tshwanetse lo kolobetswe gape."

"Jang?"

<sup>228</sup> Ne a re, "Johane o ne a kolobeletsa boikotlhao. Mona ke ga boitshwarelo jwa maleo, mme ga go leina le lengwe mo tlase ga Legodimo le le neilweng mo gare ga batho, ke Leina la ga Jesu Keresete fela." Mme ba ne ba tshwanelwa go kolobetswa sešwa, gape, ka Leina la Jesu Keresete.

<sup>229</sup> Mme ga go lefelo le le lengwe mo Baebeleng, kgotsa ditsong tsotlhе ka dingwaga tsa ntlha tse di makgolo a le marataro morago ga loso la moapostolo wa bofelo, mo ba kileng ba kolobetsa ka tsela epe e sele fa e se ka Leina la Jesu Keresete.

<sup>230</sup> Mme yang lo botse moperesiti ope wa Mokhatholike yo lo batlang go mmotsa, ba botseng gore ke bomang ba ba fetotseng seo, mme lo bone se ba se lo bolelang. Tsaya katekisima mme o e bale; ya re, "Go tlhomame, bangwe ba Maprotestante ba tlaa bolokesega ka gore ba obamela kolobetso ya rona." Ba ne ba go fetola. Ba re ba na le thata le taolo ya go go dira, mme lo a go dumela! Seo ke se ba se buang, seo ke se ba se bolelang, seo ke se kereke ya Protestante e se obamelang. Fela, go ya ka Lokwalo, gone go sena pelaelo epe ga se bonnyennyane bo le bongwe jwa Lokwalo ka ga gone.

Ba ne ba tshwanelwa go kolobetswa gape, ka Leina la Jesu Keresete!

<sup>231</sup> Jaanong reetsang, ka bonako jaanong, gore re tseneng gone... Ga ke batle go le diegisa thata mo dipotsong tsena. Lebang, mo motheng o Jesu a neng a fologa mo Thabeng ya

Phetogo le barutwa ba Gagwe, O ne a re, “Batho ba re Nna ke mang, mme bona ba reng?”

<sup>232</sup> “Bangwe ba re O ‘Johane Mokolobetsi,’ bangwe ba re O ‘Eliase,’ bangwe ba re O ‘moporofeti.’”

O ne a re, “Fela lona lwa re Nna ke mang?”

<sup>233</sup> Mme Petoro ne a re, “Wena o Keresete, Morwa Modimo yo o tshelang!”

<sup>234</sup> O ne a re, “O sego wena, Simone—Simone Morwa-jona,” ne a re, “gonne nama le madi ga di a go senolela sena. Ga o ise o ithute sena mo kerekeng nngwe, ga o ise o ithute sena ko seminareng nngwe. Fela Rrê o go senoletse sena, mme mo lefikeng lena Ke tlaa aga Kereke ya Me mme dikgoro tsa dihele ga di tle go fenza kgatlanong le Yone.”

<sup>235</sup> Jaanong, kereke ya Khatholike ya re, “E ne e le Petoro. Ba ne ba na le lefika foo, mme le santse le ntse fa tlase ga Vatican City.” Mme moo e ne e le ko Jerusalema, kgotsa ko Palestina. Mme ba ne ba re moo e ne e le lefika.

<sup>236</sup> Kereke ya Protestante ya re, “E ne e le Petoro yo ba agileng Kereke mo go ene.” Fa moo go le jalo, e ne ya kgeloga malatsi a lemmalwa morago. Moo e ne e se gone.

<sup>237</sup> Kereke e ne ya agiwa mo tshenolong ya Modimo ya Semodimo. “Nama le madi ga di a go senolela sena, Petoro, fela Rrê yo o kwa Legodimong o go go senoletse. Mme mo lefikeng lena, tshenolo ya semowa ya Lefoko la Modimo, Ke tlaa aga Kereke ya Me, mme dikgoro tsa dihele ga di kitla di fenza kgatlanong le Yone.”

<sup>238</sup> Ke kwa ke reng, Lutere, Methodisti, le fa e ka nna eng se o leng sone, le fa e ka nna eng, Mapentekoste, le eng le eng se lo leng sone, ga go dire pharologanyo e nnyennyane; fa Kereke ya Modimo e tswelela pele, mo thateng ya tlhotlheletso, e tlaa tswelela gone kwa pele le pele le pele. Mme ga go lekoko lepe le le E emisang, ga go sepe mo lefatsheng se se tlaa E emisang. “Mo lefikeng lena Ke tlaa aga Kereke ya Me, mme dikgoro tsa dihele ga di kake tsa fenza kgatlanong le Yone.” Boammaaruri jwa semowa, jo bo senotsweng!

<sup>239</sup> Jaanong elang tlhoko jaanong mo go latelang, A re, “Mme wena o Simone, mme Ke tlaa go naya,” ka gore o ne a na le Boammaaruri jwa semowa, jo bo senotsweng. Leo ke lebaka le a neng a itse pharologanyo magareng ga Rara, Morwa, le Mowa o o Boitshepo, le Leina la Morena Jesu Keresete. O ne a na le tshenolo ya semowa. Seo ke se lo se tlhaloganyang bosigong jono, kwa Mowa o o Boitshepo o se re phuthololelang.

<sup>240</sup> O ne a re, “Wena o Simone, mme Ke tlaa go naya dilotlele tsa Bogosi jwa Legodimo. Mme le fa e ka nna eng se o se bofang mo lefatsheng lena, Ke tlaa se bofa ko Legodimong. Le fa e ka nna eng se o se bofololang mo lefatsheng lena, Ke tlaa se bofolola

ko Legodimong.” A O go buile? Moitshepi Matheo, kgaolo ya bo 16, “Le fa e le eng se o se bofang mo lefatsheng, Ke tlaa se bofa ko Legodimong. Le fa e ka nna eng se o se bofololang mo lefatsheng, Ke tlaa se bofolola ko Legodimong. Mme Ke tlaa go naya dilotlele tsa” (eng?) “Bogosi jwa Legodimo.” Bogosi jwa Legodimo ke eng? Mowa o o Boitshepo! Baebele ne ya re, “Bogosi jwa Legodimo bo mo teng ga gago . . .” Ke raya, “Bogosi jwa Modimo,” intshwareleng. “Bogosi bo mo teng ga lona.”

<sup>241</sup> Jaanong O ne a re, “Bangwe ba ba emeng fano ga ba tle go bona loso go fitlhela ba bona Bogosi jwa Modimo bo tla ka thata.” Fela malatsi a le mmalwa morago, Pentekoste. Lo a bona? “Bangwe ba eme fano,” gone mo pots . . . selong se se tshwanang seo A neng a se bua. “Bangwe ba lona lo ema fano,” O ne a fetotswe, ne a re, “ga lo tle go bona loso go fitlhela lo bona Bogosi jwa Modimo bo tla ka thata.”

<sup>242</sup> Baebele ne ya re, “Bogosi bo mo teng ga gago.” Erile Jesu a ne a tsoga mo baswing, gakologelwang, O ne a tshotse mo letlhakoreng la Gagwe dilotlele tsa loso le dihele, eseng dilotlele tsa Bogosi, tseo di ne di neetswe Kereke. Jaanong, Petoro o ne a na le dilotlele. A lo dumela gore Jesu o ne a tlaa tshegetsa Lefoko la Gagwe? Fa A sa dire, mokaulengwe, O ne a se Modimo! Ke gotlhe. Jaanong, O ne a re, “Petoro, Ke tlaa go naya dilotlele tsa Bogosi,” ka mafoko a mangwe, “tsa Mowa o o Boitshepo. Le fa e le eng se o se bofang mo lefatsheng, Ke tlaa se bofa ko Legodimong.”

<sup>243</sup> Jaanong lebang phoso e ba e dirileng, ba tswela ntle mme ba itshwarela maleo, le jalo jalo jalo. A phoso! A re boneng. Ba ne ba baya dilotlele mo go ena. Jaanong, O ne a lebisa sefatlhego sa gagwe gone ka tlhamallo ko Pente- . . . kgotsa gone ka tlhamallo ko Jerusalema.

<sup>244</sup> O ne a bapolwa, a swa, a tsoga letsatsi la boraro, ne a le mo lefatsheng malatsi a le masome a manê mo gare ga batho, a tlhatlogela ko Legodimong. Ne a ba bolelala gore ba lete go fitlhela ba ne ba bone Bogosi jwa Modimo bo tla mo go bone, ka nako ena Rara o tlaa busetsa Bogosi mo popegong ya semowa ko go bone. Ba ne ba ya golo ko motseng wa Jerusalema mme ba leta foo malatsi le masigo a le lesome, mme, ka tshoganetso, kolobetsa ya Mowa o o Boitshepo, Bogosi jwa Modimo, ne jwa tla ka thata mo go bone. A go ntse jalo?

<sup>245</sup> Jaanong elang tlhoko! Petoro, a sa rutega, o ne a sa kgone le e leng go saena leina le e leng la gagwe (mopapa? Eya, mopapa), ne a ema mo lebokosong le le nnye la molora kgotsa sengwe mme a simolola go rera. O ne a re, “Lona batho ba Judea le lona ba lo nnang mo Jerusalema, a sena se itsegeng mo go lona, mme lo utlweng Mafoko a me. Ba ga ba a tagwa jaaka lo gopol, ka e le oura ya boraro ya letsatsi, fela mona ke seo se se builweng ke moporofeti Joele. ‘Go tlaa diragala mo metlheng ya bofelo,’ ne ga

bua Modimo, ‘Ke tlaa tshollela Mowa wa Me mo nameng yotlhé. Bomorwa le bomorwadia lona ba tla porofeta, le mo malateng le batlhankeng ba Me Ke tlaa tshollela Mowa wa Me mme ba tlaa porofeta. Ke tlaa supegetsa dikgakgamatsko magodimong kwa godimo; le lefatshe fa tlase, molelo, dipinagare tsa molelo, le meuwane ya mosi.’’ Go tswelela o ne a tsamaya, mme a bua ka ga Dafita le jalo jalo. Mme erile banyatsi bana ba ne ba eme foo . . .

<sup>246</sup> Ne ba re ka nako eo, “Batho le bakaulengwe, re ka dira eng gore re bolokesege?”

<sup>247</sup> “Ao, ela tlhoko, Petoro, o na le dilotlele tse di kaletseng jaanong.” A go ntse jalo? Molaetsa wa ntlha wa Efangedi!

<sup>248</sup> Jesu, malatsi a le mmalwa pele ga seo, pele ga A ne a bapolwa, ne a re, “Petoro, Ke tlaa go naya dilotlele. Le fa e le eng se o se bofang, Ke tlaa se bofa; le fa e le eng se o se bofololang, Ke tlaa se bofolola. Jaanong, le fa e ka nna eng se o se dirang, Ke tlaa se lemoga ko Legodimong.” Fa A le Motho wa Lefoko la Gagwe, O tlaa tshegetsa Lefoko la Gagwe!

<sup>249</sup> Mme ena ke yona a eme fano, Mowa o o Boitshepo o ne wa fologa lekgetlo la One la ntlha, mme Petoro o ne a botswa, “Re ka dira eng gore re bolokesege?”

<sup>250</sup> “Ela tlhoko, wena o tsenya selotlele ka mo Bogosing lekgetlo la ntlha. Jesu o go boleletse, malatsi a le mmalwa a a fetileng, malatsi a le lesome a a fetileng, ne a re, ‘Tsamaya o kolobetse batho ka Leina la Rara, Morwa, le Mowa o o Boitshepo.’ O ile go dira eng? Fela O go neile dilotlele ka gore o ne o na le tshenolo ya semowa! ‘Gonne Kereke ya Me e tlaa agiwa, mme dikgoro tsa dihele ga di kake tsa fenya kgatlhanong le Yone.’”

<sup>251</sup> Mme lo tseyeng ditumelo tsa lona tsa kereke le dithuto tse di tlhomameng, le eng le eng se lo eletsang, fela se tlaa palelwá mo go tlhomolang pelo (go ntse go le jalo), fela thata ya Modimo yo o tshelang e tlaa tswelela pele le pele, ka ko Bosakhutleng. Jaaka moraladi wa radiamo, O tswelela pele, lemogang, ntleng ga bokhutlo.

<sup>252</sup> “Petoro, o na le dilotlele. Le fa e ka nna eng se o se dirang fano, Modimo o tshwanetse a se lemoge ko Legodimong.” A go ntse jalo? “Wa reng, Petoro? Re ka dira eng gore re bolokesege?”

<sup>253</sup> Petoro ne a re . . . Lo seká lwa ya lo re, “*Dumela Marea*,” ga go na selo se se jaaka seo, go dira *novena*. O seká wa tla mme wa dumedisana ka diatla wa bo o tsenya leina la gago mo bukeng ya kereke mme wa ba dira gore ba kgatše metsinyana mo go wena; ga go na selo se se ntseng jalo. Moo ke thuto e e tlhomameng ya Khatholike e kereke ya Protestant e e obamelang.

<sup>254</sup> Ga a ka a re, “Lona lotlhe tsamayang . . . Jaanong, Jesu o mpoleletse, malatsi a le mmalwa a a fetileng, gore bottlhe lona lotlhe lo tsamaye mme lo kolobetsweng ka leina la ‘Rara, Morwa,

le Mowa o o Boitshepo.”” Eseng monna yo neng a na le tshenolo ya semowa, ne a sa tle go bua seo.

<sup>255</sup> O ne a re, “Ikotlhaeng, mongwe le mongwe wa lona, mme lo kolobetsweng ka Leina la Jesu Keresete gore go nne le boitshwarelo jwa maleo a lona, mme lo tlaa amogela neo ya Mowa o o Boitshepo. Gonnie tsholofetso ke ya lona, le bana ba lona, le ko go bone ba ba kgakala kgakala, le e leng ba le bantsi ba Morena Modimo wa rona a ka bang a ba bitsa.” Ke gone. Fong selotlele se ne sa tsena mo teng sa bo se lotlela, se ne sa lotlela ko Legodimong!

<sup>256</sup> Leo ke lebaka le Paulo a neng a bolelela barutwa ba ga Johane a re, “Lo tshwanetswe lo kolobetswe seša gape, ka Leina la Jesu Keresete, go amogela kolobetso ya Mowa o o Boitshepo.”

<sup>257</sup> Fa o ne o sa Go itse pele, o a Go itse jaanong! Huh! Go siame. Moo go tswa mo go wena. Moo ke nnete. Fela tumelo ya batho ba ba leng medimo e meraro, ya kolobetso ka ba bararo ga e ise e lemogiwe mo Kerekeng, Kgolaganong e Ntšhw; fa e se mo kerekeng ya Khatholike, mme kereke ya Protestante e a go obamela. Elang tlhoko! Batho ba le bantsi ba tlaa se utlwane le wena ka ntsha ya seo. Fela, mokaulengwe, o tshwanetse o dire maikgethelo a gago.

<sup>258</sup> Jaanong wa re, “Mokaulengwe Branham, ke ne ka kolobetswa ka leina la ‘Rara, Morwa, le Mowa o o Boitshepo.’ Ke na le kolobetso ya Mowa o o Boitshepo.”

<sup>259</sup> Ga ke belaele lefoko la gago. Ga ke na lebaka lepe gotlhelele go belaele lefoko la gago; ke a le dumela. Ke a dumela Modimo o ne a ba naya Mowa o o Boitshepo, golo koo pele ga ba ne ba kolobetswa gotlhelele; fela erile Petoro a ne a ba bolelela se ba tshwanetseng go se dira, ba ne ba ya mme ba se dira. Go ntse jalo. Jaanong o itse se o tshwanetseng go se dira, go ntse jalo; mme fa o gana go tsamaya mo Leseding nako e Lesedi le tlisiwang mo pontsheng, wena o fapogela kwa lefifing. Ke gone! Amen! Go siame. Intshwareleng. Ga ke batle lo intshwarela go goeletsa “a go nne jalo” mo Lefokong la Modimo. Nyanya, rra. Ke tlaa goeletsa “amen” gape. Go ntse jalo. Ee, rra.

**Goreng o kolobetsa ka Leina la Jesu Keresete, Mokaulengwe Branham? Goreng o dira seo mo boemong jwa “Rara, Morwa, Mowa o o Boitshepo”?** Ka gore Baebele e ruta seo! Moo go itshekile?

**Goreng o tlhapisa dinao, Mokaulengwe Branham?** Ka gore Baebele e ruta seo. Ke dumela mo Efangeding e e tletseng. Go siame, jaanong.

**Kolobetso ya maaka ke eng e o buileng ka ga yone?** Ke gone. Moo ke gone totatota. Gope... Balang morago ko Kgolaganong mme lo batleng kwa motho a le mongwe...

<sup>260</sup> Jaanong ko go lona batho ba ba rategang, ga ke utlwise maikutlo a lona botlhoko, ga ke batle go dira. Ke go kopa gore o ikokobetse mme o se... Leba selo sena mo sefatlheng, mme o bone se se lebegang jaaka sone. Go lebeleleng go ya ka mo Baebeleng, eseng mo kerekeng ya lona kgotsa selo sengwe sa boeleele, sa bomatla se mongwe yo o ikgodisitseng mo tlhogong ya bone, fela lebelelang Lefoko la Modimo. Go tlhomame!

<sup>261</sup> A lo akanya gore Modimo Mothatiotlhe o tlaa nnaya bodiredi jo A nang najo mo tikologong jaana, ka ditshupo tsa bofetatlholo le dilo tse di iseng di bonwe esale Kgolaganong e Ntšhwa, mme a ntese ke tsamaye ka phosego jalo? Go tlhomame ga go jalo! Mme, mokaulengwe, fa ke boa kwa moseja ga mawatle, Ke baya karolo e kgolo go feta ya nako ya me eseng mo diphosong tsa Semodimo le metlholong fela mo go rereng Lefoko la Modimo. Go ntse jalo totatota. Ka nnete. Jaanong a re boneng.

### **38. A kereke ena e ruta gore o tshwanetse o bue ka diteme go amogela Mowa o o Boitshepo?**

<sup>262</sup> Nnyaya, rra. Nnyaya, ga re dire. Go bua ka diteme ke neo ya Mowa o o Boitshepo, lo a bona, eseng Mowa o o Boitshepo. Ke neo. Setlhare sena se ungwa mehuta e le ferabongwe ya leungo. A go ntse jalo?

<sup>263</sup> Fa o leba mo setlhareng sa apole, se na le diapole, wa re ke setlhare sa apole. O leba mo setlhareng, se na le dipere, o re ke setlhare sa pere. Go sa kgathalesege fa se na le makwati a mosekamore mo go sone, mme se na le dipere mo go sone, botshelo jwa sone ke eng? Botshelo jwa sone ke botshelo jwa setlhare sa pere. A go ntse jalo?

<sup>264</sup> Jaanong, Setlhare sena sa Modimo se ungwa maungo a le ferabongwe a semowa. A ke gone? Go siame. Go na le tsotlhe tse di farologaneng... Ne a re, "Mongwe o neilwe thut-... kitso, botlhale, tlhaloganyo, le go bua ka diteme, phuthololo ya diteme," dineo di ferabongwe tse di farologaneng tsa semowa di tlhoga mo Setlhareng sena sa Modimo. A go ntse jalo? Sentle, jaanong, go bua fela ka diteme ga se go le nosi, go na le tse dingwe teng foo, le tsone.

<sup>265</sup> Jaanong o ka bua ka diteme mme wa bo o santse o sena Mowa o o Boitshepo. Jaanong, gakologelwa fela seo. Ke ntse ke siame... Ke bone baloi ba basadi le baloi ba banna ba tlhatloga ba bua ka diteme, mme bone ga ba na Mowa o o Boitshepo. Lo a itse, ke ba bone ba tlhatloga ba thela loshalaba ebile ba tlola, mme bone ga ba na Mowa o o Boitshepo. Ke ne ka ema mo mminong wa moletlo wa go leboga thobo ya mmidi fano e se bogologolo, ko ntle... le setokinyana se se ko godimo go tswa Douglas, Arizona, ko godimo koo. Ke bone mmino wa moletlo wa go leboga thobo ya mmidi fa ba nna le one koo, mme moloi yoo wa monna a tswa foo a bo a tswelela mo go boitshegang, le sengwe le sengwe, ne a tswelela mme ba latlhela mmu mo godimo ga gagwe

foo. Moo go ne go sa reye gore o ne a bolokesegile. Monna yo e ne e le nga—ngaka ya moloi.

<sup>266</sup> Ke ne ka ema ko India . . . ko Aforika mme ka bona dingaka tsa baloi di tla di bo di nkgwetlha jalo, ka mereo ya bone, mme ebile ba nwa madi go tswa mo logateng lwa motho. Go ntse jalo. Go botoka o itse se o buang ka ga sone fa o lebagana le seo. Fela ke bone thata ya Modimo Mothatiolhe e bofa monna yoo go fitlhela a ne a sa kgone go tsamaya. Jalo he ka nako eo, matlho a gagwe a ntse jaaka galase jalo, mme ba mo rwalela kgakala. Ee, rra.

<sup>267</sup> Mokaulengwe, Modimo o popota! Go ntse jalo. Fela Modimo ke Mowa, ga a tswalellwa fela mo go bueng ka diteme, kgotsa *sena, sele, kgotsa se sengwe*. Ke bua gore motho ope yo o . . . Moo ke bothata mo kerekeng fano. Lo a bona, lona . . . Pentekoste e ne ya gakatseg a sena taolo mo selong se le sengwe seo. Ba ne ba ya golo ko bathong . . . Mo boemong jwa go—go baya diatla mo go bone, mme bone ba amogela Mowa o o Boitshepo, ba ne ba ba tlisa golo kwa aletareng mme ba simolola go ba itaya mo mokwatleng ba bo ba goa, “Go bue! Go bue! Go bue!” Mme ba bue lefoko go boeleta le go boeleta, go fitlhela ba nna le tlhakatlhakano mme eseng diteme.

<sup>268</sup> Fa motho wa mmannete wa Mowa o o Boitshepo a tsetswe ke Mowa wa Modimo, o tlaa tshela botshelo jo bo poifoModimo. Bangwe ba banna bao ba ne ba tshela matshelo a a boitshegang, mme lo itse seo, mme maungo a bona a ne a netefatsa gore ba ne ba se jalo. Jesu o ne a re, “Lo tla ba itse ka maungo a bona.” Mme leungo la Mowa ga se go bua ka diteme, moo ke neo ya Mowa.

<sup>269</sup> Petoro ga a ise a re, “Ikotlhaeng, mme lo kolobetsweng ka Leina la Jesu Keresete, lo tlaa amogela Mowa o o Boitshepo.” O ne a re, “Lo tlaa amogela neo ya Mowa o o Boitshepo,” fa ba ne ba utlwa diteme tsena le batho ba bua. Ke nngwe ya dineo tsa Mowa o o Boitshepo tse ba di amogelang. Amen. Go siame. Re tshwanetse re itlhaganele.

### 39. Ke na le basimane ba le babedi (a le mongwe, di le pedi; mme a le mongwe, di le tlhano), mme ba ne ba kgatšiwa. A ba tshwanetse ba kolobetswe ka go tibiswa?

<sup>270</sup> Sentle jaanong kgaittsadi kgotsa mokaulengwe, le fa e le mang yo o leng ene, moo go tswa mo go wena. Ke na le mosetsanyana . . . Mosimanyana wa me, Billy Paul, o ne a le dingwaga di le lesome le borataro, mme ke ne ka mo kolobetsa ka Leina la Morena Jesu gone fano. Mosetsanyana wa me o ne a le dingwaga di ferabobedi. O ne a tla ko go nna mme a nna mo diropeng tsa me, mme o ne a re, “Ntate, ke batla go dumela mo go Morena Jesu Keresete, mme ke—ke batla go kolobetswa.” Mme ke ne ka kolobetsa mosetsanyana fa dingwageng di ferabobedi. Fa, fa bana ba bannyne bao ba batla go kolobetswa, ba kolobetse.

Fa ba sa dire, goreng, fa ba le . . . tswelela pele fela, moo go tswa mo go wena, le fa e le eng se Morena a se buileng.

**40. A e tlaa nna fela bao ba ba nang le kolobetso ya Mowa o o Boitshepo ba ba tlaa nnang mo Phamolong ya Kereke, kgotsa a badumedi botlhe ba tlaa supiwa?**

<sup>271</sup> Ga re . . . ga re na nako go bontsha tshiamo ya seo. Fela, mokaulengwe, ke Monyadiwa fela wa Mowa o o Boitshepo yo o tlaa nnang mo Phamolong. Lo a bona? Baebele . . . ? . . . ba bangwe ga ba tle go timela.

<sup>272</sup> Lebang! Ke mang yo o ileng go atlhola lefatshe? Baitshepi. Daniele o ne a re, “Ke Mmone, a tla ko Mogologolong wa Nako, mme—mme O ne a tla ka dikete di le lesome di ntsifaditswe ka dikete di le lesome tsa Baitshepi ba Gagwe.” A go ntse jalo? Phamolo, Kereke e tsweletse pele. Fong ba ne ba fologa, mme Katlholo e ne ya tlhongwa.

<sup>273</sup> Mme Dibuka di ne tsa bulwa. A go ntse jalo? Mme Buka e nngwe e ne ya bulwa, e e neng e le Buka ya Botshelo, modumedi yo o itshepisitsweng yo o neng a sa amogela Mowa o o Boitshepo.

<sup>274</sup> A Jesu ga a a ka a ruta gore makgarebana a le lesome a ne a tswa go kgatlhantsha Monyadi? Mme ba le batlhano ba bone . . . kgotsa bone botlhe e ne e le kgarebane, ba itshekile, ba le boitshepo. Mme bone, *bana*, ba ne ba robala mme ba sekba ba amogela Mowa o o Boitshepo; mme *bana* ba ne ba amogela Mowa o o Boitshepo mme ba na le Lookwane mo loboneng lwa bone. Mme erile Monyadi a tla, Lentswe le ne la tla, le thela loshalaba, ba ne ba re, “Ao, mpe re tseneng. Re neyeng lengwe la Lookwane la lona!”

<sup>275</sup> O ne a re, “Yaang kwa go bona ba ba rekang, rapelang, Le tseyeng jaanong.” Fela ba ne ba sa kgone. Mme erile ba santse ba tsamaile, ma—makgarebana a ne a tsena mo Selalelong sa Lenyalo, mme ba ne ba lelekelwa kwa lefifing le le kwa ntle, kwa ba neng ba lela ebile ba bokolela le phuranyo ya meno. A Tshenolo, bosigo jo bo fetileng, mo kgaolong ya bo 12, bosigong jwa pele ga jo bo fetileng, ga e a ruta gore kgogela e khubidu e ne ya kgwa metsi mo molomong wa yone go lwantsha *masalela* a Peo ya mosadi, yo neng a na le tumelo mo Modimong ebile a tshegetsa ditaolo tsa ga Jesu Keresete?

<sup>276</sup> Ko go lona basadi, fa lo bay a sekaelo. Ke setoki se se siameng sa matsela, matsela a a tshwanang mo go sone, fela wena o tsaya *jaana* mme o beye sekaelo sa gago fela ka tsela e o ileng go se sega ka yone. Mme fong o a se sega. Moo go tswa mo go wena. Fela o tsaya matsela a o a segileng, go dira seaparo sa gago ka one, mme mo go setseng ga one go a dirisiwa. Ke matsela a a siameng fela jaaka a mangwe a gone, fela ka tlhopho o tlhophile *seo*. A go ntse jalo? Mo go setseng ga one go boitshepo fela ebile go siame fela, ebile go le turu fela jaaka mo gongwe ga one, fela moo e ne e le maikgethelo a gago.

<sup>277</sup> Mme Modimo o solo feditse gore re ya mo Phamolong ka tlhopho! Mme Baebele ne ya re, “Mme baswi ba ba setseng ga ba a ka ba tshela ka dingwaga di le sekete se le sengwe.” A go ntse jalo? Jalo he ke fela . . . Ga o tle go timela, fela Monyadiwa yo o tletseng ka Mowa o o Boitshepo o tlaa tsena mo Phamolong. Ba ba setseng ba bona ba tlaa ralala Katlholo; fa Bone ba sa dira.

**41. Fa e le gore o tshwanetse gore o kolobetswe ka Leina la Jesu, goreng Jesu a ne a tlaa bua mo go Matheo 28 a re, “Kolobetswa ka leina la Rara, Morwa, Mowa o o Boitshepo”?**  
Seo ke fela se ke fetsang go wetsa go se tlhalosa, eo.

<sup>278</sup> Go siame, a lo a lapa? Ke a itse gore lo a dira.

**42. Fela a Modimo ga a na tlhompho mo kolobetsong ya “Rara, Morwa, le Mowa o o Boitshepo”?** A ga go na batho ba ba kolobeditsweng ka leina, ka maina ana, ba ba amogetseng Mowa o o Boitshepo? A Jesu o ne a tla go galaletsa Rara? A kolobetsa ena e ne e ka se lemogiwe?

<sup>279</sup> Ee, Jesu ne a tla go galaletsa Rara. Lebang mo go Moitshepi Johane kgaolo ya bo 14. Nna ke tloga fela . . . Ke na le . . . Fa fela lo tlaa leta go ka nna di le tharo tse dingwe, re tlaa nna le gone go wedswe, ke a dumela. Lebang, fong re nna le dingwe tse dintshwa ka moso, fong, ka gore nna ka nnene ke tlaa nna le dingwe di boa go tloga bosigong jono, ke a dumela. Lemogang, ena ke kereke, le mororo, ena. Re a tswelela.

<sup>280</sup> Lebang, Jesu ne a tla go bonatsa Rara. Lebang, ko tshimologong, Modimo ne a dira motho mo setshwantshong se e Leng sa Gagwe. A go ntse jalo? Sentle, Modimo ke eng? Mowa. Moitshepi Johane kgaolo ya bo 4, Jesu a bua le mosadi kwa sedibeng, O ne a re, “Modimo ke Mowa mme bao ba ba Mo obamelang ba tshwanetse ba Mo obamele ka Mowa le Boammaaruri.” A go jalo? Fa Modimo a ne a dirile motho mo setshwantshong se e Leng sa Gagwe, ke mohuta ofeng wa motho o A neng a mo dira ka nako eo? Motho wa mowa.

<sup>281</sup> Mo go Genesi 2, go ne go sena motho go lema mmu, mme Modimo ne a dira motho ka lorole lwa lefatshe; eseng mo setshwantshong sa Gagwe, fela mo setshwantshong sa botshelo jwa phologolo. Mme O ne a tsenya mowa wa motho mo mothong yona wa phologolo fano, mme o ne a fetoga a nna mowa wa botho o o tshelang. Jaanong, moo ke pharologanyo magareng ga motho le phologolo.

Phologolo ga e age dikoloi, mme ga e dire dilo tse di jaaka go thusa go tshela ga yone, le jalo jalo jalo. Ena ke phologolo, sebatana se se semumu. Ga e na mowa wa botho. Ga e kgone go bala le go kwala. Ga e kgone go bua, go bua. Yone ke sebatana se se semumu.

Fela motho o mo nameng jaaka sebatana, fela o na le mowa wa botho wa Modimo mo go ena, o o mo dirang yo o sa sweng. Mme o kgona go tlhama . . . Lebang se a kgonang go se dira! Ena

o mo go, go batlileng, a lekalekana le Modimo, ka gore ena ke morwa Modimo le e leng mo seemong sa gagwe se se fentsweng. O a gakgamatsa! Mo lebeng! Lo a bona? Ke gone.

<sup>282</sup> Fong erile motho a ne a wa mo nameng . . . Mme fa Modimo a ne a rometse motho yo mongwe fa tlase ko ntleng ga Gagwe, Ena o ne a se yo o tshiamo. Tsela e le esi e Modimo a neng a ka kgona go go dira ka tshiamo e ne e le go tsaya lefelo la motho ka Boena.

<sup>283</sup> Go ka tweng fa ke ne ke dirile gore Mokaulengwe Neville a swele mosadi *yona* fano? Go ka tweng fa ke ne ke dirile gore mosadi *yona* a swele mosadi *yona* fano, fa e ka bo e ne e le gore ke ne ke na le taolo mo godimo ga gago? Ke ne nka se kgone go nna yo o tshiamo mme ke dire seo. Fa ke ne ke boletse loso, mme ke batla gore wena o tshele, ke tshwanetse ke tseye lefelo la gago gore ke go siamise.

<sup>284</sup> Mme foo Modimo, Yo neng a le mo setshwanong sa Mowa . . . a sena setshwano, ke raya moo. Baebele ne ya re, “Modimo ga a na popego epe.” Go siame. Fong Modimo o ne a tshwanela go tsaya popego, mme O ne a tshutifalela kgarebane a bo a tlhola mo go yone Sele ya Madi, ntleng ga tlhakanelo dikobo kgotsa sepe se se amanang le gone, mme a tlhola Sele ya Madi e e neng ya golela ka mo go Morwa Modimo. Mme Modimo ne a fologa a bo a nna mo go Morwae, Keresete Jesu, go neng go Mo dira Modimo mo lefatsheng.

<sup>285</sup> Fa, Moitshepi Johane . . . Thomase ne a re, “Morena, re bontshe Rara, mme go a re kgotsofatsa.”

<sup>286</sup> O ne a re “Ke ntse ke na le lona lobaka lo lo leelee jaana mme ga lo Nkitse?” O ne a re, “Goreng o re, ‘Re bontshe Rara?’” Goreng, O ne a re, “Fa lo Mpona lo bona Rara. Nna le Rrê re Bangwefela. Rrê o agile mo go Nna.”

<sup>287</sup> Mohumagadi fano e se bogologolo, ke ne ke bua foo, ne a tlolela godimo, a re, “Ao, Mokaulengwe Branham,” ne a re, “Ke itse se o se rayang. Bone ba bangwefela, go tlhomame bone ba bangwefela.” Ne a re, “Wena le mosadi wa gago le bangwefela, le lona. Oo ke mohuta wa bongwe o ba leng one.”

<sup>288</sup> Ke ne ka re, “Ke kopa o intshwarele,” ke ne ka re, “ga ba jalo.” Ke ne ka re, “A o a mpona?”

Ne a re, “Go tlhomame.”

Ka re, “O bona mosadi wa me?”

Ne a re, “Nnyaya.”

<sup>289</sup> Ke ne ka re, “Foo! Fong bone ba mo bongwefeleng jwa mohuta o o farologaneng go na le se nna le mosadi wa me re leng jone.” Lo a bona? Ke ne ka re, “Go ntse jalo.”

<sup>290</sup> Jesu ne a re, “O ka se kgone go Mpona ntleng le go bona Rara.” Go tlhomame ga go jalo! Ke karolo ya bobedi ya rula ya

difutu tse tharo, rula e e tshwanang. Ke Modimo. Jesu Keresete o ne a le kana Modimo kgotsa motsietsi yo mogolo go feta yo lefatshe le kileng la nna nae.

<sup>291</sup> Reetsang! Mosadi ne a nthaya a re e se bogologolo, ne a re, "Ke tlaa go netefaletsa," mosadi wa Christian Science. Jaanong, tsala ya Christian Science, nnang masisi motsotso fela, lo a bona. Ba ne ba re, "Ke tlaa go netefaletsa gore O ne a se sepe fa e se motho." Ne a re, "O baya tumiso e ntsi thata mo go Jesu."

<sup>292</sup> Ke ne ka re, "Fa ke ne ke ipelafatsa motshegare le bosigo ke ne nka se kgone go Mo naya se se neng se tla ko go Ena." Ke ne ka re, "Ga e kgane . . ."

<sup>293</sup> Goreng, Isaia o ne a leka go Mo taya leina, o ne a re, "Ena ke Kgakgamatso, Mogakolodi, Kgosana ya Kagiso, Modimo Mothata, Rara wa Bosakhutleng." Gotlhe ga seo! "Ena ke Alefa, Omega, Tshimologo le Bokhutlo, Motswe le Lotsalo la ga Dafita, Naledi ya Masa e e Phatsimang; Rara, Morwa, le Mowa o o Boitshepo." "Mo go Ena go nna botlalo jwa Bomodimo ka mmele," ne ga bua Baebele. Botlalo jwa Modimo bo ne bo le mo go Ena!

<sup>294</sup> O ne a re, "Ke tlaa go bolelala, fa a ne a ile go rapelela Lasaro, go tsosa Lasaro," ne a re, "Ke tlaa go netefaletsa gore o ne fela a le motho."

<sup>295</sup> Ke ne ka re, "A re go bone o go dira!"

<sup>296</sup> Ne a re, "Baebele ne ya re, 'O ne a lela.' Mme moo go supa gore o ne a le motho, o ne a kgona go lela."

<sup>297</sup> Ke ne ka re, "Go tlhomame, yoo e ne e le Morwa yo neng a lela."

<sup>298</sup> O ne a le Modimo-Motho. O ne a le setshedi se se gararo fela jaaka nna ke ntse, wena o ntse; rona re mowa wa botho, mmele, le mowa. E ne e le Rara, Morwa, le Mowa o o Boitshepo, mo Bomodimong jwa Modimo; yoo ke Yo A neng a le ene. O ne A le Bomodimo ka Sebele! A ka dira sepe jang foo fa ba . . . Bana ba e Leng ba Gagwe ba ne ba lelela Madi a Gagwe? Fa e ka bo e ne e le sengwe se sele . . . Bao e ne e le bana ba e Leng ba Gagwe ba ba neng ba lelela Madi a Gagwe; ga e kgane A ne a ba lelela. Monna a ka dira jang . . . mme bana ba e Leng ba Gagwe ba lelela Madi a Gagwe, O ne a ka ikutlwang jang? Kana a ba athholele gore ba ye diheleng ka bosafeleng, kgotsa a neye botshelo jwa Gagwe; O ne a le Modimo a neela botshelo jwa Gagwe ka ntsha ya bana ba Gagwe! Bomodimo bo ne bo agile mo go Ena! Yoo ke Yo A neng a le ene.

<sup>299</sup> Mosadi ne a re, "Leba," ne a re, "Moruti Branham, ke tlaa go netefaletsa! Erile a lela, go ne ga netefatsa gore o ne a le motho."

<sup>300</sup> Ke ne ka re, "Mohumagadi, O ne a le motho fa A ne a rape- . . . kgotsa fa A ne a lela, go ntse jalo. O ne a le motho fa A ne a lela, fela erile A ne a tlhamalatsa mmelenyana wa Gagwe

o o koafetseng mme a bolelela monna yo neng a sule malatsi a le manê, ‘Lasaro, tlaya kwano!’ Mme monna yo neng a sule malatsi a le manê, ebile a bodile, mme diboko tsa letlalo di gagaba mo gare ga gagwe, go bola go ne ga itse Mong wa gone mme mowa wa botho o ne wa itse Motlhodi wa one, mme monna yo neng a sule malatsi a le manê ne a ema ka dinao tsa gagwe mme a tshela gape! Moo e ne e le mo go fetang motho!”

<sup>301</sup> O ne a le motho fa A ne a fologa mo thabeng bosigong joo, a tshwerwe ke tlala, a leba leba mo setlhareng go bona sengwe sa go ja. O ne a le motho fa A ne a senka sengwe go se ja mo setlhareng seo sa mofeige. Fela erile A ne a tsaya dipapetlana tsa senkgwe di le tlhano le ditoki tse pedi tsa ditlhapi a bo a fepa dikete tse tlhano, moo e ne e le mo go fetang motho! Moo e ne e le Modimo teng moo! Ena Motlhodi Yo neng a kgona go tsaya tlhapi e e apeilweng a bo a e nathoganye mme e ne e santse e le tlhapi e e apeilweng, ne a tsaya senkgwe se se besitsweng mme a se nathoganya; ke mohuta ofeng wa athomo e A neng a e golola? Aleluya! O ne a le Modimo, Motlhodi wa diathomo le dilo tsotlhe! Moo go ne go le mo go fetang motho!

<sup>302</sup> O ne a le motho fa A ne a le golo koo mo mokorong oo bosigo joo, morago ga go rera letsatsi lotlhe le go fodisa balwetsi, a lapile thata, go fitlhela bodiabolo ba le dikete di le lesome ba lewatle ba ne ba ikana gore ba tlaa Mo nwetsa. Mokoronyana oo wa kgale golo koo, o tlolaka go dikologa jaaka sethibo sa lebotlele, makhubu a magolo a pekenya go tloga lefelong go ya lefelong, mme Ena a dutse, a lapile thata go tsamaya makhubu a ne a sa Mo tsose. Bodiabolo ba ne ba rora, ba re, “Re tlaa mo tsaya jaanong fa a santse a robetse.” Fela erile A tsoga, a tsoga foo, O ne a le motho, O ne a lapile thata. Fela erile A ne a baya lonao lwa Gagwe mo dithapong tsa go bofa diseile tsa mokoro, a leba kwa ntle mme a re, “Kagiso, sisibalang!” mme diphefo le makhubu di ne tsa Mo utlwa. Moo go ne go le mo go fetang motho! Moo e ne e le Modimo, Motlhodi Yo o dirileng Magodimo.

<sup>303</sup> Ga e kgane moapostolo a ne a re, “Yona ke motho wa mohuta mang yo diphefo le makhubu di Mo obamelang!”

<sup>304</sup> Yoo e ne e le mo go fetang motho. Yoo e ne e le Modimo. O ne a le motho fa A ne a kokotetswe mo sefapaanong e le Setlhabelo, go tlosa boleo. O ne a le motho ka dipekere tse di neng di kokotetswe mo seatleng sa Gagwe. O ne a le motho ka mitlwa mo godimo ga tlhogo ya Gagwe. O ne a le motho ka mathe a tshotlo ya masole mo go Ena. O ne a le motho yo neng a ketekilwe, a iteilwe, ebile a le matsanko. O ne a le motho! O ne a le motho fa A ne a goa, “Modimo wa me, gobaneng O Ntatlhile?” O ne a le motho a lelela thuso. Fela mo mosong wa Paseka fa dikano tsa loso di ne di bofologa foo fa lebitleng, moo e ne e le mo go fetang motho! O ne a netefatsa gore O ne a le Modimo.

Go tsheleng, O nthatile; go sweng, O mpolokile;  
 Go fitlhweng, O rwaletse maleo a me kgakala  
     kgakala;  
 Go tsogeng, O ne a siamisetsa ruri mahala:  
 Letsatsi lengwe O etla—ao, letsatsi le le lengwe  
     le le galalelang!  
 Ao, gare mafika a a thubegang le mawapi a a  
     fifalang,  
 Mmoloki wa me o ne a oba tlhogo ya Gagwe  
     mme a swa;  
 Lesire le le bulegang le ne la senola tsela  
 Go ya maipelong a Legodimo le motlha o o sa  
     feleng.

<sup>305</sup> Ga e kgane Eddie Perronet a ne a goeletsa:

Botlhe kuang thata ya Leina la Jesu!  
 Mpe baengele ba we ba rapame;  
 Tlisang fa pontsheng korone ya bogosi,  
 Mme le Mo rwerseng korone e le Morena wa  
     botlhe.

<sup>306</sup> Yoo ke Motho yo mogolo yoo, Morena Jesu. O ne a le Jehofa, Modimo a sirenile mo nameng. Baebele ne ya re, “Le fa e ka nna eng se o se dirang ka lefoko kgotsa ka tiro, di dire tsotlhe ka Leina la Gagwe.” Baebele ne ya re, “Lelwapa lotlhe ko Legodimong le teilwe ‘Jesu,’ le lelwapa lotlhe mo lefatsheng le teilwe ‘Jesu.’” A re rape leng ka Leina la Gagwe, re tshole ka Leina la Gagwe, re rute ka Leina la Gagwe, re swe ka Leina la Gagwe, re fitlhwe ka Leina la Gagwe, re kolobetswe ka Leina la Gagwe, re tsoge ka Leina la Gagwe, re ye Legodimong ka Leina la Gagwe. Leo ke Leina la Gagwe, mme Monyadiwa wa Gagwe o teilwe “Mmê Jesu.” Go tlaa ntsha batho mo Baditšhabeng, ka ntlha ya Leina la Gagwe.

<sup>307</sup> Mme nna ga ke wa Oneness. Nnyaya, rra. Lona batho ba medimo e meraro tlosang seo mo go lona. Nna ga ke wa Oneness. Nnyaya, rra. Ga ke wa Oneness, le e seng wa medimo e meraro. Ke dumela se Baebele e se buang. Moo go nepile. Amen. Whew! Ke tsena mo gontsi thata mo go e le nngwe. Moo e ne e le eng? A ke ne ka go ntsha? Kgotsa, mpe re boneng, e ne e le eng? Ao, ee, go ntse jalo, ka ga . . . ka fa Rara a neng a le mo go Keresete ka gone. O ne a le Motho, O ne a le Modimo-Motho.

**43. A kereke ya Pentekoste ga e kolobetse ka Leina la Rara, Morwa, le Mowa o o Boitshepo?** Bangwe ba bone.

**44. Fa motho a swa ntengleng ga kolobetso ya Mowa o o Boitshepo, a ena o tlaa timela?**

<sup>308</sup> Nnyaya, rra. Fa e le modumedi, o tlaa tla mo tsogong, tsogo ya bobedi. O na le kolobetso, o tlaa tsena mo tsogong ya ntlha. Jaanong, o tshwanetse o batle go tsaya lefoko la me. Fa moo go sa kgotsofatsa, fong wena—wena o mpotse, ke tlaa go naya

Lekwalo. Ka gore, ke leka go tsaya tsena tse pedi kgotsa tse tharo tse dingwe fano, fong re feditse.

#### **45. Mokaulengwe Bill, a Baebele e bua sengwe ka ga go betšha?**

<sup>309</sup> Ee, E a dira, fela ga ke kgone go go bitsa gone jaanong. Ke a itse masole a ne a betšhetsa diaparo tsa Gagwe, le jalo jalo jalo, fela ga ke kgone go bua.

#### **46. A o tlaa tlhalosa Bakorinthe wa Ntlha 15:29?**

<sup>310</sup> Go ntseele teng foo, fa o tlaa dira, Mokaulengwe Neville, Bakorinthe wa Ntlha 15:29. Re tlaa e tsaya.

<sup>311</sup> Jaanong, mme gongwe ka moso nka kgona go lo bonela seo gape. Jaaka ma . . . Ditlhaka tseo, ka fa go peletwang ka gone, “VICARIVS FILII DEI.” Fa o go eletsa, nkitsise.

#### **47. A seporofeto sa ga Esekiele 38 le 39 se tlaa diragadiwa pele ga Phamolo?**

<sup>312</sup> Ga ke akanye. Ke akanya gore selo se se latelang se re se solofelang ke Phamolo ya Kereke. Mme fong gore, “fa Goge le Magoge di fologa,” ke masole a Marašia a a tsenang fa . . .

<sup>313</sup> Lebang, Rrê Bohanon o ne a tlwaetse go nna mookamedi fano wa Public Service Company, monna yo o siameng thata wa Mokeresete. Mme o ne a bua le nna letsatsi lengwe, o ne a re, “Billy, ke lekile go bala, mme ke ne ka leka go kopa modisa phuthego wa me go tlhalosa Tshenolo.” Ne a re, “Re ne ra fitlha golo koo mme re ne ra Go tlhakatlhakanya gotlhe.” Ne a re, “Johane o tshwanetse a bo a ne a ja sengwe—sengwe bosigong joo mme a nna le toro.”

Ke ne ka re, “Rrê Bohanon, tlhajwa ke ditlhong.” Ke ne ka re . . .

O ne a re, “Sentle, ga go ope yo o ka tlhaloganyang Seo.”

<sup>314</sup> Ke ne ka re, “Eseng motho ope wa tlholego, fela Mowa o o Boitshepo o kgona go Go senola.”

<sup>315</sup> O ne a re, “Sentle, leba kwano, Billy.” O ne a re, “Monyadiwa o ne a eme mo Thabeng ya Sinai. Mme fano go ne ga nna le metsi a a neng a pomponyega go tswa mo molomong wa kgogela, go lwantsha—lwantsha Monyadiwa. Mme Monyadiwa o ne a le ko Legodimong ka nako e e tshwanang. Tlhaloganyang seo!”

<sup>316</sup> Ke ne ka re, “Rrê Bohanon, selo se le nosi se o nang naso, o na le dilo di le tharo tse di farologaneng di tlhakatlhakantswe, o go bitsa ‘Monyadiwa.’ O bitsa ba ba *dikete di le lekgolo le masome a mané le boné*, ba ba neng ba eme le Kwana mo Thabeng ya Sinai, ‘Monyadiwa.’ Ba ne ba se jalo. O bitsa (ene yo o tlhatsitseng metsi mo molomong wa gagwe, go lwantsha) *masalela* a Peo ya mosadi, ba ba neng ba se Monyadiwa; moo e ne e le ba ba neng ba setse. Monyadiwa o ne a le ko *Legodimong*; ba ba *dikete di le lekgolo le masome a mané le boné foo*; mme Mokeresete ka leina fela a neng a tsamaya *fano* go ralala pogiso. Mme go ntse jalo.”

<sup>317</sup> Bala, mokaulengwe, jaanong fa o na le gone. [Mokaulengwe Neville o bala Bakorinthe wa Ntlha 15:29—Mor.]

[*Fa go sa nna jalo ba ba kolobeletswang baswi ba tlaa dira eng, fa baswi ba sa tsoge gope? goreng bone ka nako eo ba kolobeletswa baswi?*]

<sup>318</sup> Jaanong, jaanong, bakaulengwe, go na le batho ba le bangwe—bangwe ba ba dumelang seo, ba kolobeletsa baswi, bao ke Mormon. Mme ke ile ka ya mo ditempeleng tsa bone, nako tse dintsi, bone ke batho ba ba siameng thata. Mme o ka tswa o le mo Mormon, jaanong. Ga ke leke go utlwisa maikutlo a gago bothhoko. Fela, tsala ya me e e rategang, ga o kake wa kolobeletswa rraago; eo ke tiro e ena a neng a tshwanetse go e dira. “Tsela e setlhare se sokameng ka yone, eo ke tsela e se wang ka yone.”

Paulo, a bua fano, ne a bua ka ga “baswi,” Jesu Keresete, “fa baswi ba sa tsoge, goreng lo kolobetswa ka Leina la Jesu Keresete fong fa baswi ba sa tsoge?” Lo bona se ke se rayang? Fong wena o . . . O ne a re, “A re jeng, re nweng, mme re tlhapelweng, gonne kamoso re a swa, fa baswi ba sa tsoge.” Fela o tswelela pele a bo a galaletsa Modimo ka ntlha ya tsogo ya baswi. Mme re kolobeletswa ka mo go Jesu Keresete, mo losong lwa Gagwe, phitlhong, le tsogong. Ke sone se re kolobeletswang “baswi.” Go siame.

Ke a dumela, jaanong, mona ke fela go ka nna e le nngwe e nngwe morago ga ena.

**48. Mokaulengwe Bill, tsweetswee mpolelele ka fa nka—nka amogelang kolobetsa ya Mowa o o Boitshepo ka gone. Ke ka thapelo, botshelo jo bo ineetseng, go O amogela jaaka re dira phodiso? Ke itse se go leng sone go nna le tumelo ya phodiso fa o ne o nthapelela fano. A o a rapela o bo o baya diatla, o direla kolobetsa ya Mowa o o Boitshepo? Ke ne ka kolobetswa ka leina la “Rara, Morwa, le Mowa o o Boitshepo.” Tsweetswee mpolelele fa ke tshwanetse go kolobetswa gape ka Leina la Jesu, jaaka o buile sešeng.**

Jaanong, tsala ya me e e rategang ya Mokeresete, ga ke go bolelele se o tshwanetseng go se dira. Nna ke ranola fela Lekwalo. Mme lo itse se, ka fa Mowa o o Boitshepo o ka kgonang go tla gone jaanong fa re santse re bua. Mowa o o Boitshepo ke neo ya Modimo. Lo a bona? Moo ke neo ya Modimo. E ka tla fa re santse re bua. Mme ke tlaa go bolelela, fa . . . Fa batho ba ne ba rutilwe sentle, . . .

Bangwe ba lona mabutswapele fano, mpe ke lo botseng sengwe, lona mabutswapele a a ntseng a le mo motlaaganeng. Elang tlhoko fa ke kolobetsa batho. Mme lona badiredi lo tseye sena go nna sekai. Ke rutile batho bao go fitlhela ba ne ba phepafaditse botshelo joo pele ga ba ne ba ya ko metsing ao, mme ke ne ke ba dirile gore ba dumele gore Modimo o ne a tlamegile

go tshegetsa tsholofetso ya Gagwe; ka bonako fa ba sena go kolobetswa ka Leina la Jesu Keresete, Mowa o o Boitshepo o ne o le gone foo go go amogela. Mme erile ba ne ba tswa mo metsing, ba ne ba amogela Mowa o o Boitshepo. Go ntse jalo. Fa fela lona . . .

<sup>319</sup> Badisa, rutang dinku tsa lona, ba tsenyeng mo Baebeleng *fano*. Tlogang mo bukeng eo ya kgale ya thuto ya kereke nngwe, mme lo fologele *fano* mo Baebeleng kwa Modimo a rutileng gone, mme ga lo tle go nna le mathata ao.

<sup>320</sup> Ee, go bewa ga diatla ke ka fa re kgonang go amogela Mowa o o Boitshepo, ka motho mongwe yo o tloditsweng a beya diatla.

**49.** **Mokaulengwe Bill, gone ke . . . A go tswile mo tolamong gore mongwe a emelele a bo a neela melaetsa ka diteme fa moreri a santse a neela le . . . Lefoko?** Motho yona o na le dipotso tse tharo *fano*.

**49b.** Mme e nngwe ke: **Gape, a go tswile mo tolamong go dira ka tsela e e tshwanang fa piletso aletareng e dirwa?**

**50.** Ya boraro, ya boraro: **Gape, gone ke go tswa mo . . . A gone ke go tswa mo tolamong gore mongwe a eme mo kerekeng mme a kgalemelele modiredi sengwe se a se buileng kgotsa a se dirileng mo nakong ya tirelo, mme ene a le fa morago ga lomati le le boitshepo?** Dilo tsotlhe tsena di dirilwe fa motlaaganeng makgetlo a le mmalwa.

<sup>321</sup> Jaanong, mpe ke gorogeng kwa go sena gone ka bonako jaanong, sena se e leng sa kereke jaanong. Nna . . . Jaanong, go lona baeng mo dikgorong tsa rona, ke tshwanetse ke neye kereke go tladimolwanyana jaanong, jalo he wena—wena fela ka mohuta mongwe o eme motsotso, lo a bona, fa lo tlaa dira.

<sup>322</sup> Reetsang, bana ba me! Dineo tseo di dintle. Ga go ope yo o itseng ka fa ke lo itumelelang ka gone, mme ke lo rata ka lorato lwa bomodimo. Fela dineo tseo di ka nna kgobalo mo go lona fa lo sa di dirise mo lefelong le le nepagetseng.

<sup>323</sup> Lebelelang batho gompieno, banna ba ba siameng thata ko ntle mo botlhabanelong, ba rapelela balwetsi ebile ba go dueidisetsa madi. Moo go phoso. Fa motho a na le tumelo ya phodiso le go rapelela balwetsi, o tshwanetse a ka bo a le lekau mo go lekaneng go rapelela batho ntleng ga go lopa madi. Leboga Modimo! Mokaulengwe, ke batla go bua seo, eseng ka ntlha ya me, fela ka ntlha ya kgalalelo ya Modimo, ga go nako e le nngwe e ke kileng ka tsaya madi mo bathong, kgotsa sepe se se jalo; ebile ke ganne, jaaka go kwadilwe ka dithhaka, sedikadike, didolara di le dikete di le makgolo a matlhano, mo moneelong o le mongwe. Mme lo a go itse; ne e le gone *fano*, pampiri. Lo a bona? Go ntse jalo. Ga se ga . . . Fa o dira seo, o ile go latlhegelwa ke tumelo ya gago golo ka kwa le Modimo.

<sup>324</sup> Jaanong lona batho ba lo buang ka diteme mme lo na le dineo tsa diteme, Modimo a le segofatseng. Lo a tlhogega mo motlaaganeng ona. Ke lo batla fano. Fela, jaanong, se—selo se mo tolamong, lo seka lwa ba lwa go dira fa moreri a sантse a rera. Fa o dira, o tswile mo tolamong. Lo a bona? Ga o a tshwanelo go go dira. Gonno Baebele ne ya re, “Mowa wa moporofeti o fa tlase ga taolo ya moporofeti.” Mme fa motho a rera, o na le taolo, o na le bareetsi, Mowa o o Boitshepo o ile go bua ka ena. Nako e a feditseng, fong ke nako ya molaetsa, lo a bona. Jalo he lo seka lwa tswa mo tolamong; fa o dira, fong o a kgaupetsa mme o tlaa—o hutsafatsa Mowa o o Boitshepo ka molaetsa oo tswelelang.

<sup>325</sup> Fano e se bogologolo, ke ne ke le mo bokopanong golo fano golo gongwe ko Washington, batho ba le dikete tse dintsi ba ne ba dutse foo. Mme motsamaisi wa me, yo e leng mosenodi wa mmannete wa Baebele, o ne a eme foo a bua ka phodiso ya Semodimo, a tloditswe, Mowa o o Boitshepo o ne o bua. Mohumagadi o ne a emelela a bo a simolola go bua ka diteme, mme o ne a leta motsotso fela, fong o ne a simolola go tswelela. Mowa o o Boitshepo ne wa simolola . . . o utlwile botlhoko, o ne o kgona go go bona mo gare ga batho. O ne a simolola go bua gape, mme o ne a tsoga. O ne a re, “Kgaitsadi, dula faatshe, ka Leina la Morena.” Ne a re, “O tswile mo tolamong.” Mme badiredi ba ne ba isa mosadi yo golo kwa mme ba mo itsise.

<sup>326</sup> Jaanong, se go leng sone, dineo tseo di mo lefatsheng, tsone di mo kerekeng jaanong. Dineo di mo kerekeng, fela bana ba ba nnye ba ba tlhomolang pelo ba amogela dineo tseo mme ga ba na thuto go itse ka fa ba ka go laolang ka gone. Fa o ka go laola ka go fosa, o tlaa dira tshenylo e ntsi go na le ka fa o tlaa dirang molemo ka gone. Lo a bona?

<sup>327</sup> Fela jaaka monna a tswela ntle, a rapelela balwetsi mme mongwe a fodisiwa, a re, “Jaanong, o tshwanetse o nneye didolara di le sekete ka ntlaa ya gone.” Jaanong, o dirile tshenylo e ntsi go na le ka fa a dirileng molemo ka gone. Go ka bo go nnile botoka fa monna yo a ne a tsweletse pele mme a swa mo boemong jwa go tlisa kgobo e e kalo mo maikaelelong a ga Keresete.

<sup>328</sup> Jaanong, fa wena . . . Fa modisa phuthego kgotsa moefangedi, kgotsa le fa e le mang yo e leng ene, a rera, didimala. Paulo ne a re go dirwe seo, lo a bona. Jaanong, mme fong o ne a re, “Lo ka nna lwa bua lotlhe, ka monokela.” Moo ke boammaaruri mo go lekaneng. Mme o ne a re, “Ke tlaa rata gore lotlhe lo bue ka diteme. Moo go molemo.”

<sup>329</sup> Fela ga o kake wa bua ka diteme fa e se o na le neo ya diteme. Mme ga go pelaelo epe gotlhelele fa e se gore go na le dineo di le dintsi tsa seo mo kerekeng ena jaanong. Go na le dineo di le dintsi tsa gone ka kwano mo kerekeng ya Methodisti, go na le di le dintsi tsa gone ka kwano mo kerekeng ya Baptisti, fa go ne go rerwa fela gore neo e kgone go simolola go bereka.

<sup>330</sup> Jang? Fa o tsenya peo mo mmung mme o sa e tlhokomele, e ile go diragalelwā ke eng? Lo a bona, e tlaa dula foo mo loroleng le le omeletseng, e bo e bola; ga e tle go solegela molemo ope. Dineo tsena di nnile di le mo kerekeng nako yotlhe, fela jaanong metsi a simolola go fologa, pula ya Pentekoste, go e nosetsa le go ungwa leungo. Jaanong, go diriseng mo lefelong le le nepagetseg.

<sup>331</sup> Jaanong, ya re, sentle, ke dumela gore potso e e latelang e ne e le foo, motho yo o boditseng, ne a re:

### Fa ba . . . fa ba dira piletso aletareng?

<sup>332</sup> Nnyaya, nka se akanye ka nako eo. Fa lo lemogile, mme lo tseyeng Bakorinthe le bo le e bala, bangwe ba lona fano, fa—fa lo na le dineo tsa go bua ka diteme, fong lo eleng tlhoko. Mo Baebeleng, fa ba ne ba na le . . . morago ga tirelo e sena go fela, tshegofatso ya Modimo e ne ya fologela mo phuthegong, fong ba ne ba simolola go bua, fong ba ne ba simolola go godisa Modimo. Mme, nako nngwe le nngwe, ke molaetsa o o lebaganeng le mongwe. E seng . . . O tshwanetse o tlhokomele seo jaanong. Lo a bona? Ga se fela sengwe mo nameng. E tlaa bo e le molaetsa ko mongweng, gore mongwe a dire sengwe, kgotsa sengwe go nonotsha kereke. E tlaa bo e le sengwe go galaletsa kereke.

<sup>333</sup> Foo ke kwa batho ba Mapentekoste ba tlisitseng kgobo mo leineng la bone. Lone leina *Pentekoste*, o ka go umaka mme batho ba tlaa tsamaya fela mme ba re, “Diphirimisi,” ka gore ba bone go tswelela mo gontsi; mo e leng gore, batho ba le mo bopelophepeng fela ba ne ba sa rutwa.

<sup>334</sup> Paulo ne a re, “Fa ke tla mo kerekeng ya Pentekoste ka koo,” ne a re, “Ke tlaa e tlhoma mo tolamong.” Go tshwanetse go nne mo tolamong, mme sengwe le sengwe se tshwanetse se diriwe ka tolamo, fela jaaka Mowa o laolwa. Jalo he o ne a re, “Jaanong, fa lo tsena, mme lona lotlhe lo simolola go bua ka diteme; mme yo o sa rutegang a tsena, o tlaa re, ‘Sentle, a lotlhe ga lo tsenwe?’; a tswe.”

<sup>335</sup> Seo ke fela se kereke ya Pentekoste e se dirang. O ne a re, “Jaanong, mo boemong, fa mongwe wa lona a porofeta ebile a senola diphiri tsa sengwe, (mongwe wa lona go nna moporofeti, ka mafoko a mangwe),” o ne a re, “fong a batho ga ba tle go wela faatshe mme ba re ‘Modimo o na le lona?’”

<sup>336</sup> Sentle, nka gana jang neo ya go bua ka diteme fa ke tlaa tshwanela go gana neo ya seporofeto, ke tlaa tshwanela go gana dineo tse dingwe tsena? Jaanong, bontsi jwa dikereke, dikereke tse ditona, Nasarene, Pilgrim Holiness, le jalo jalo, ba akanya gore fa motho a bua ka diteme ena ke diabolo. Moo ke tlaphatso kgatlhanong le Mowa o o Boitshepo, mo e leng gore ga go na boitshwarelo. Seo ke se Bajuta ba se dirileng, ba ne ba sotla batho ba ba nang le Mowa o o Boitshepo, mme ba ne ba atlholwa ba bo ba timela, ka ntlha ya gone. Go nepile! A Jesu ga a a ka a re, “Fa o bua lefoko le le lengwe kgatlhanong le Mowa o

o Boitshepo, ga lo kitla lo go itshwarelwa mo lefatsheng lena kgotsa lefatsheng le le tshwanetseng go tla”? Jalo he ela tlhoko; fa o sa thaloganye, nna o tuuletse.

<sup>337</sup> Mme lona batho ba lo nang le Mowa o o Boitshepo mme lo bileditswe ka mo dikantorong, baruti...Jaanong, a o ka gopola...nna ke yona ke eme fano ke leka go ruta, mme fano go tlolela monna ko godimo, letlhakoreng la me, mme a simolole go ruta gone ka nako e e tshwanang, monna yo mongwe a eme golo fano a opela pina ya jubile? Sentle, a tlhakatlhakano!

<sup>338</sup> Sentle, eo ke tsela e go leng ka gone ka ga go bua ka diteme. Mpe go tle ka tolamo, fela jaaka Mowa o tlaa go naya, o ka bua ka diteme.

<sup>339</sup> Jaanong wa re, “Sentle, Mokaulengwe Branham, ga ke kgone go go thibela.”

<sup>340</sup> Ao, ee, o ka kgona! Paulo ne a re o ka kgona. O ne a re, “Fa go na le mongwe wa lona, mo gare ga lona, yo o buang ka diteme, mme go se na mophutholodi, a ena a didimale.” Go sa kgathalesege gore ke ga kae e batlang go bua, didimala. Moo ke neo, mokaulengwe. Ke—ke a rapela, Modimo o tlaa ntetlelela ke nne le tsosoloso fano mangwe a malatsi ano gore re kgone go tsena mo dilong tseo ka nthla ya lona, lo a bona. Kwa o kgonang go bona gore ke neo, mme neo eo e batla go dira nako yotlhe. Lo a bona? Fela o tshwanetse o nne le bothale jwa Mowa o o Boitshepo fano go itse gore leng le ka fa o tshwanetseng go tsamaisa neo eo ka gone. Mme moo . . .

<sup>341</sup> Wa re, “Sentle, kgalalelo go Modimo, Baebele e rile fa Mowa o o Boitshepo o tlide ga o tlhoke moruti ope. Ena ke Moruti ka Boene.” Ao, mokaulengwe, o ka nna monnye jang go bala Lokwa....Goreng Mowa o o Boitshepo o tlhomile baruti mo kerekeng, fong?

<sup>342</sup> E re “Ga ke tshwanele go nna le ope go nthuta. Mowa o o Boitshepo o a nthuta.” O a dira, ka moruti. O tlhomile baruti mo kerekeng.

<sup>343</sup> O ne a re, “A botlhe ke baruti, a botlhe ke baapostolo, a botlhe ke dineo tsa phodiso?” Mowa o o Boitshepo o tlhomile dilo tsena mo kerekeng, mme O di berekisa tsotlhe, mme nngwe le nngwe ya tsone e bereka ka tolamo.

<sup>344</sup> Jaanong go fela jaaka lonao lwa me; lengwe la one le re, “Ke ya ka tsela *ena*,” le lengwe le re, “Ke boela morago ka tsela *ena*.” Jaanong, o ile go dira eng? Seatla se ne sa re, “Ke ile go tlhatloga,” mme le sengwe le tsamaya tsamaya ka tsela ena. Ke mohuta ofeng wa popego o mmele o ileng go tsena mo go one? Lo a bona?

<sup>345</sup> Fela, jaanong, fa monagano fano o re, “Lonao, tsamaela pele, lona loobabedi. Seatla, o tsamaye le one. Tlhogo, o nne o tlhamaletse. Mabogo, o dire mo go tshwanang,” sengwe le sengwe

se tsamaya ka thokgamo. Jaanong, fa ke fitlha koo, ga ke a dirisa mabogo a me. Jaanong, lonao lo dirile tiro ya lone, modisa phuthego o feditse go rera; jaanong, mabogo, lo dire tiro ya lona. Lo a bona? Lo bona se ke se rayang?

<sup>346</sup> Sentle, go ka tweng fa mabogo a ne a otlolola *jaana*, “Ao, yone e ko kae? E ko kae?” mme dinao di rera? Lo a bona, wena ga o ise o fitlhe koo ka nako eo. Lo a bona, didimala, lebogo; go tlala bo go le nako gore wena o dirisiwe morago ga sebaka; leta go fitlhela o goroga ka koo. Lo bona se ke se rayang? Moo ke neo, moo ke neo ya Mowa e bereka.

<sup>347</sup> Ke rata Morena. A ga lo dire? Amen. Reetsang, ke itse selo se le sengwe se nka se lo bolelelang, lona go tlhomame lo na le bopelotelle; metsotso e le masome a mabedi morago ga lesome. Jaanong, ditsala, lebang fano jaana jaanong. Nna... Mona ke bojotlhe jwa kitso ya me. Ke tshwanetse ke ithaganele go ralala segopa se segolo sa tsone jalo. Fa nna... Fa lo sa dumalane le seo, lo se ka lwa nngalela. O nne mokaulengwe wa me, lo a bona. Ke a go rata, mme ke bua fela dilo tsena ka gore moo go mo pelong ya me. Seo ke se ke se dumelang, mme eo ke tsela e ke go tlhalosang ka yone, mme eo ke tsela e ke go tlisang ka yone, ke go tswa mo Baebeleng.

<sup>348</sup> Jaanong, fa o re, “Mokaulengwe Branham, nna fela ga ke go dumele ka tsela eo.” Moo go tlaa siama ka boitekanelo, lo a bona. Ga re kitla re akanya pharologanyo epe, re tlaa tswelela fela gone kwa pele re le bakaulengwe le ditsala.

<sup>349</sup> Mme—mme fa o re, “Sentle, ke—ke dumela gore fa ke le leloko la kereke ya Methodisti kgotsa kereke ya Baptisti, ke tlaa bolokesega le fa go ntse jalo.” Go siame, mokaulengwe, moo go siame ka boitekanelo. Ke santse ke go bitsa “mokaulengwe wa me,” ka gore o dumela Jesu Keresete. Lo a bona? Go ntse jalo. Jalo he re ile go nna bakaulengwe le ditsala go tshwana fela.

<sup>350</sup> Fela ke baya fela golo mo kerekeng ena, malatsi a le mmalwa ana fano, Thuto e kereke ena e e emelang. Lo a bona? Seo ke se kereke e se emelang! Mme fa go na le motiakone fano yo o sa dumeleng mo kolobetsong ka Leina la Jesu Keresete, le kolobetso ya Mowa o o Boitshepo, kgotsa dineo tsa Mowa di bonatswa, motiakone yoo, gone fano fa ke santse ke eme fano, ga a tshwanelwe ke go nna mo kerekeng go fitlhela a siamisiwa. Go ntse jalo totatota. Mme lekgotla le tshwanetse le tlhokomele seo. Totatota! Kereke ena ga e laolwe ke batiacone; kereke ena e laolwa ke Baebele le Mowa o o Boitshepo, di le nosi. Ee, rra. Jaanong, jalo he dilo tseo, re dumela gore moo ke Thuto ya kereke ena.

<sup>351</sup> Ga re na boloko bope gotlhelele. Ga go ope yo o leng leloko fano, fela mongwe le mongwe yo o tlhang ke leloko, gonne re dumela gore rotlhe re maloko a Mmele o le mongwe ka kolobetso ya Mowa o o Boitshepo.

<sup>352</sup> Mme re a go patika, mokaulengwe kgotsa kgaitsadi wa me yo o rategang wa Mokeresete, gore o kolobetswe ka Leina la Jesu Keresete mme o amogele Mowa o o Boitshepo. Fa o setse o amogetse Mowa o o Boitshepo, morago ga o sena go kolobetswa ka leina la Rara, Morwa, Mowa o o Boitshepo, Modimo a go segofatse! Wa re, “Mokaulengwe Branham, ke tshwanetse ke dire eng ka ga gone?” Potso e ne ya arabiwa. Nka kgona fela go bua jaaka Paulo a buile, o tshwanetswe o kolobetswe sešwa!

<sup>353</sup> Jaanong, lebang fano, Ditiro. Mpe re baleng sena, Bagalatia 1:9. E kwaleng, lona ba lo e kwalang. Paulo ne a re, monna yo o tshwanang yona yo neng a bua sena, o ne a ruta selo sena. Lo dumela seo jaanong? A go ntse jalo? Paulo o ne a ba boleletse gore ba ne ba tshwanelwa go kolobetswa gape ka Leina la Jesu Keresete. Mme Paulo ne a re, “Fa Moengele go tswa Legodimong . . .” Bagalatia 1:8, “Fa Moengele go tswa Legodimong a tlaa lo ruta sepe se sele ntleng le Sena, a ena a hutsege mo go lona.” Fa e le mobishopo mogolo, fa e le mopapa, fa e le modiredi, fa e le moporofeti, fa e le moruti, fa e le gore ke Moengele go tswa Legodimong, kgotsa le fa e ka nna mang yo e ka bong e le ene, o ne a re, “Fa ba ruta sepe se sele ntleng le Sena, a ena a hutsege mo go lona!” A go ntse jalo? Mme o ne a go boeletsa gape, a re, “Jaaka ke buile, nna ke bua jalo gape: Fa ba ruta sepe se sele fa e se Sena, a ena a hutsege!” A go ntse jalo?

<sup>354</sup> Jalo he Morena a le segofatseng. Ke go badile mo Lefokong, mme lo tseye tshwetso ya lona.

<sup>355</sup> Jaanong ke ba le kae ba ba ratang pina e e molemo eo ya kgale:

Tumelo ya me e leba kwa go Wena,  
Wena Kwana ya Golegotha,  
Mopholosi wa Selegodimo;  
Jaanong nkutlwé fa ke santse ke rapela,  
Tlosetsa molato otlhe wa me kgakala,  
Mme o ntetlelele go tloga letsatsing leno  
Ke nne wa Gago gotlhele!

<sup>356</sup> Ke batla go le botsa sengwe, lona mo kerekeng ena. Jaaka motho yo o swang a rerela motho yo o swang, ke lemoga gore ena e ka tswa e le theroy a bofelo e nka bang ka e rera; mme ke leka go rera theroy nngwe le nngwe e ke e dirang, jaaka okare e ne e le ya me ya bofelo, jaaka motho yo o swang mo mothong yo o swang. Jaanong ke a le botsa, bakaulengwe ba me, le banni ka nna ba baagelani bana le lefatshe, a wena ka nnete o ikutlwá gore o tlhoka motsamao o o gaufi go feta le Modimo morago ga ditirelo tsena? Modimo a go segofatse! Nna jaaka mo . . . mokaulengwe wa lona, ke buang le lona, thapelo ya me e e tlhoafetseng ke gore, ko go lona, gore lo tlaa amogela motsamao o o gaufi thata ona le Modimo.

<sup>357</sup> Mme mma, kwa Letsatsing la Katlholo, fa masigo ana a ke ntseng ke a rera, go tlaa nna le jaaka—jaaka kgatiso e kgolo ya theipi e e tshamekiwang mo Letsatsing leo, mme lentswe la me le tlaa tswa, mme ke tlaa tshwanela go ema kwa ke bo ke arabela, gonnes mafoko a me kana a tlaa ntshegofatsa kgotsa a nkatalhole ka Letsatsi leo. Mme aoe ntse e le mafoko a me ka dingwaga di le masome a mabedi le sengwe tse di fetileng, jaaka mosimanyana wa go ka nna dingwaga di le masome a mabedi, a rera Efangedi, mme nna ke masome a manê le bothlano jaanong. Mme ga ke ise ke Go fetole gannyennyane, ka gore nka se kgone go Go fetola fa fela Baebele e nna ka tsela eo.

<sup>358</sup> Ke E tlhomphile mo go bobishopo le sengweng le sengweng se sele, mme ga ke ise ke bone a le mongwe ka nako yo o neng a kgona go bua kganetsanyong le Gone, go ya ka Lefoko. Ba re... Sentle, jaanong, nna... Moperesiti yona, fano malatsi a le mmalwa a a fetileng, o ne a re, “Moruti Branham, ga re tseye Baebele; ke kereke, mo go rona.” Jalo he o ka se kgone go bua le monna yoo. Fela fa e le gore o ile go go thaya mo Baebeleng, moo go farologane. Lo a bona?

<sup>359</sup> Ke rapela gore Modimo o tlaa... Mongwe le mongwe wa ditsala tsa me tsa Makhatholike teng fano, le mongwe le mongwe wa ditsala tsa me tsa Maprotestante, mme ebile... Ga ba sa tlhola ba le... Fa ope... Nna—nna fela ke rata mongwe le mongwe wa lona. Mme Modimo o a itse a kana moo ke nneta kgotsa nnyaya. Elang tlhoko mo moleng wa thapelo, fa difofu—difofu le bannani, Ga go re, “Khatholike.”

<sup>360</sup> Monna ke yona o dutse gone fano mo sera... gone fano, Mokhatholike, a swa ka kankere, a jelwe; o ne a tla kwa ntlong ya me, mme Mowa o o Boitshepo ne wa tla mo go ena, wa mo fodisa kankere eo. Ga a ise a mmolelele a kana o ne a le Mokhatholike kgotsa nnyaya; ga ke ise ke mmolelele lefoko. O ne a tla ka kwano, a kolobediwa ka Leina la Jesu Keresete mme a amogela Mowa o o Boitshepo. Monna ke yoo o dutse gone foo, rakgwebo ko Louisville. Eya. Lo a bona?

<sup>361</sup> Ga go botse a kana o Mokhatholike kgotsa nnyaya. Ke a kana pelo ya gago e tshwerwe ke tlala ya Modimo. “Go sego bao ba ba tshwarwang ke tlala ebile ba nyorelwa tshiamo, gonnes ba tlaa kgorisiwa.” A go ntse jalo? Amen. Morena a lo segofatse.

<sup>362</sup> Ke ba le kae ba ba itseng pina ena ya kgale e e molemo, *Go Sego Sebofo Se Se Bofang?* Ke batho ba le kae fano ba ba fetileng dingwaga di le masome a manê, tsholetsang diatla tsa lona le nna, mme lo re, “Ke gakologelwa pina ya kgale, go tswa dingwageng di le masome a manê, *Go Sego Sebofo Se Se Bofang?*”

Go sego sebofo se se bofang  
Dipelo tsa rona mo loratong lwa Sekeresete;

Kabalano ya megopoloy ya ba losika  
E tshwana le ele ko Godimo.

<sup>363</sup> A ga lo rate dipina tseo tsa kgale? Reetsang, ke batla go bua sena, fa re ne re na le mo gontsi ga dikopelo tseo tsa kgale mo boemong jwa go tswelela mo gontsi mona mo re nang nago, ke dumela gore kereke e ne e tlala bo e le botoka. Ke rata dipina tseo tse di molemo, tsa kgale tse di neng tsa kwalwa ke Mowa o o Boitshepo.

<sup>364</sup> Mabutswapele ao, ke ne ke tlwaetse go gakologelwa, monna mogolo wa lekhala, ne a tlwaetse go nna ko ntle fa morago ga ntlo, golo koo ko dithabeng tsa Kentucky. Fa a ne a tle a lapisege, o ne a tle a nne mo logongeng leo la kgale—la kgale mme o ne a tle a iteye diatla tsa gagwe mo logongeng. Ke mo gakologelwa fela sentle, ne a na le moririnyana o mosweu go dikologa tlhogo ya gagwe. O ne a tle a opele pina ele ya kgale, pina ya kgale:

Ke tlala tsoga mme ke ye ko go Jesu,  
O tlala nkamogela mo mabogong a Gagwe;  
Mo mabogong a Mmoloki wa me yo o rategang,  
Ao, go na le meratiso e le dikete di le lesome.

<sup>365</sup> Go se molodi o montsi mo go yone. Ke ba le kae ba ba kileng ba utlwa pina ele ya kgale? [Phuthego ya re, “Amen.”—Mor.] Ija! Moo go siame. Reretsang . . .



*DIPOTSO LE DIKARABO* TSW54-0515

(Questions and Answers)

TATELANO YA TSA BOITSHWARO, TOLAMO LE THUTO TSA KEREKE

Molaêtsa o ka Mokaulengwe William Marrion Branham, o nê wa rôrwa la ntlha ka Sekgowa mo maitseboeng a Lamatlhatso, Motsheganong 15, 1954, kwa Motlaaganeng wa Branham ko Jeffersonville, Indiana, U.S.A., o tsêrwe mô theiping ya makenete mme wa gatisiwa ka Sekgowa o sa khutswafadiwa. Phuthololô e ya Setswana e gatisitswê le go abiwa ke ba ga Voice Of God Recordings.

TSWANA

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kitsisô ka tetlokhopi

Ditshiamelo tsotlhe di sireleditswe. Buka e e ka gatisiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwé go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwá go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)